

## लूका

**ब्रेक्ब मुर:** नेल्ल क्येडा डोंइती डा थमा सुइक्ब नु नोले थमा सुइक्ब आन इतिहास ब्रेक्ब येरोम नु यूसेबियसमी एको किताब लूकाम ब्रेक्शो बाक्ब, दे तुइक्तसे बाक्त। लूकामी प्रेरित किताब यो ब्रेक्शो बाक्ब। परमप्रभु यावे आ लोत्रमी लूका आ पर्बम सां खेयप लोत्र पशो बाक्ब। कलस्सी ४:१४; फिलेमोन:२४; तिमोथी ४:११ लूकामी, इस्राएली मद्मुशो, पावल नु गेय पवा बाक्त। मेको शुश शेंसीशो मुर बाक्माक्त।

**गेना ब्रेक्शो:** एको किताब गेना ब्रेक्शो बाक्ब ठीक पा मतुइक्नीम। तन्न ६०-८५ ए. डी. मेर दुम्चा माल्ब। लूका आ ब्रेक्शो क्येडा डोंइती अर्को ग्येरपाइक्तीक लोत्र ब्रेक्ने थुम्शो बाक्तेक्म। लूका १:१

**मारदे ब्रेक्शो:** लूकामी थियोफीलस माइश्शो ठेयब मुर कली येसु ख्रीस्त आ इतिहास नु आ शेंशो नेल्ल ब्रेक्शो बाक्ब। येसु आ किकी पिपी आदम सम्म डा लोत्र ब्रेक्शो बाक्ब। एको किताब यहूदी आन कली ला ममाइ, रागी नेल्ल डा मुर आन कली ग्येरपाइक्ब लोत्र बाक्ब। येसु नेल्ल मुर, प्रुडग नु श्येत जाइब आन कली यो पाप रे प्रोंइब बाक्ब।

डोंइती डा लोत्र

1 माननीय थियोफीलस, इं रागीम मार मार दुम्मे, मेको आ पर्बम शुश लोत्र ब्रशो बाक्माक्त।

2 डोंइती रे मेको ताइब नु तुइक्बपुकीमी मेको आन तशो, तुइश्शो लोत्र तेइ तेइ नेंपाइश्शो बाक्मा बाक्त। १यूहन्ना १:१-४

3 गोमी ताइब तुइक्ब आन देंशो नेंशा, ब्रेक्ब आन ब्रेक्शो पढेशा “थमान बाक्माक्त” देंती। मिनु गो यो ब्रेक्तु देंशा, एको लोव्र का का पा इन कली ब्रेक्ताक्न्नी। प्रेरित १:१; कलस्सी ४:१४

4 लोव्र का निक्शी डोंइती नेंनी माइ। एको आं ब्रेक्शो यो पढेतीनी हना, गेमी यो “थमा बाक्माक्त” दे थमा सुइक्नीनी।

### जकरिया योव्रसीशो

5 यहूदीया रागीम हेरोद पिप आ पालामी अबीयाह आ हुल डा जकरिया नें पाइशो चढेब का बाक्माक्त। आ मीश हारून आ खिं डा चढेब आ तमी बाक्माक्त। आ नें एलीशीबा बाक्माक्त। १इतिहास २४:१०,१९

6 मेको निक्शी परमप्रभु यावे आ डोंइती ठीक पाइब बाक्सा बाक्त। परमप्रभु यावे आ अरेशो लोव्र नु पतीके लोव्र नेल्ल टिशा, दोस मताइब दुम्शा बाक्शो बाक्सा बाक्त।

7 मेको निक्शी खालपी खाल्पा दुम्शो बाक्ताक्स हना यो, आल मथिशो बाक्सा बाक्त। मारदे हना एलीशीबा आल मथीब मीश मुर बाक्माक्त।

8 मिनु मार दुम्माक्त देंशा हना, चढेब आ गेय पचा कली अबीयाह आ हुल आन पालो जाक्माक्त। मिनु जकरिया यरूसलेम लमाक्त। मिनु मेकेर जाक्दीशशा, परमप्रभु यावे आ खिंमी गेय पवा बाक्त।

9 मिनु धूप चोचा कली चढेब योव्रचा माल्बाक्माक्त। मिनु चढेबपुकीमी यहूदी आन पतीके धूप चोइब मुर योव्रचा कली भोट तोक्गमे बाक्त। मिनु भोट तोक्गमेनु, जकरिया योव्रसे बाक्त। मिनु जकरियाम परमप्रभु यावे आ खिंमी धूप चोचा माल्दा बाक्त। प्रस्थान ३०:७

10 मिनु धूप चोची ना मुर नेल्ल लाडगाम रिम्शा, परमप्रभु यावे कली पुंइना पुंइन बाक्मा बाक्त।

“तौ का थीनेवे” देंशो

11 मिनु आगामी चहिं मार दुम्माक्त देशा हना, परमप्रभु आ स्वर्ग डा गेय पाइब का फो गूशा, धूप चोतीके आ ग्युरा गे राप्शा, जकरिया कली तपांडसे बाक्त।

12 मिनु जकरियामी मेको कली तशा, थाम्पा हिंमाक्त।

13 मिनु परमप्रभु यावे आ स्वर्ग डा गेय पाइबमी “जकरिया महिनो। परमप्रभु यावेमी इ पुंडशो गेब। इ मीश एलीशीबाम तौ का थीब। मिनु गे मेको आ नें यूहन्ना वोतो।

14 मेको आल थिशो तशा, गे ग्येरसीनेवे। शुश मुर मेको आल आ पर्बम ग्येरसीनीम।

15 मारदे हना मेको परमप्रभु आ डोंइती ठेयब दुम्ब। मेकोमी शांबु राकसी मतूब। मेको कोव्रजम बाक्मेनुन, परमप्रभु यावे आ सोक्तीम ब्रीशो बाक्ब। न्यायाधीस १३:४-५

16 मेकोमी शुश इस्राएली आन थुं परमप्रभु, आन परमप्रभु यावे गे लेप्पाइक्ब।

17 मिनु मेकोमी एलीया आ सोक्त नु सक्ति तशा, आम आफ आ थुं आन तमी तौ गे लेप्पाइक्ब। मिनु मटीब आन कली ठीक पतीक लां जोक्ब तुइक्ब सेल्ब। मिनु मोपा मुर आन कली प्रभु नु गुम्पाइक्चा कली ठीक सेल्ब” देंमाक्त। मलाकी ३:१, २३, २४; मत्ती १७:११-१३

18 मिनु जकरियाम परमप्रभु यावे आ स्वर्ग डा गेय पाइब कली “गो खाल्पा दुम्ती, आं मीश खाल्पी दुम्त। आल थीनस्कु, दे दोपा थमा सुइक्चा डा?” देंमाक्त। उत्पत्ती १८:११

19 मिनु “गो परमप्रभु यावे आ स्वर्ग डा गेय पाइब गाब्रीएल नड। गो परमप्रभु यावे आ डोंइती बाक्नुड। परमप्रभु यावेमी इ कली ग्येरपाइक्ब लोव्र नेंपाइक्थ सोइक्ताक्यी। दानीएल ८:१६

20 तन्न गे आं देशो लोव्र थमा मसुदी। मोपतीके आं देशो लोव्र नेल्ल मदुम सम्म गे इ सेंदा सोव्रशा ब्वाक्ने मचाप्ब दुम्नेवे” देंमाक्त।

21 जकरिया आगाम बाक्मेनु, शुश मुर लाडगाम देल्शा “ना रेन आगा ओव्रशो मार पवा माइ, काइ मग्रू” देशा रिम्दमे बाक्त।

22 मिनु नोले जकरिया गूशा “लोव्र पड” देंमेनु, काइ लोव्र पने मचबा बाक्त। मिनु गुइ चाल पवा बाक्त। मिनु लाडगाम बाक्बपुकीमी “मेकोम परमप्रभु यावे कली गुमा बाक्त” दे तुइक्तमे बाक्त।

23 मिनु अबीयाह आ हुल डा पालो नुप्शा, जकरिया आ खिं लेम्माक्त।

24 मिनु आ मीशेम कोव्रज कुरा बाक्त। मिनु ५ महिना सम्म सुइ आन कली मतुइक्पाइक्थु, खिं डा खिं बाक्माक्त।

25 मिनु “मुरपुकीमी आं कली आल मथीब, दे महिक्गेम। मुल परमप्रभुमी आं कली हिक्पाइक्चा कली शिशी पतीकेमी आल थीब दुम्पाइक्ती” देंमाक्त। उत्पत्ती ३०:२३

### येसु जरमेसीब, दे तुइक्पाइश्शो

26 एलीशीबामी आल कुरशो ६ महिना दुम्मेनु, परमप्रभु यावे आ स्वर्ग डा गेय पाइब गाब्रीएल गालील रागी डा नासरथ सहर सोइक्चा पुंइसे बाक्त।

27 मेकेर मरीयम नें पाइश्शो मीश आल का बाक्माक्त। मरीयम दाऊद आ थर डा योसेफ माइश्शो वोंइश मुर नु ग्युंवे पचशो बाक्माक्त। मत्ती १:१६-१८

28 गाब्रीएल मरीयम आ बाक्तीके जाक्शा, मरीयम कली “परमप्रभु गे नु बाक्ब। इ कली दाक्शा, आसीक गेते” दे सेउ पवा बाक्त।

29 मिनु मरीयममी परमप्रभु यावे आ स्वर्ग डा गेय पाइब कली तशा, आ लोव्र नेंशा छक लाक्शा “मार लोव्र माइ” दे मिम्ता बाक्त।

30 मिनु गाब्रीएलमी “ए मरीयम, महिनो। परमप्रभु यावेमी इ कली दाक्शा योव्रते।

31 गे मुल कोव्रज कुरशा, तौ का थीनेवे। मिनु इ तौ कली येसु नें वोतो। यसैया ७:१४; मत्ती १:२१-२३

32 मेको ठेयब दुम्ब। मेको कली नेल्ल क्येडा ठेयब आ तौ देंनीम। मिनु परमप्रभु, परमप्रभु यावेमी मेको कली आ किकी पिपी दाऊद आ ठेयब निल्लीके गेब। यसैया ९:६

33 मिनु मेको याकूब आ खिं डा मुर, यहूदी आन पिप दुम्शा, हुकुम पाइब। मिनु आ राज्य गेनायो मनुपब” देंमाक्त।

34 मरीयममी मेको लोव्र नेंशा “गो मुल सम्म ग्युंवे मपशो बाक्नुड। गो वोंइश मुर नु मइम्ड। इन देंशो दोपा दुम्ने चापबा डा?” दे हिल्लो पवानु

35 “परमप्रभु यावे आ सोक्तीमी इ कली सुम्ब। मिनु नेल्ल क्येडा ठेयब आ सक्ति ताइनेवे। मोपतीके इ आल परमप्रभु यावे के बाक्ब। मेको कली परमप्रभु यावे आ तौ देंनीम। मत्ती १:१८-२०

36 इ थर डा एलीशीबा कली यो मार दुम्त देंशा हना, आल मथीब खाल्पी बाक्त हना यो, मुल कोव्रज कुरशो ६ महिना दुम्त।

37 मारदे हना परमप्रभु यावेमी पने मचापशो मारेइ मबाक्ब” देंमाक्त। उत्पत्ती १८:१४

38 मिनु मरीयममी “गो परमप्रभु आ वाइलीम दुम्ती। मिनु इन देंशो बुद पा आ दाक्शो पपाइय्यील” देंमाक्त। मिनु परमप्रभु यावे आ स्वर्ग डा गेय पाइब लेशशा लमाक्त।

### मरीयमम एलीशीबा गुम्शो

39 मिनु नोले मरीयम यहूदीया रागी डा पहाडी सहर कामी बाक्शो एलीशीबा कली गुम्थ लमाक्त।

40 मिनु जकरिया आ खिं ओव्रशा, एलीशीबा कली सेउ पवा बाक्त।

41 मरीयम आ सेउ ताक्गानु, एलीशीबा आ कोव्रज डा आल प्रेक्माक्त। मिनु परमप्रभु यावे आ सोक्तीमी एलीशीबा कली प्रिंदा बाक्त।

42 मिनु ठेयब सेंदा पा मरीयम कली “मीश मुर नेल्ल आन दातेमी गे आसीक ताइब बाक्नेवे। इ कोव्रज डा आल आसीक ताइब बाक्ब।

43 आं प्रभु आ ममा दोपा आं खिंमी आं कली ग्रुथ जाकनी?

44 गो इ सेउ ताक्गुनु, आं कोव्रज डा आल ग्येरशा प्रेक्त।

45 गो परमप्रभु आ लोव्र नेंशा, आ देंशो गेना हना यो जाक्दीप्ब, दे थमा सुइक्तीनी। परमप्रभु यावेम इन कली आसीक गेवल” देंमाक्त।  
लूका ११:२७-२८

### परमप्रभु कली ठेयब सेल्शो

46 मिनु मरीयममी “आं थुंमी परमप्रभु कली ठेयब सेल्नुड।  
१सामुएल २:१-१०

47 मारदे हना मेको आं कली श्येत रे प्रोंइब, परमप्रभु बाक्ब। गो ग्येरसीनुड।

48 गो महिक्सीशो आइक्च नड। तन्न परमप्रभु यावेमी आं कली हिकती। मुल डा मेरे जात नेल्ल डा मुरपुकीमी आं कली आसीक गेनीम।

49 मारदे हना सक्ति पाइश्शोमी आं कली थम रिम्शो पाइक्ती। परमप्रभु यावे आ नें का ला बाक्ब।

50 सु सुम मेको कली मान पा हिंनीमी, मेको आन कली शिशी पाइब। भजन संग्रह १०३:१३, १७

51 मेकोमी सक्ति कोंइताक्व। मिनु ठेयब लेशो आन कली आन मिम्शा हिंतीके मेको आन कली गेब। उत्पत्ती ११:८

52 हुकुम पाइब आन सासन पशो रोइश्शा, महिक्सीशो आन कली ठेयब सेल्लु। भजन संग्रह १४७:६

53 शोव्रलु बेक्शो आन कली जचा गेब। शोंप पाइश्शो आन कली श्येत्थ गुइ सोइक्ब। भजन संग्रह ३४:११; भजन संग्रह १०७:९

54 मेकोमी आ शिशी कोंइशा, आ वाइल इस्राएल कली वारच पाप्तु।

55 मेकोमी इं किकी पिपी, अब्राहाम नु आ चच युइ आन कली गेना हना यो शिशी पचा कली मिम्ताक्व” दे मरीयममी परमप्रभु यावे कली मान पा देंमाक्त। उत्पत्ती १७:७; उत्पत्ती १८:१८

56 मिनु मरीयम एलीशीबा आ खिंमी महिना सां सम्म बाक्शा, आ खिं लेम्माक्त।

यूहन्ना जरमेशो

57 मिनु डोंइती देंशो बुद पा एलीशीबामी तौ का थिमाक्त।

58 आ एर ओंथ बाक्ब नु आ खिं डा मुर नेल्लेमी “परमप्रभुमी मेको कली शिशी पा, तौ थीब सेल्लु” देंशो नेंशा, नेल्ल मेको नु ग्येरसमा बाक्त।

59 मिनु आल ८ नाक्त दुम्मेनु, जकरिया आ खिंमी मुर देल्शा, खोइक्तीक चिनु खोइश्शा, आल आ नें वोइक्चामेनु, नेल्लेमी “आ आफ आ नें खोदेंशोन वोइक्चा” देंमा बाक्त। उत्पत्ती १७:१२

60 तन्न आल आ ममामी “मदुम्ब, एको आ नें यूहन्ना वोइक्चा माल्ब” देंमाक्त।

61 मिनु मुरपुकीमी “मुल सम्म इन खिं डा सुइ मुरुमी मोदेंशो नें मवोदेम” देंमा बाक्त।

62 मिनु नोले “आ आफ कली हिल्लो पय” दे जकरिया कली हिल्लो पामेनु,

63 जकरियाम ब्रेक्तीक का पितीन, दे चाल पा “आं तौ आ नें यूहन्ना वोतीने” दे ब्रेक्ता बाक्त। मिनु नेल्ले छक लाक्मा बाक्त।

64 मेना जकरिया आ सेंदा ग्रिश्शा, ब्वाक्ने चाप्ब दुम्शा, परमप्रभु यावे कली ठेयब सेला बाक्त।

65 मिनु लोत्र पाइब दुम्त देंशो नेंशा, मुर नेल्ल छक लाक्शा हिंमा बाक्त। मिनु मेको लोत्र यहूदीया डा पहाड नेल्ल ब्रमाक्त।

66 नेंबपुकीमी मेको लोत्र आन थुंमी वोइश्शा “मेको आल नोले दोदेंशो दुम्बा?” देंमुमा बाक्त। मारदे हना परमप्रभु मेको आल नु बाक्माक्त।

जकरियाम परमप्रभु कली ठेयब सेल्लो

67 आल आ आफ जकरियामी परमप्रभु यावे आ सोक्तीम ब्रीशा, परमप्रभु यावे आ लोत्र पवा बाक्त।

68 मेकोमी “परमप्रभु, इस्राएली आन परमप्रभु यावे ठेयब बाक्ब। मारदे हना इस्राएल डा मुर इं कली शिशी पा पाप रे प्रॉइब सोइक्चाप्तु। लूका ७:१६

69 मेकोमी आ गेय पाइब दाऊद आ खिं डा मुर रे इं कली सक्ति पाइशो पाप रे प्रॉइब सोइक्ताक्व।

70 साइ नेसी परमप्रभु यावेमी आ लोत्र पाइब आन कली मेको इस्राएल कली पाप रे प्रॉइब आ पर्वम लोत्र पपदा बाक्त। मिनु मेको लोत्र पाइबपुकीमी मार देंमा बाक्त देंशा हना

71 ‘परमप्रभु यावेमी गो इस्राएल डा मुर आंइ कली आंइ जोरी सत्रु आन गुइ रे नु आंइ कली काइ मदाक्ब रे प्रॉइब’ देंमा बाक्त।

72 ‘परमप्रभु यावेमी आंइ किकी पिपी आन कली शिशी पाइनुड’ दे आ पशो कबल मिम्ताक्व। उत्पत्ती १७:७

73 मोदेशो पा शिशी पाइनुड, दे इं किकी पिपी अब्राहाम नु कसम जशा लोत्र थोक्ता बाक्त। मार लोत्र थोक्शो बाक्त देंशा हना उत्पत्ती २२:१६-१८; मीका ७:२०

74 ‘गो इं जोरी सत्रु आन गुइ रे प्रॉइचा पुंडसीनय। मिनु गो महिंथु परमप्रभु यावे कली ठेयब सेल्ले चाप्नय।

75 आ मुर दुम्शा, ब्रॉइका सम्म ठीक गेय पा बाक्ने चाप्यल’ दे परमप्रभु यावे आ लोत्र पाइबमी देंमा बाक्त। तीतस २:१२-१४

76 मिनु जकरियामी आ तौ कली ‘गे नेल्ल क्येडा ठेयब आ लोत्र पाइब’ देंनीमी। मारदे हना गे प्रभु आ डोंइती गाक्शा, मेको आ लां सेल्लेवे। मलाकी ३:१

77 गे मेको आ मुर आन कली आन पाप क्याम्सीशा, पाप रे ब्रॉइशो मुर दुमीन, दे शेनेवे। येरमीया ३१:३४

78 आंइ परमप्रभु यावेमी इं कली दाक्शा, शिशी पा, रुप्तीक थुं सुनी डा छेडछेड खोदेशो पा इं तार मोइक्ताक्व। यसैया ६०:१-२

79 मिनु मेको बेक्पाइक्ब आ छिडछिडम बाक्ब आन कली हाम्सो दुम्ब। मिनु मेकोमी आंइ कली थुं नाइशशा बाक्तीकेम



खुल्ब” देंमाक्त। यसैया ९:१

80 मिनु यूहन्ना कोल्शा, परमप्रभु यावे आ सोक्तीम बोल्यो दुम्शा, खिं रे गाक्शा, मुर मबाक्तीके गोरशो रागीमी जाक्दीश्शा, इस्राएल डा मुर आन कली परमप्रभु यावे आ लोत्र मशेंदीमी सम्म मेकेर बाक्माक्त। मत्ती ३:१

## 2

### येसु जरमेशो

1 मिनु मेना सिजर अगस्टसमी “रागी नेल्ल डा मुर आन नें ब्रेक्शा हिक्चा नमी” दे हुकुम पवा बाक्त।

2 मोदेशो नें ब्रेक्तीके डोंइती गेनायो मपशो बाक्मा बाक्त। मुल पामेनु, सिरीया रागीम क्वीरीनीयसम सासन पशो बाक्माक्त।

3 मिनु मुर नेल्ल आन नें ब्रेक्पाइक्चा कली आन थर डा सोतीक बोतीक गाउं गाउं सहर सहरम जाक्दीम्मा बाक्त।

4 योसेफ पिप दाऊद आ खिं डा बाक्माक्त। पिप दाऊद आ खिं डा मुर आन सोतीक बोतीक बेथलेहेम सहर बाक्माक्त। मोपतीके योसेफ आ मीश मरीयम कली लाइश्शा, गालील रागी डा नासरथ सहर रे यहूदीया रागी डा बेथलेहेम सहर लमाक्त।

5 मोपा आस नें ब्रेक्पाइक्थ लसानु, मरीयम कोत्रज कुरशो बाक्माक्त।

6 मिनु बेथलेहेम सहरम जाक्दीस्सा नोले मरीयम आल थितीक रोइ पवा बाक्त।

7 मेकेर बास बाक्तीक खिं मथित्थु, गोठ कामी बास बाक्सा बाक्त। मिनु गोठम बाक्सानु, मरीयममी तौ का थिशा, वाम गिल्शा, शुंगुम इप्पदा बाक्त। मत्ती १:२५

### गोठलापुकी जाक्शो

8 मेकेर गोठलापुकी बाक्मा बाक्त। मेकोपुकी नाक्दो रूम बाक्शा, आन भेडा खाल पशो बाक्मा बाक्त।

9 मिनु परमप्रभु यावे आ स्वर्ग डा गेय पाइब का गोठला आन बाक्तीकेम फो गूमाक्त। मिनु परमप्रभु आ छेडछेडमी मेको गोठला आन एर ओंथ ठेयब हाम्सो सेला बाक्त। मेको तशा गोठलापुकी शुश हिंमा बाक्त।

10 तन्न परमप्रभु यावे आ स्वर्ग डा गेय पाइबमी “महिनीने। गो इन कली नु मुर नेल्ल आन कली ग्येरपाइब लोत्र नेंपाइकथ जाक्ती।

11 एको ग्येरपाइब लोत्र दोदेशो बाक्ब देशा हना, मुलाकदो पिप दाऊद आ सहरम आल का जरमेसाक्व। मेको नक जरमेशो आल पाप रे प्रोइब, प्रभु येसु ख्रीस्त बाक्ब।

12 आं लोत्र थमा बाक्ब, दे दोपा तुइक्नीनी देशा हना, गे मेको नक जरमेशो आल कली वाम गिल्शा, शुंगुम इप्पाइशो थित्नीनी” देंमाक्त।

13 मिनु सरीड रे परमप्रभु यावे आ स्वर्ग डा गेय पाइब शुश फो फु गूशा, परमप्रभु यावे कली ठेयब सेल्शा भजन संग्रह १०३:२०-२१

14 “नेल्ल क्येडा इर डा परमप्रभु यावे नेल्ल क्येडा ठेयब बाक्ब। आ दाक्शो मुर आन कली थुं नाइशशा बाक्चा गेब” दे कुम्सो पामे बाक्त। लूका १९:३८; गन्ती ६:२६; एफिसी २:१४,१७

15 मिनु परमप्रभु यावे आ स्वर्ग डा गेय पाइब सरीड गे लेशशा लमा बाक्त। मिनु गोठलापुकीमी “बेथलेहेम सहर लय। एको परमप्रभुमी तुइक्पाइशो लोत्र कोत्रथ लय” देंमुमा बाक्त।

16 मिनु दौरशा जाक्दीशशा कोत्रडमेनु, मरीयम नु योसेफ थित्मे बाक्त। मेकेर नक थिशो आल यो शुंगुम इप्पाइशो तामे बाक्त।

17 मेको नेल्ल तशा, आल आ पर्बम नेंशो लोत्र शुश मुर आन कली तुइक्पदमे बाक्त।

18 मिनु आन लोत्र नेंब नेल्ल छक लाक्मा बाक्त।

19 तन्न मरीयममी गोठला आन लोत्र नेंशा, आ थुंमी वोदा बाक्त।

20 गोठलापुकीमी आन तशो नु आन नेंशो आ पर्बम परमप्रभु यावे कली ठेयब सेल्ना सेल्न लेम्मा बाक्त।

### येसु में वोइशशो

21 मिनु आल जरमेसे आ ८ नाक्ती खोइक्तीक चिनु खोदमे बाक्त। मिनु आ नें येसु वोदमे बाक्त। मारदे हना परमप्रभु यावे आ स्वर्ग डा गेय पाइबमी “मेको आ नें येसु वोइक्चा” दे आ कोव्रज कुरचा क्येडा डोइती मरीयम कली देशो बाक्माक्त। लूका १:५९; उत्पत्ती १७:१२; लूका १:३१

### येसु परमप्रभु आ खिं लाइशशो

22 मिनु चोव्रखेतीक नाक्त जाक्मेनु, मोसामी ब्रेक्शो लोव्र टिशा, यरूसलेम सहर जाक्दीशशा, आल कली परमप्रभु यावे आ खिं लाइशशा “परमप्रभु यावे केन दुम्ल” देशा, परवा आ चाइक्ब निक्शी चढ़ेम्से बाक्त। लेवी १२:१-४; गन्ती १८:१५

23 मारदे हना परमप्रभुम अरेशो लोव्रमी “डोइती थिशो वोइश आल परमप्रभु यावे के बाक्ब” दे ब्रेक्शो बाक्ब। प्रस्थान १३:२,१५

24 परमप्रभु आ अरेशो लोव्रमी आम्मा चोव्रखेचा कली “परवा आ चाइक्ब निक्शी चढ़ेचा माल्ब” दे ब्रेक्शो बाक्ब। लेवी १२:६-८

25 यरूसलेममी सिमियोन माइशशो मुर का बाक्माक्त। मेको ठीक पाइब नु परमप्रभु यावे कली मान पा हिं ब बाक्माक्त। परमप्रभु यावे आ सोक्तीम ब्रीशा “परमप्रभु यावेमी इस्राएल डा मुर आन कली पाप रे प्रोइब का सोइक्ब” दे लां कोव्रशा बाक्शो बाक्माक्त। उत्पत्ती ४९:१८

26 परमप्रभु यावे आ सोक्तीमी मेको कली “इ मबेक्थु, प्रभु, पाप रे प्रोइब ख्रीस्त गुम्पाइक्नन” देशो बाक्माक्त।

27 मिनु परमप्रभु यावे आ सोक्तीमी मेको कली “मुल परमप्रभु यावे आ खिं लावो” देतीके लशा, परमप्रभु यावे आ खिं जाक्दीम्माक्त। मिनु मरीयम नु योसेफमी आल कली परमप्रभु यावे आ ब्रेक्पाइशशो लोव्रमी मार पचा देशो बाक्मे, मेको पचा कली चाक्शो तवा बाक्त।

28 मिनु सिमियोनमी आल कली लाइशशा, परमप्रभु यावे कली ठेयब सेल्शा

29 “परमप्रभु, इन देशो जाकदीत्त। मुल इन वाइल थुं नाइशशा बेक्ने चाप्ब।

30 मारदे हना इन सोइशशो पाप रे प्रोंइब कली आं मिक्चीम ताता।

31 मेको कली रागी रागी डा मुर नेल्ल आन पर्बम सोइक्ताक्नी।

32 अर्को जात डा मुर आन कली छेडछेड दुम्शा, मेको आन कली रुप्तीक थुं गेचा कली सोइक्ताक्नी। गो इस्राएली आंइ कली थम रिम्शो दुम्त” देमाक्त। यसैया ४९:६

33 मिनु आल आ आम आफोमी “मार, मिश रिम्शो लोव्र पवा” दे छक लाक्सा बाक्त।

34 मिनु सिमियोनम मेको आस कली आसीक गेशा, मरीयम कली “एको आल इस्राएली आन दातेमी लां कोइशा मुर आन कली फ्राब। का निक्शी खतम दुम्नीम, का निक्शी रिम्शो दुम्नीम। मिनु शुश मुरुमी एको कली मदाक्नीम। लूका २०:१७-१८; प्रेरित २८:२२; १कोरिन्थी १:२३

35 मोपा मुर आन थुंम मिम्शो तुंडसीब। मिनु तरवार कामी इ थुं थोक्ब” देमाक्त। यूहन्ना १९:२५

36 यरूसलेममी आन्ना माइशशो परमप्रभु यावे आ लोव्र पाइब खाल्पी का बाक्माक्त। मेको आशेर आ थर डा फनुएल आ तमी बाक्माक्त। मेको ग्युंबे पशो आ ७ बर्सम आ वोंइश बेक्शो बाक्माक्त।

37 मिनु आ वोंइश बेक्म नोले शुश बर्स ब्रोंइशा, ८४ बर्स दुम्माक्त। मेकोमी परमप्रभु यावे आ खिं मप्रोंइथु, नाक्दो नाक्ती मेकेर माइजा बाक्शा प्रार्थना पा, परमप्रभु यावे कली ठेयब सेल्ना सेलन बाक्बाक्माक्त। १तिमोथी ५:५

38 मिनु मरीयम नु योसेफमी आल मेकेर लदसेनु, मेको खाल्पी गुम्से बाक्त। मिनु खाल्पीमी आल कली तशा, परमप्रभु यावे कली ठेयब सेला बाक्त। मिनु “परमप्रभु यावेमी पाप रे प्रोंइब सोइक्ब” दे

आस पा बाक्ब यरूसलेम डा मुर आन कली मेको आल आ पर्बम लोव्र पा नेंपाइक्मी बाक्त।

39 मिनु परमप्रभु आ अरेशो पचा माल्शो गेय नेल्ल थुम्शा, आल कली लाइशशा, गालील रागी डा नासरथ सहरम लेस्सा बाक्त।

40 मिनु नोले आल कोल्शा, जोक्ब तुइक्ब दुम्माक्त। मारदे हना परमप्रभु यावेमी दाक्शा मेको कली आसीक गेवा बाक्त।

### येसु परमप्रभु आ खिंमी बाक्शो

41 येसु आ आम आफ बर्स बर्समी पास्सा चाड मानेथ यरूसलेम लाइबाक्सा बाक्त। ब्यवस्था १६:१-८

42 मिनु येसु १२ बर्स जाक्दीम नोले पास्सा मानेथ लमानु, मार दुम्माक्त देंशा हना,

43 पास्सा थुम्शा खिं लेम्मानु, आम आफोम मतुइक्थु, येसु मेकेरन लीमाक्त। तन्न आ आम आफोमी मतुइसे बाक्त। प्रस्थान १२:१८

44 मेको नाक्त का डा लां गाक्सानु, येसु आ वारच नु लत, दे मिन्तसे बाक्त। मिनु वारच नु बाक्शो मतथु, येसु कली माल्चा गोम्से बाक्त। नाक्त का डा लां ३०-४० किलो मिटर बाक्ब।

45 मिनु माल्से माल्से तेइ मथित्से बाक्त। मिनु लेशशा माल्ना माल्न यरूसलेम जाक्शा यो मथित्से बाक्त।

46 नाक्दो नाक्ती सां सम्म माल्ना माल्न गाक्सा नोले परमप्रभु यावे आ खिंम थित्से बाक्त। मेको परमप्रभु यावे आ लोव्र शेंबपुकी नु बाक्शा, आन लोव्र नेंशा, मेको आन कली लोव्र हिल्लो पना पन बाक्शो ताम्से बाक्त।

47 मेको आ लोव्र नेंब नेल्लेमी “शुश जोक्ब तुइक्ब आल बाक्माक्त” दे छक लाक्मा बाक्त।

48 आ आम आफोम मेको कली तशा, थाम्पा छक लाक्सा बाक्त। मिनु आ ममामी “आं तौ, गे मारदे आंस कली मोदेंशो श्येत गेस्की? इ आफ नु गो इ कली ‘ते लाक्गा?’ दे शुश हिंशा माल्तास्कु” देंमाक्त।

49 मिनु येसुमी “मारदे माल्यीसी? गो आं आफ आ खिंमी बाक्चा माल्नुड, दे मतुइक्तीसी?” देंमाक्त। यूहन्ना २:१६

50 तन्न मेको आ लोव्र मरुप्से बाक्त।

51 मिनु येसु आ आम आफ नु लेशशा, नासरथ आ खिं लमाक्त। में डा मेरे आ आम आफ आस लोव्र टिशा बाक्माक्त। आ ममामी मेको मोदेशो दुम्शो नेल्ल शुश मिम्शा थुंम वोदा बाक्त।

52 येसु कोल्शा बारशा, शुश जोक्ब तुइक्ब दुम्माक्त। परमप्रभु यावेमी मेको कली दाक्ता बाक्त। मुरपुकीमी यो दाक्तमे बाक्त। १सामुएल २:२६

### 3

ब्वाक्कुम खुम्शा गुंडब यूहन्ना

मत्ती ३:१-१२; मर्कूस १:१-८

1 सिजर तिबेरीयुस आ हुकुम पशो १५ बर्स दुम्मेनु, इस्राएल रागीम सासन पाइब सु सु बाक्मा बाक्त देंशा हना, यहूदीया रागीम पन्तीयस पिलातस, गालील रागीम हेरोद, इतुरीया नु त्राकोनीतीस रागीम हेरोद आ लोकब फिलीप नु अबील्लेने रागीम लुसानीयस बाक्मा बाक्त।

2 यरूसलेममी नेल्ल क्येडा ठेयब चढेब हन्नास नु काइयाफास बाक्सा बाक्त। जकरिया आ तौ यूहन्ना गोरशो रागी मुर मबाक्तीकेमी बाक्शो बाक्माक्त। मिनु परमप्रभु यावेमी यूहन्ना कली लोव्र पवा बाक्त। इजीकीएल १:३; होसे १:१

3 मिनु यूहन्ना यर्दन खोला आ नेक्था जाक्दीशशा, एर ओंथ परमप्रभु यावे आ लोव्र शेंना शेंन गाक्माक्त। मिनु शेंना शेंन मुर आन कली “इन थुं परमप्रभु यावे गो लेशशा, ब्वाक्कुम खुम्शा गुंडचा पुंडसीन। मिनु परमप्रभु यावेमी इन पाप क्याम्शा गेब” दे शेंदीमी बाक्त।

4 साइ नेसी परमप्रभु यावे आ लोव्र पाइब यसैयामी “गोरशो रागीमी सेंदा का नेंसीब। मेकोमी मार देंब देंशा हना, प्रभु आ लां सेलीने। आ गाक्तीकेम फुल्लु ग्रोक्शा थेलीने। यसैया ४०:३-५

5 बेंसी नेल्ल प्रिंचा पुंइसीनीम। डांडा नेल्ल दिंम सेल्चा पुंइसीनीम। हिरशो लां नेल्ले सोव्रजो सेल्चा पुंइसीनीम। मरिम्शो लां नेल्ले रिम्शो सेल्चा पुंइसीनीम।

6 मिनु मुर नेल्लेमी परमप्रभु यावेमी दोपा पाप रे प्रोंइबा मेको तुइक्नीम” दे ब्रेक्शो बाक्माक्त। यसैया ४०:३-५

7 मिनु शुश मुर यूहन्ना आ बाक्तीकेमी ब्वाक्कुम खुम्शा ग्रुंइपांइसीचा कली जाक्मा बाक्त। मिनु यूहन्नामी मेको आन कली “गे बुस्स आ खलकपुकी, परमप्रभु यावे आ सजाइ रे ब्रोंइचा ताइनीनी, दे सुम शेंदा?

8 इन थुं परमप्रभु यावे गे लेशशा, रिम्शो फल सिशशो खोदेंशो गेय कोंइदीने। गे ‘इं किकी पिपी अब्राहाम बाक्ब’ दे मिम्शा, देश पा मबाक्कीन। मारदे हना गो इन कली ‘परमप्रभु यावेमी एको फुल्लु रे अब्राहाम आ चच युइ सेल्ने चाप्ब’ देंनुड।

9 तिम्चा, दे रवा आन पुंमी खा वोइशशो बाक्ब। रिम्शो फल मसिप्ब रवा का का पा तिम्शा, मीम चोचा पुंइसीनीम, दे तुइक्तीन” दे माइक्मी बाक्त।

10 मिनु मुरपुकीमी “मुल मार पक?” दे हिल्लो पामे बाक्त।

11 मिनु यूहन्नामी “सु के फेक्तीक वा निक्शी बाक्मे, मेकोमी फेक्तीक का मबाक्शो कली गेचा माल्ब। सु के जचा थोव्रक बाक्मे, मेकोमी जचा मताइब कली गेचा माल्ब” देंमाक्त।

12 तिरो पोक्बपुकी यो जाक्शा यूहन्ना कली “शेंब, गो मार पक?” दे हिल्लो पामे बाक्त।

13 मिनु मेकोमी “सरकारम ताक्चा देंशो क्येडा शुश मताक्चा” देंमाक्त।

14 का निक्शी सिपाइपुकी यो जाक्शा “मिनु गो मार पक?” दे

हिल्लो पामे बाक्त। मिनु मेको आन कली “सुइ आन कली हिंम हिंम पा जोल पा दोस गेशा आन मारेइ मारेइ मरोइक्तीन। इन गेय रे पा तशो क्येटम इन थुं नुशा बाक्कीन” दे माइक्मी बाक्त।

15 मिनु यूहन्ना आ लोव्र नेंबपुकीमी “एको मुर सु माइ? खीस्त कोर में?” दे शुश मिम्तमे बाक्त।

16 यूहन्नामी मेको नेल्ल आन कली “गो इन कली ब्वाक्कुम खुम्शा गुंइनन्नी। आं नोले जाक्ब चहिं आं क्येडा ठेयब बाक्ब। गो मेको आ डोंइती बाप्शा, आ जुत्ता प्रुइक्चा लायो मशिरनुड। मेकोमी इन कली परमप्रभु यावे आ सोक्ती नु मीम खुम्ब।

17 लाडगाम हाम्शो चेरब हुरशा, भूस नु गेडा तिल्ला कली मेको आ गुइमी ग्योल बाक्ब। गेडा कोठोम कुर पा वोइक्ब। भूस चहिं गेनायो मकाप्ब मीम हुम्ब” दे माइक्मी बाक्त।

18 मोदेशो लोव्र पा अर्ती गेशा, रिम्शो लोव्र शेंदीमी बाक्त।

19 मेकोमी सासन पाइब हेरोद आ लोकब आ मीश चाक्चा आ पर्बम दोस गेवा बाक्त। मोपतीके मेकोमी यूहन्ना कली जेल्खानमी चोक्पदा बाक्त। मत्ती १४:३-४; मर्कूस ६:१७-१८

20 हेरोद कली मार दोस गेवा बाक्त देशा हना “इन लोकब आ मीश चाक्शा, पात्के पाइतीनी। अरु पाप यो शुश पाइतीनी” दे हुइश्शो बाक्माक्त।

येसु ब्वाक्कुम खुम्पांडसीशो

मत्ती ३:१३-१७; मर्कूस १:९-११

21 मिनु यूहन्ना चोक्सीचा क्येडा डोंइती शुश मुर आन कली ब्वाक्कुम खुम्शा गुंइदा बाक्त। काबु येसु यो जाक्शा, ब्वाक्कुम खुम्शा गुंइचा पुंइसे बाक्त। मिनु ब्वाक्कु रे गूशा, प्रार्थना पना पन बाक्मेनु, सरीड रोक्से बाक्त।

22 मिनु सरीड रे परमप्रभु यावे आ सोक्त परवा खोदेशो पा यिशा, येसु आ तारी जुक्ता बाक्त। मिनु सरीड रे “आं दाक्शो तौ नवे। इ



कली तशा थाम्पा ग्येरसीनुड” देशो सेंदा नेंसे बाकत। यूहन्ना १:३२;  
लूका ९:३५

येसु आ किकी पिपी

मत्ती १:१-१७

23 मिनु येसुमी मुर आन कली परमप्रभु यावे आ लोव्र शेंचा गोवानु, ३० बर्स दुम्शो बाकमाक्त। मुरपुकीमी आ आफ योसेफ बाकब, दे मिम्तमे बाकत। योसेफ हेली आ तौ बाकमाक्त। लूका ४:२२

24 हेली मात्थात आ तौ बाकमाक्त। मात्थात लेवी आ तौ बाकमाक्त। लेवी मेल्की आ तौ बाकमाक्त। मेल्की यान्नाइ आ तौ बाकमाक्त। यान्नाइ योसेफ आ तौ बाकमाक्त।

25 योसेफ मत्थाथीयास आ तौ बाकमाक्त। मत्थाथीयास आमोस आ तौ बाकमाक्त। आमोस नाहुम आ तौ बाकमाक्त। नाहुम एस्ली आ तौ बाकमाक्त। एस्ली नगै आ तौ बाकमाक्त।

26 नगै माथ आ तौ बाकमाक्त। माथ मत्थाथीयास आ तौ बाकमाक्त। मत्थाथीयास सेमेइन आ तौ बाकमाक्त। सेमेइन योसेक आ तौ बाकमाक्त। योसेक योदा आ तौ बाकमाक्त।

27 योदा योआनान आ तौ बाकमाक्त। योआनान रेसा आ तौ बाकमाक्त। रेसा जेरूब-बाबेल आ तौ बाकमाक्त। जेरूब-बाबेल शाल्तीएल आ तौ बाकमाक्त। शाल्तीएल नेरी आ तौ बाकमाक्त।

28 नेरी मेल्की आ तौ बाकमाक्त। मेल्की अददी आ तौ बाकमाक्त। अददी कोसाम आ तौ बाकमाक्त। कोसाम एल्मादम आ तौ बाकमाक्त। एल्मादम एर आ तौ बाकमाक्त।

29 एर यहोसु आ तौ बाकमाक्त। यहोसु एलीएजर आ तौ बाकमाक्त। एलीएजर योरीम आ तौ बाकमाक्त। योरीम मात्थात आ तौ बाकमाक्त। मात्थात लेवी आ तौ बाकमाक्त।

30 लेवी सिमियोन आ तौ बाकमाक्त। सिमियोन यहूदा आ तौ बाकमाक्त। यहूदा योसेफ आ तौ बाकमाक्त। योसेफ योनाम आ तौ बाकमाक्त। योनाम एल्याकीम आ तौ बाकमाक्त।

31 एल्याकीम मेलेया आ तौ बाक्माक्त। मेलेया मेन्ना आ तौ बाक्माक्त। मेन्ना मात्ताथा आ तौ बाक्माक्त। मात्ताथा नाथान आ तौ बाक्माक्त। नाथान दाऊद आ तौ बाक्माक्त। २सामुएल ५:१४

32 दाऊद येस्से आ तौ बाक्माक्त। येस्से ओबेद आ तौ बाक्माक्त। ओबेद बोआज आ तौ बाक्माक्त। बोआज साल्मोन आ तौ बाक्माक्त। साल्मोन नहशोन आ तौ बाक्माक्त। रूथ ४:१७-२२

33 नहशोन अम्मीनादाब आ तौ बाक्माक्त। अम्मीनादाब आदमीन आ तौ बाक्माक्त। आदमीन अरनी आ तौ बाक्माक्त। अरनी हेस्रोन आ तौ बाक्माक्त। हेस्रोन पेरेस आ तौ बाक्माक्त। पेरेस यहूदा आ तौ बाक्माक्त। उत्पत्ती ५:१-३२; उत्पत्ती ११:१०-२६; उत्पत्ती २१:२-३; उत्पत्ती २९:३५

34 यहूदा याकूब आ तौ बाक्माक्त। याकूब इसहाक आ तौ बाक्माक्त। इसहाक अब्राहाम आ तौ बाक्माक्त। अब्राहाम तेराह आ तौ बाक्माक्त। तेराह नाहोर आ तौ बाक्माक्त।

35 नाहोर सेरूग आ तौ बाक्माक्त। सेरूग रेऊ आ तौ बाक्माक्त। रेऊ पेलेग आ तौ बाक्माक्त। पेलेग एबेर आ तौ बाक्माक्त। एबेर शेलाह आ तौ बाक्माक्त।

36 शेलाह केनान आ तौ बाक्माक्त। केनान अरपक्शाद आ तौ बाक्माक्त। अरपक्शाद शेम आ तौ बाक्माक्त। शेम नोआह आ तौ बाक्माक्त। नोआह लमेक आ तौ बाक्माक्त।

37 लमेक मेथुसेलाह आ तौ बाक्माक्त। मेथुसेलाह हनोक आ तौ बाक्माक्त। हनोक यरेद आ तौ बाक्माक्त। यरेद मा-हालालेल आ तौ बाक्माक्त। मा-हालालेल केनान आ तौ बाक्माक्त।

38 केनान एनोश आ तौ बाक्माक्त। एनोश सेथ आ तौ बाक्माक्त। सेथ आदम आ तौ बाक्माक्त। आदम चर्हि परमप्रभु यावे आ सेल्शो बाक्माक्त।

## 4

येसु नाकचा पुंडसीशो

1 येसु परमप्रभु यावे आ सोक्तीम ब्रीशा, यर्दन खोला रे लशा, परमप्रभु यावे आ सोक्तीमी गोरशो रागीमी चाक्दीत्चा पुंडसे बाक्त।

2 मिनु ४० नाक्ती गोरशो रागीम सैतान रे पा थुं नाक्चा पुंडसे बाक्त। मेको ४० नाक्त सम्म मारेइ मजथु बाक्शो बाक्माक्त। मिनु नोले शुश शोत्रलु बेक्माक्त।

3 मिनु सैतानमी “मार, गे परमप्रभु आ तौ नवे हना, एको फुल्लु कली ‘शोब्ले दुमो’ देन” देंमाक्त।

4 मिनु येसुमी “परमप्रभु यावेम ब्रेक्पाइशो लोत्रमी ‘मुर जशा ला मब्रोंइनीम’ दे ब्रेक्शो बाक्ब” देंमाक्त। ब्यवस्था ८:३

5 मिनु नोले सैतानमी येसु कली इर लाइशशा, याम कामीन रागी नेल्ल कोइशा

6 “रागी, रागीमी बाक्शो नेल्ल शोंप आं के नम। रागी नेल्ल आन कली हुकुम पाइब यो गो नड। गो मेको इ कली गेनुड। मारदे हना सु कली गेचा दाक्तु, मेको कली गेने चाप्नुड।

7 गे आं डोंइती बाप्शा, आं कली ठेयब सेल्टीवी हना, मेको नेल्ल इ कली गेनन” देंमाक्त।

8 मिनु येसुमी “परमप्रभु यावे आ लोत्रमी ‘परमप्रभु यावे कली ला ठेयब सेलो। मेको कली ला गेय पावो’ दे ब्रेक्शो बाक्ब” देंमाक्त। ब्यवस्था ६:१३

9 मिनु नोले सैतानमी येसु कली यरूसलेम लाइशशा, परमप्रभु यावे आ खिं डा नेल्ल क्येडा तारी लदा बाक्त। मिनु “मार, गे परमप्रभु यावे आ तौ नवे हना, एकेर रे प्रेक्को।

10 मारदे हना ‘इ कली कोत्रचा कली आ स्वर्ग डा गेय पाइब आन कली सोइक्ब।

11 मिनु मेकोपुकीमी इ कली आन गुडम ताक्शा, खपीम नाइक्पाइक्नीम। इ खोइल फुल्लु कामी यो मथोक्ब’ दे ब्रेक्शो बाक्ब” देंमाक्त। भजन संग्रह ९१:११,१२

12 मिनु येसुमी “परमप्रभु, इन परमप्रभु यावे कली थुं मनाक्चा, दे यो देंशो बाक्ब” देंमाक्त। ब्यवस्था ६:१६

13 मिनु सैतानमी नेल्ल नाक्ने थुमा नोले, मुल अर्को खेयप नाक्नुड, दे मिम्शा येसु कली प्रोंइशा मेक रे गाक्माक्त। हिब्रू ४:१५

येसुमी गालील रागीम शेंशो

मत्ती ४:१२-१७; मर्कूस १:१४-१५

14 मिनु नोले, येसु परमप्रभु यावे आ सोक्त आ सक्तिम गालील रागी लेम्माक्त। मेकेर एर ओंथ येसु आ पर्बम शुश लोत्र ब्रशो बाक्माक्त।

15 मेकोमी आन गुम्तीक खिं खिंमी शेंना शेंन गाक्मेनु, आ लोत्र नेंब नेल्लेमी “रिम्शो लोत्र पाइक्बाक्त” दे ठेयब सेल्मे बाक्त।

येसुमी नासरथ सहरम लोत्र पशो

मत्ती १३:५३-५८; मर्कूस ६:१-६

16 मोपा हिरना हिरन गाक्मेनु, काबु आ कोल्लीक नासरथ सहरम जाक्दीम्माक्त। आल रेन नाइक्तीक नाक्ती गुम्तीक खिं लशो खोदेंशो पा, गुम्तीक खिं लशा, परमप्रभु यावे आ लोत्र पढेचा कली राम्माक्त।

17 मिनु गुम्तीक खिं डा गेय पाइबमी मेको कली यसैया आ ब्रेक्शो किताब गेवा बाक्त। मिनु किताब प्राक्शा कोत्रशा यसैया ६१:१-२

18 “परमप्रभु यावे आ सोक्त आं तार बाक्ब। मारदे हना परमप्रभु यावेमी तेल लुक्ताक्यी। मेकोमी आं कली दिप्शो पुडग मुर आन कली ग्येरपाइक्ब लोत्र नेंपाइक्चा कली, ग्याइश्शा चोक्चा पुंडसीशो मुर आन कली प्रोंइचा कली, मिक्च मताइब आन कली तपाइक्चा नु श्येत जाइब आन कली श्येत रे प्रोंइशा, रिम्शो पा बाक्चा गेचा कली सोइक्ताक्यी। यसैया ४२:७

19 परमप्रभु यावे आ शिशी पतीक बर्स आ पर्बम शेंचा कली सोइक्ताक्यी” दे पढेशा नेंपाइक्मी बाक्त। लेवी २५:१०

20 मिनु किताब गिल्शा, गुम्तीक खिं डा गेय पाइब कली गेशा, निस्से बाक्त। मिनु नेल्लेमी येसु कली मिक्च मयाक्थु कोत्रस डा कोत्रस पामे बाक्त।

21 मिनु येसुमी “एको इन नेंशो लोव्र मुलाक्त गाप्त” देंमाक्त।

22 नेंबपुकीमी मेको आ पर्वम रिम्शो लोव्र पामे बाक्त। येसु आ रिम्शो लोव्र नेंशा छक लाक्शा “एको योसेफ आ तौ ममाइ डा?” देंमुमा बाक्त। लूका ३:२३

23 मिनु येसुमी मेको आन कली “गे इच्छी ना आं कली ‘मुर आन कली सापाइक्ब, गे इ कली यो सापतो’ देंतीक लोव्र देंनीनी। मिनु ‘गो कापेरनाउम सहरम चिन्ड नु छक लाक्चा डा गेय पशो नेंतक। मुल इ कोल्लतीक सहरम, एकेर यो मोदेंशो पावो’ दे आं कली देंनीनी” देंमाक्त।

24 मिनु येसुमी “थमा पा, मुरपुकीमी परमप्रभु यावे आ लोव्र पाइब आन कली आंम आन बाक्तीक सहरम काइ महिकनीम। यूहन्ना ४:४४

25 थमा लोव्र मार बाक्त देंशा हना, एलीया आ पालाम इस्राएल रागीम शुश वोंइश बेक्शो मीश मुर बाक्शो बाक्तेक्म। मेना बर्स सां ६ महिना सम्म रेउ मयिमाक्त। मिनु रागी नेल्ल डा मुरपुकीमी जचा मतामे बाक्त। १राजा १७:१,९-२४

26 तन्न परमप्रभु यावेमी एलीया कली मेको आन बाक्तीक मसोइक्त। तन्न सीदोन रागी डा सारेप्ता सहरम बाक्ब वोंइश बेक्शो मीश मुर का कली ला श्येत रे प्रोंइथ सोइक्ता बाक्त। सारेप्ता सहर कली हिब्रू लोव्रमी चारेफाथ देंनीम।

27 एलीशा आ पालामी यो इस्राएल रागीमी शुश कोव्रर पाइब मुर बाक्मा बाक्त। सुइ मसामा बाक्त। सिरीया डा नामान माइशो मुर ला सापाइक्चा पुंडसे बाक्त” दे येसुमी माइक्मी बाक्त। २राजा ५:१-१४

28 गुम्तीक खिंम बाक्शो मुर नेल्लेम मेको लोव्र नेंशा चुरमा बाक्त।

29 मिनु छुल छाल बोक्शा, येसु कली आन गुम्तीक खिं नु सहर रे गुंडशा, डांडा तार सेल्लो सहर डा रोंगु रे तोक्चा, दे लदमे बाक्त।

30 तन्न येसु मेको आन दाते रे गूशा गाक्माक्त।

येसु कापेरनाउम जाकदीशशो

मत्ती ८:१४-१७; मर्कूस १:२१-३९

31 मिनु नोले गालील रागी डा कापेरनाउम सहर बुम्माक्त। मिनु नाइक्तीक नाक्ती गुम्तीक खिं लशा, मुर आन कली शेंदा बाक्त।

32 मिनु आ शेंशो नेंशा छक लाक्मा बाक्त। मारदे हना आ लोव्र अधिकार पाइशशो बाक्माक्त। मत्ती ७:२८-२९; यूहन्ना ७:४६

33 मेको गुम्तीक खिंमी ग्रांग्रा दिचा डा वोल आ सोक्तीम सुम्शो मुर का बाक्माक्त। मेकोमी वाइ ब्रेशशा

34 “ओहो, नासरथ डा येसु, मार पमुया डा? आंइ कली साइक्थ जाक्नी? इन कली तुइक्ताक्क। गे परमप्रभु यावे आ योव्रशो ननी” देंमाक्त।

35 मिनु येसुमी वोल कली “रेयके मपथु, गूडो” दे हुइक्ता बाक्त। मिनु वोलमी मुर कली श्येत मगेथु, दिड खोल्शा वोइशशा गूममाक्त।

36 मो दुम्शो तशा, मुरपुकी छक लाक्शा “मार लोव्र बाक्म माइ? मारदे हना अधिकार नु सक्ति पाइशशो लोव्र पवानु, वोलपुकी गूबाक्तेक्म” देंमुमा बाक्त।

37 मिनु मेको रागी नेल्ल येसु आ पर्वम लोव्र ब्रना ब्रन लमाक्त।

38 मिनु येसु गुम्तीक खिं रे गाक्शा, सिमोन आ खिं जाकदीम्माक्त। सिमोन आ शिमी शुश जरो पा रोइ पा गोल्शो बाक्माक्त। मिनु खिं डा मुरुमी येसु कली “सापतीन” दे पुन्मे बाक्त।

39 मिनु येसु मेको आ नेक्था राप्शा, जरो कली हुइक्ता बाक्त। मिनु हुइक्तानु, जरो जाम्माक्त। मिनु साशा छुल बोक्शा, येसु नु आ वारच आन कली जचा गेमी बाक्त।

40 मिनु नां रिक्मेनु, शुश रोइ पाइब आन कली चाक्मे बाक्त। मिनु येसुमी रोइ पाइब आन कली आ गुइ आन तारी चाक्शा, नेल्ल आन कली सापाइक्मी बाक्त।

41 शुश मुर रे वोल गुंइदा बाक्त। वोल आन कली गुंइदानु, मेकोपुकीमी “परमप्रभु यावे आ तौ ननी” दे ग्रीमा बाक्त। तन्न

येसुमी मेको आन कली लोत्र पचा मगेथु, हुइक्तीमी बाक्त। मारदे हना मेकोपुकीम “ख्रीस्त बाक्ब” दे डोंइती रे तुइश्शो बाक्मा बाक्त। मत्ती ८:२९; मर्कूस ३:११-१२

42 मिनु आ दीसा सुनी येसु मेकेर रे गाक्शा, मुर मबाक्तीकेम जाक्दीम्माक्त। मिनु मुरपुकीमी “ते लमे?” दे माल्शा, आ बाक्तीकेम जाक्दीम्मा बाक्त। मिनु “आंइ कली प्रोंइशा मगाक्कीन। आंइ सहरम बाक्कीन” देंमा बाक्त।

43 मिनु येसुमी “अर्को सहर लचा माल्नुड। मारदे हना गो मेकेर डा मुर आन कली यो परमप्रभु यावे आ राज्य डा लोत्र पचा माल्नुड। गो मेको गेय पचा कली सोइश्शो नड” देंमाक्त।

44 मिनु रागी नेल्ल हिरना हिरन यहूदीया डा गुम्तीक खिं खिंमी शेंना शेंन गाक्माक्त। मत्ती ४:२३

## 5

डोंइती डा शेंसीब योत्रशो

मत्ती ४:१८-२२; मर्कूस १:१६-२०

1 मिनु काबु येसुमी गेनेसरेथ समुन्द्र आ नेक्था जाक्दीश्शा, मुर आन कली परमप्रभु यावे आ लोत्र शेंदीमी बाक्त। मुरपुकीमी येसु कली डी डा चूमे बाक्त।

2 मिनु समुन्द्र आ शुइचम डोंगा निक्शी तवा बाक्त। डांइ रेण्बपुकी डोंगा रे तोइश्शा आन ग्याइली मुरना मुरन बाक्मा बाक्त।

3 मिनु डोंगा का डोंइसे बाक्त। मेको डोंगा सिमोन के बाक्माक्त। मिनु येसुमी सिमोन कली “डोंगा इच्का आइक्की लतो” दे मदा बाक्त। मिनु मोपा डोंगाम बाक्शा मुर आन कली शेंदीमी बाक्त।

4 मिनु शेंने थुम्शा, सिमोन कली “ब्वाक्कु आ दातेम जाक्दीश्शा, डांइ रेट्चा कली ग्याइली आपो” देंमाक्त। यूहन्ना २१:६

5 मिनु सिमोनमी “शेंब, नाकदो रे श्येत पा ग्याइली आप्ना आप्न बाक्तक। डांइ का यो मरे। मुल ‘गे आपो’ देंतीनी हना, गो आप्नुड” देंमाक्त।

6 मिनु ग्याइली आबानु, शुश डांइ रेशशा, ग्याइल गाकचा गोवा बाक्त।

7 मिनु ग्याइली गाकथ्री पा डांइ रेशशो तशा, आ वारच आस कली “ए, एक जाकशा, वारच पसे” दे ब्रेशशा, डोंगा निम्फा डांइम प्रिंदमे बाक्त। मिनु डोंगा हेल्शा, ब्वाक्कुम ग्रुम्या चिकता बाक्त।

8 मिनु सिमोन पत्रुसमी मो दुमशो तशा, येसु आ डोंइती पोक्च थेक्शा बाप्शा “प्रभु, गो पापी मुर नड। गे नु काथा बाकचा मशिरनुड” देंमाक्त। लूका १८:१३

9 मारदे हना सिमोन नु मेको नु बाक्ब नेल्ले मिश डा डांइ रेशशो तशा, छक लाकमा बाक्त।

10 जबदी आ तौ याकूब नु यूहन्ना यो छक लाकसा बाक्त। मिनु येसुमी सिमोन कली “महिनो। मुल डा मेरे मुर रेप्ब दुम्नेवे” दे मदा बाक्त।

11 मिनु डोंगा ग्रुंइशा, तोइशशा, सिमोन, याकूब नु यूहन्ना सांफामी आन गेय नेल्ल प्रोंइशा, येसु आ नोले खोइशशा, आ शेंसीब दुम्मा बाक्त।

कोव्रर पाइब कली सापाइशशो

मत्ती ८:१-४; मर्कूस १:४०-४५

12 मिनु काबु येसु आ शेंसीबपुकी नु सहर कामी बाक्मेनु, कोव्रर पाइब मुर का कली ग्रुमा बाक्त। मिनु मेको कोव्रर पाइबमी येसु कली तशा, आ डोंइती बाप्शा “प्रभु, सापाइक्चा दाक्ताक्नी हना, आं कली सापाइक्चे चाप्नीनी” देंमाक्त।

13 मिनु येसुमी कोव्रर पाइब कली थिशा “गो सापाइक्चा दाक्नुड” देंमेनु, मेको कोव्रर पशो मुर सामाक्त।

14 मिनु येसुमी “एको लोव्र सुइ कली मदेंचा। चढेब आ डोंइती लशा, इ साशो रां कोंइदो। मिनु मोसामी मार चढेचा माल्ब देंशो



बाक्मे, मेको चढेशा, साती, दे तुइक्पतो” दे माइश्शा, सोइक्ता बाक्त। लेवी १४:२-३२

15 सुइ कली मदेंचा देंशो बाक्त हना यो, शुश मुरुमी येसु आ पर्बम लोव्र पामे बाक्त। रागी नेल्लेम मेको लोव्र ब्रमाक्त। येसु आ लोव्र नेंचा कली नु रोइ रे साचा कली शुश मुर येसु आ बाक्तीकेम जाक्मा बाक्त।

16 तन्न येसु मेकोपुकी नु ब्राशा, सुइ मबाक्तीकेम लशा, परमप्रभु यावे कली प्रार्थना पवा बाक्त। मर्कूस १:३५

गुइ खोइल मदुक्ब कली सापाइश्शो

मत्ती ९:१-८; मर्कूस २:१-१२

17 काबु येसुमी शेंना शेंन बाक्मेनु, गालील रागी, यहूदीया रागी, नु यरूसलेम सहर रे जाक्शो फरिसी नु अरेशो लोव्र शेंबपुकी देल्शा, येसु आ नेक्था निस्समा बाक्त। परमप्रभु आ सापाइक्तीक सक्ति येसु नु बाक्माक्त।

18 मेना मुरपुकीमी आ गुइ खोइल मदुक्ब मुर का कली ब्राख्येम कुरशा चाक्मे बाक्त। चाक्बपुकीम मेको कली येसु आ डोंइती चाक्दीत्चा, दे मिम्तमे बाक्त।

19 तन्न शुश मुर देल्टीके येसु आ नेक्था चाक्दीन्ने मचाप्मे बाक्त। मिनु खिं डोइश्शा, साप्शो फुल्लु याक्शा, रोइ पाइब आ ब्राख्ये आ एर ओंथ डोरीम फ्रेंशा, मेको कली ओंखां पा तोक्शा, येसु आ डोंइती वोदमे बाक्त।

20 मिनु येसुमी मेको आन थमा सुइक्शो तुइश्शा, मेको कली “आं वारच, इ पाप क्याम्शा गेतन” दे मदा बाक्त।

21 मिनु फरिसी नु सास्त्रीपुकीमी “ओदेंशो शुक्शी लोव्र पाइब सु बाक्म? परमप्रभु यावेमी ला पाप क्याम्ने चाप्ब” दे मिम्तमे बाक्त। फरिसी रिती थिती सेल्शा, रिम्शो पचा कली कोव्रब यो बाक्शो बाक्तेक्म। सास्त्री यहूदी आन कली परमप्रभु यावे आ अरेशो लोव्र

शेंब बाक्शो बाक्तेकम। लूका ७:४९; भजन संग्रह १३०:४; यसैया ४३:२५

22 मिनु येसुमी मेको आन मिम्शो तुइश्शा, मेको आन कली “मारदे इन थुंम मोदेशो मिम्तीनी?

23 इ पाप क्याम्शा गेतन देंचा देय छुल बोक्शा, एर ओंथ हिरशा कोंइदो देंचा तेको रिम्शो बाक्बा?

24 रागीम जरमेशोमी, पाप क्याम्चा कली अधिकार तशो बाक्ब, दे गेपुकीमी यो तुइक्तीन” दे गुइ खोइल मदुक्ब कली “छुल बोक्शा, इ ब्राख्ये कुरशा, इ खिं लावो” दे मदा बाक्त। यूहन्ना ५:३६

25 मो देंमेनु, मेको मुर छुल बोक्शा, आ ब्राख्ये कुरशा, परमप्रभु यावे कली ठेयब सेल्ना सेल्न आ खिं लमाक्त।

26 मेको चिन्ड तशा, मुर नेल्ले छक लाक्शा, परमप्रभु यावे कली ठेयब सेल्शा, मान पा हिंशा “डोंइती गेनायो मतशो ताइतय” देंमुमा बाक्त।

लेवी कली ब्रेशो

मत्ती ९:९-१३; मर्कूस २:१३-१७

27 मिनु मेकेर रे लशा, येसुमी तिरो पोक्ब लेवी नें पाइश्शो मुर का आ गेय पतीकेमी बाक्शो तशा “आं नोले खोइय्यी” दे मदा बाक्त।

28 मिनु मेकोमी आ गेय प्रोंइशा, येसु आ नोले खोदा बाक्त।

29 मिनु लेवीमी येसु कली मान पा थुल्चा, दे जचा तूचा सेला बाक्त। मिनु मेको नु तिरो पोक्ब, आ वारच नु अरु मुर यो जथ बाक्मा बाक्त। लूका १५:१

30 मिनु फरिसी नु सास्त्रीपुकीमी मेको आन कली काथा बाक्शो तशा, आन थुं मनुथु येसु आ शेंसीब आन कली “मारदे गे तिरो पोक्ब नु पापीपुकी नु काथा बाक्शा जाइनीनी?” देंमा बाक्त।

31 मिनु येसुमी मेको आन लोव्र तुइश्शा “रोइ मपाइब आन कली डाक्टर ममाल्नीम। तन्न रोइ पाइब आन कली डाक्टर माल्नीम।

32 ठीक पाइब आन कली ब्रेथ जाकशो मनड। तन्न पापी आन कली 'इन थुं परमप्रभु यावे गे लेत्तीन' दे ब्रेथ जाकशो नड" दे माइक्मी बाक्त।

माइजा बाक्चा आ पर्वम शेंशो

मत्ती ९:१४-१७; मर्कूस २:१८-२२

33 मिनु मेकोपुकीमी "यूहन्ना आ शेंसीबपुकी नु फरिसी आन शेंसीबपुकी शुश माइजा बाक्शा, प्रार्थना पाइनीम। तन्न इन शेंसीबपुकी माइजा मबाक्थु, जाइनीम तूनीम" देंमा बाक्त।

34 मिनु येसुमी मेको आन कली "ग्युम्ले नु काथा बाक्मानु, जन्ती आन कली माइजा बाक्पाइक्ने चाप्नीनी डा?

35 काबु ग्युम्ले लाइक्चा पुंइसीब। मेना माइजा बाक्नीम" दे माइक्मी बाक्त।

36 मिनु येसुमी मेको आन कली "सुइमी नक वा खाक्शा, माइत वाम मक्येप्नीम। मो पाम्तेक्म हना, नक वा मरिम्शो दुम्बा ममाइ? नक वा माइत वा तार क्येप्चा मगारब।

37 सुइमी माइत कुशुल के थैलोमी नक अडगुर शांबु कुर मपाइनीम। कुर पाम्तेक्म हना, नक अडगुर शांबु बोरशा थैलो बुक्ब। मिनु अडगुर शांबु क्युप्ब। मेको थैलो यो खतम दुम्ब।

38 नक शांबु नक थैलोमी कुर पचा माल्ब।

39 कशो शांबु तूशा बानी दुम्शोमी जीजी शांबु मदाक्नीम, मेकोमी 'कशो ला ब्रोत्रब' देंब" दे कथा का देंमाक्त।

## 6

नाइक्तीक नाक्ती

मत्ती १२:१-८; मर्कूस २:२३-२८

1 मिनु काबु नाइक्तीक नाक्ती येसु नु आ शेंसीबपुकी चेरब रू लां रे पा गाक्मानु, शेंसीबपुकीमी चेरब बाला शोइश्शा, नोकशा जामे बाक्त। लूका १३:१०-१७; लूका १४:१-६

2 मिनु फरिसीपुकीमी मेको आन कली चेरब जशो तशा “नाइक्तीक नाक्ती पचा मदुम्ब गेय, मारदे पाइनीमी?” दे आन थुं मनुथु लोत्र पामे बाक्त।

3 मिनु येसुमी “दाऊद नु आ वारचपुकी शोत्रलु बेक्मानु, मार पामे, परमप्रभु यावेमी ब्रेक्पाइशो लोत्र मपढेनी? १सामुएल २१:७

4 दोपा दाऊदमी परमप्रभु यावे आ खिंमी ओत्रशा, परमप्रभु यावे आ डोंइती कोंइतीक शोब्ले शोल्शा योक्शा जामे? मेको शोब्ले चढेबपुकीम ला जाइनीमी, ममाइ? अरु मुरपुकीमी जचा मदुम्बा, ममाइ डा?” दे माइक्मी बाक्त। लेवी २४:९

5 मिनु येसुमी “रागीम जरमेशो दा नाइक्तीक नाक्ती मार पचा, मार मपचा मेको नेल्ल देंब बाक्ब” देंमाक्त।

गुइ सोत्रशो कली सापाइशो

मत्ती १२:९-१४; मर्कूस ३:१-६

6 मिनु अर्को नाइक्तीक नाक्ती येसुम गुम्तीक खिंमी शेंदानु, मेकेर आ ग्युरा गुइ सोत्रशो मुर का बाक्माक्त।

7 मिनु सास्त्री नु फरिसीपुकीमी “नाइक्तीक नाक्ती सापाइक्चा गेय पाइबा को?” दे योत्रकी पा कोत्रडमे बाक्त। मारदे हना येसु कली दोस गेचा माल्शो बाक्मा बाक्त।

8 मिनु येसुमी मेको आन मिम्शो तुइशशा, आ गुइ सोत्रशो मुर कली “एक पिशा, राप्शा बाक्को” दे मदा बाक्त। मिनु मेको छुल बोक्शा राम्माक्त।

9 मिनु येसुमी योत्रकी पाइब आन कली “लोत्र का हिल्लो पाइनन्नी, नाइक्तीक नाक्ती शिशी पचा देय मरिम्शो गेय पचा? ब्रोंइचा गेचा देय बेक्चा गेचा? अरेशो लोत्रम मार देंबा?” दे हिल्लो पवा बाक्त।

10 मिनु मेकेर बाक्ब आन कली मिक्च मयाक्थु, कोत्रशा, गुइ सोत्रशो कली “इ गुइ दिंदो” दे मदा बाक्त। मिनु मेकोमी गुइ दिंसेनु, सामाक्त।

11 मिनु योत्रकी पाइबपुकी चुरशा “मेको कली मार पय?” दे लोत्र पमुमा बाक्त।

येसुमी आ १२ जना शेंसीब योव्रशो

मत्ती १०:१-४; मर्कूस ३:१३-१९

12 काबु येसु डांडा का डोइश्शा, नाकदो रे परमप्रभु यावे कली प्रार्थना पवा बाकत। मर्कूस १:३५

13 मिनु आ दीसा नां सौव्रशा, आ नोले खोइक्ब आन कली गुम्शा, १२ जना आन कली योव्रमी बाकत। योव्रशो आन कली “सोइश्शो” दे नें वोदा बाकत। मत्ती १०:२-४; प्रेरित १:१३

14 मेको १२ जना सु सु बाक्मा बाकत देशा हना, सिमोन, मेको कली पत्रुस यो देंनीम। सिमोन आ लोकब अन्द्रीयास, याकूब, यूहन्ना, फिलीप, बारथोलोमाइ,

15 मत्ती, थोमास, अल्फयस आ तौ याकूब, सिमोन, मेको कली कनानी यो देंनीम,

16 याकूब आ तौ यहूदा नु इस्कारीयोत डा यहूदा बाक्मा बाकत। इस्कारीयोत डा यहूदा चहिं नोले येसु कली साइक्चा, दे माल्ब आन कली वारच पाइब दुम्बाक्माकत।

दिंमम शुश मुर सापाइश्शो

17 मेको मुर आन कली योव्रशा, डांडा रे यिमा बाकत। मिनु ठेयब दिंमम जाक्दीश्शा बाक्मानु, येसु आ लोव्र नेंथ एर ओंथ रे शुश मुर खुम्सीशा देल्मा बाकत। मेकोपुकी यहूदीया रागी, यरूसलेम सहर, टायर नु सीदोन सहर एर ओंथ रे जाक्शो बाक्मा बाकत।

18 का निक्शी येसु आ लोव्र नेंथ जाक्मा बाकत। का निक्शी आन रोइ सापाइसीथ जाक्मा बाकत। मिनु वोलम तशो मुरपुकी यो जाक्शा, सामा बाकत।

19 रोइ पाइबपुकीमी येसु कली थिचा माल्मे बाकत। मारदे हना येसु आ सक्तिम मेको नेल्ल आन रोइ साबाक्मा बाकत।

ग्येरसीने, दे शेंशो

मर्कूस ५:३-१२

20 मिनु येसुमी शेंसीब आन कली कोव्रशा “गे पुडग मुर, ग्येरसीने। मारदे हना परमप्रभु यावे आ राज्य इन के बाक्ब। याकूब २:५

21 मुल जचा मतथु बाक्बपुकी, ग्येरसीने, मारदे हना परमप्रभु यावेमी इन कली रूथ्री जचा गेब। मुल श्येत जशा, डाक्न डाक्न बाक्शोपुकी, ग्येरसीने। मारदे हना नोले ग्येरसीशा बाक्चा ताइनीनी। प्रकाश ७:१६-१७

22 मुरुमी इन कली आं पर्वम काइ मदाक्थु, खेरशा हेला पामेनु, रागीम जरमेशो आ पर्वम इन कली दिप्मेनु, गे शुश ग्येरसीन। यूहन्ना १५:१८-१९

23 मेको नाक्ती थाम्पा ग्येरसीने। मारदे हना परमप्रभु यावेमी इन कली स्वर्गम इनाम गेब। इन कली श्येत गेब आन किकी पिपीमी साइ रे परमप्रभु यावे आ लोव्र पाइब आन कली यो खेदा पा श्येत गेशो बाक्तेक्म।

### हिनीन, दे शेंशो

24 गे शुश शोप पाइशोपुकी, हिनीन। मारदे हना इन तशो रिम्शो नेल्ल थुम्तीनी। मत्ती १९:२३; याकूब ५:१

25 मुल शुश जचा ताइबपुकी, हिनीन। मारदे हना नोले जचा मतथु शोव्रलु बेक्नीनी। मुल रिशशा बाक्बपुकी, हिनीन। मारदे हना नोले डाक्शा रोंका पचा माल्नीनी।

26 मुल मुरपुकी रे पा मान पाइक्चा पुंडसीशोपुकी, हिनीन। मारदे हना इन किकी पिपीमी यो जोल पा परमप्रभु यावे आ लोव्र पाइब आन कली मो पाइक्बाक्तेक्म” देंत।

### इन कली मदाक्ब कली दाक्तीन

मत्ती ५:३९-४८

27 मिनु “आं लोव्र नेंबपुकी, नोफा दाइशशा नेनीन, इन जोरी सत्रु आन कली दाक्तीने। इन कली काइ मदाक्ब आन कली दाक्तीने।

28 इन कली सराप चीले पाइब आन कली आसीक गेने। इन कली शुक्शी पाइब आन पर्वम परमप्रभु यावे कली पुंडदीने। १कोरिन्थी ४:१२

29 इन चोव्रचो का राण्व आन कली अर्को चोव्रचो यो राण्चा गेने। इन दौरा लाइक्ब आन कली भोटो यो प्रुइश्शा गेने।

30 सुइमी गे नु बाक्शो थोव्रकी पुंडतु हना, गेने। सुइमी गे नु बाक्शो थोव्रकी लाइक्तु हना, पितो, दे मपुनीन।

31 गेमी दोदेशो पचा पुंडसीचा दाक्नीनी, गे यो मुर आन कली मोदेशो पने। मत्ती ७:१२

32 इन कली दाक्ब आन कली ला दाक्ताक्नी हना, मार रिम्शो पनी डा? पापीपुकीमी यो आम कली दाक्ब कली दाक्नीम।

33 इन कली रिम्शो पाइब आन कली ला रिम्शो पाइतीनी हना, मार रिम्शो पनी डा? पापीपुकीमी यो रिम्शो पाइब कली रिम्शो पाइनीम।

34 इन कली थाम्ने चाण्व आन कली ला जेर गेतीनी हना, मार रिम्शो पनी डा? पापीपुकीमी यो लेंशा ताक्चा कली मोदेशो पाइनीम। ब्यवस्था १५:५-८

35 इन जोरी सत्रु आन कली दाक्तीन। वारच पने। लेंशा ताक्चा ममिम्थु जेर गेने। मो पाइतीनी हना, गे ठेयब इनाम ताइनीनी। मिनु नेल्ल क्येडा ठेयब आ मुर दुम्नीनी। मारदे हना 'रिम्शो पाइतीनी' मदेंब नु आ अरेशो मटीब आन कली रिम्शो पाइब।

36 दोपा इन आफोमी शिशी पवा, मोपा गेपुकीमी यो शिशी पने" देंमाक्त।

मुर आन कली मनाक्चा

मत्ती ७:१-५

37 मिनु येसुमी "मुर आन कली मनाक्तीने। मिनु इन कली मनाक्नीम। दोस मगेने। मिनु गे यो दोस मताइनीनी। माफ गेने, मिनु गे यो माफ गेचा पुंडसीनीनी। मत्ती ६:१४

38 अरु आन कली मार मार माल्मा, मेको गेने। हाइश्शो दुम्शा गेतीनी हना, गे यो क्युप्चा डा पा प्रिंशा ताइनीनी। दोपा पुक्शा गेनी, मोपा पुक्शा ताइनीनी" दे शेंदीमी बाक्त। मर्कूस ४:२४

39 मिनु येसुमी कथा सेल्शा “मिक्च मताइबमी मिक्च मताइब कली लां कोइने चाण्ब डा? लांमी खाल्टा बाक्त हना, निम्फा खाल्टाम मबिक्नीसी डा? मत्ती १५:१४

40 शेंब क्येडा शेंसीब ठेयब मनम। तन्न शेंसीबमी शुश शेंसीशा आ शेंब खोदेशो दुम्ब। मत्ती १०:२४-२५; यूहन्ना १५:२०

41 मारदे इन लोकब आ मिक्चीम बाक्शो कसीडगर ताइनीनी। मिनु इन मिक्चीम बाक्शो मुढा चहिं मताइनीनी?

42 इन मिक्चीम मुढा बाक्त हना, दोपा इन लोकब कली ‘आं लोकब, इ मिक्चीम बाक्शो कसीडगर फेत्नुड’ देने चाप्नीनी डा? गे कपटी, डोंइती इन मिक्चीम बाक्शो मुढा फेत्तीने। मिनु मिक्च ठीक ताइब दुम्शा ला, इन लोकब आ मिक्चीम बाक्शो कसीडगर फेन्ने चाप्नीनी।

रिम्शो रवाम रिम्शो फल सिण्ब  
मत्ती १२:३३-३५

43 रिम्शो फल रवाम मरिम्शो फल मसिण्ब। मरिम्शो रवामी यो रिम्शो फल मसिण्ब। मत्ती ७:१६-१८

44 फल थाम्शा, रिम्शो रवा नु मरिम्शो रवा तुंइसीब। चू बोटमी फोत्रशी मसिण्ब। खुमीच आ बोटमी अडगुर मसिण्ब।

45 रिम्शो थुं पाइशो मुरुमी रिम्शो पाइब। पापम ब्रीशो थुं पाइशो मुरुमी चहिं मरिम्शो पाइब। मुर आन थुंमी मार बाक्मे, मेको आन लोत्र नेंशा रिम्शो देय मरिम्शो मेको तुंइसीब। मारदे हना थुंम मार बाक्मे, मेको शोत्र रे गूब।

खिं रे पा शेंतीक

46 मारदे आं कली प्रभु, प्रभु, देंनीनी। तन्न आं देशो मटीनीनी? मलाकी १:६; मत्ती ७:२१

47 सुम आं लोत्र नेंशा टीबा, मेको दोदेशो मुर दुम्बा, मेको गो इन कली माइक्नन्नी।



48 मेकोमी खिं सेलानु, जग दोशा, सेरथे फुल्लु तारी सेल्ब। मिनु रेउ यिशा भोल यिमेनु, मेको खिं मब्रेण्ब। मारदे हना जग बोल्यो पा सेल्शो बाक्ब।

49 सुमी आं लोव्र नेंशा मपाइबा, मेकोमी खिं सेलानु, जग मदोथु सेल्ब। मिनु रेउ यिमेनु, मेको खिं नेल्ल ब्रेशशा भोलम योल्ब” दे शेंदीमी बाक्त।

## 7

कप्तान आ गेय पाइब सापाइशो  
मत्ती ८:५-१३; यूहन्ना ४:४६-५३

1 मिनु लोव्र शेंने थुम्शा, मेकेर रे लशा, कापेरनाउम सहरम जाक्दीम्माक्त।

2 मेकेर रोमी कप्तान का बाक्माक्त। मेको आ दाक्शो वाइल का रोइ पा बेक्चशो बाक्माक्त।

3 मिनु मेको कप्तानमी येसु आ पर्बम लोव्र पशो नेंशा, यहूदी आन जोक्ब तुइक्ब खाल्पा आन कली येसु ब्रथ सोइक्तीमी बाक्त। मेको आन कली “येसु एक पिशा, ‘आं वाइल कली सापतीन’ दे पुनीने” देंमाक्त।

4 मिनु मेकोपुकी येसु आ बाक्तीकेम जाक्शा, येसु कली “मेको कप्तान कली वारच पचा कली शिरशो बाक्ब।

5 मारदे हना मेकोमी यहूदी इं कली दाक्ब। मिनु इं गुम्तीक खिं यो सेल्पाइक्तु” दे येसु कली देंमा बाक्त।

6 मिनु येसु मेकोपुकी नु लमाक्त। मिनु कप्तान आ खिं आ नेक्था जाक्दीम्मेनु, कप्तानमी आ वारच आन कली येसु कली लोव्र पथ सोइक्ता बाक्त। मेकोपुकीमी येसु कली “प्रभु, श्येत मपने। गो इन कली आं खिंम ओइचा मशिरनुड।

7 मोपतीके गो इन कली गुम्थ मपिड। गे सापाइक्तीक लोव्र का ला पने। मिनु आं वाइल साब।

8 गो यो अधिकार पाइशशो मुर बाक्नुड। लडाइ पाइबपुकीम आं कली टीनीम। गो का कली 'लावो' देंती हना, मेको लाइब। मिनु अर्को कली 'पिवो' देंती हना, पीब। आं वाइल कली 'मेको गेय पावो' देंती हना, मेकोमी पाइब" दे माइक्थ सोइक्ता बाक्त।

9 मिनु येसुमी मेको लोत्र नेशा छक लाक्माक्त। मिनु आ नोले खोइक्ब आन कली हिरशा कोत्रशा "गो इस्राएली आन दातेमी मेको कप्तान खोदेंशो थमा सुइक्ब मुर सुइ मतडमी" देंमाक्त।

10 मिनु मेको सोइशशो मुर खिं लेशशा जाक्मानु, वाइल साने थुम्शो तामे बाक्त।

### बेक्शो मुर कली सेंपाइशशो

11 इच्का नाक्त नोले येसु नाइन सहर गे लमाक्त। आ शेंसीबपुकी नु शुश मुर यो मेको नु लमा बाक्त।

12 मिनु सहर डा ठेयब लाप्चो आ नेक्था जाक्दीम्मानु, मुरपुकीमी बेक्शो मुर का कुरशा पिशो तामे बाक्त। मेको वोंइश बेक्शो मीश मुर आ कांइचीक तौ बाक्माक्त। मेको मीश मुर नु सहर डा शुश मुर मलामी लशो बाक्मा बाक्त।

13 मिनु येसुमी मेको कली तशा, शिशी पा "मडाक्को" देंमाक्त।

14 मिनु बेक्शो मुर कुरशो पला थिवानु, कुरबपुकी खा दिक्मा बाक्त। मिनु मेकोमी "ए ठिटा, गो इ कली सेंसीशा बोक्को देंनुड" देंमाक्त। मर्कूस ५:४१

15 मिनु बेक्शो मुर बोक्शा निश्शा, लोत्र पचा गोवा बाक्त। मोपा सेंपाइशशा, आ ममा कली गेवा बाक्त। १राजा १७:२३; २राजा ४:३६

16 मिनु मुरपुकी मोदेंशो दुम्शो तशा, हिंमा बाक्त। मिनु मेकोपुकीमी परमप्रभु यावे कली ठेयब सेल्शा "इं दातेमी परमप्रभु यावे आ लोत्र पा छक लाक्चा डा गेय पाइब का ग्रूमाक्त। परमप्रभु यावेम इं कली थमा पा शिशी पाइक्बाक्त" देमा बाक्त। मत्ती १६:१४; लूका १:६८

17 मिनु यहूदीया नु एर ओंथ डा रागी नेल्लेमी मेको लोत्र ब्रमाक्त।

यूहन्नामी दल्गीर पशो

मत्ती ११:२-६

18 मिनु यूहन्ना आ शेंसीबपुकीमी यो मेको लोव्र नेंशा, यूहन्ना कली शेंदमे बाक्त। मिनु यूहन्नामी आ शेंसीब निक्शी आस कली ब्रेशशा

19 “जाक्चा माल्शो गेन ननी देय अर्को आ लां कोव्रक? दे प्रभु कली हिल्लो पथ लसे” दे सोइक्तीम्सी बाक्त।

20 मिनु मेको निक्शी येसु आ बाक्तीके जाक्शा “ब्वाक्कुम खुम्शा गुंडब यूहन्नामी सोइश्शो मुर नस्कु। जाक्चा माल्शो गेन ननी देय अर्को आ लां कोव्रक? दे हिल्लो पथ सोइक्ताक्स्की” देंसा बाक्त।

21 मेको निक्शी जाक्सानु, येसुमी शुश रोइ पाइब मुर आन कली सापाइक्ना पाइक्न बाक्शो बाक्माक्त। बेक्चा डा रोइ पशो, वोल्म सुम्शो मुर आन वोल् खेरना खेरन बाक्माक्त। मिक्च मताइब आन कली मिक्च तपाइक्ना पाइक्न बाक्माक्त।

22 मिनु येसुमी यूहन्ना आ शेंसीब आस कली “मार मार तसी, मार मार नेंसी, मेको नेल्ल यूहन्ना कली मतीसे। मिक्च मताइब मिक्च ताइबाक्तेक्म। खोइल मदुक्ब गाक्बाक्तेक्म। कोव्रर पाइब साबाक्तेक्म। नोफा मनेंबम नेंबाक्तेक्म। बेक्शो मुर बेक्शो रे सेंसीशा ब्रोंइबाक्तेक्म। मिनु महिक्सीशो मुरपुकी ग्येरपाइक्ब लोव्र नेंपांडसीबाक्तेक्म।

23 सु सुमी आं कली तशा, आन थुं मखाइक्पाइक्नीमी, दल्गीर मपाइनीमी, मेको ग्येरसमल, दे मतीसे” दे सोइक्तीम्सी बाक्त।

यूहन्ना आ पर्बम शेंशो

मत्ती ११:७-१९

24 मिनु यूहन्नामी सोइश्शो मुर गाक्सा नोले, येसुमी मुर आन कली यूहन्ना आ पर्बम “साइ गोरशो रागीमी मार कोव्रथ लनी? फशेम हिम्शो किन्दा कोव्रथ लनी?

25 दारशो वा फेक्शो मुर तांडसीबा कों, दे कोव्रथ लनी? दारदारशो वा फेक्शो नु शोप पाइश्शो मुर पिप आन बाक्तीकेमी बाक्नीम।

26 मार कोव्रथ लनी, मिनु? परमप्रभु यावे आ लोव्र पाइब तांडसीबा कों, दे कोव्रथ लनी? गे परमप्रभु यावे आ लोव्र पाइब नेल्ल आन क्येडा ठेयब मुर ताइतीनी। लूका १:७६

27 परमप्रभु यावेमी ब्रेक्पाइश्शो लोव्रमी मेको आ पर्वम 'गो आं लोव्र कुरब इ डोंइडोंइती सोइक्नुड। मेकोमी इ लां ठीक सेल्ब' दे ब्रेक्शो बाक्ब। मलाकी ३:१

28 रागी नेल्लेम यूहन्ना खोदेशो ठेयब सुइ मबाक्ब। परमप्रभु यावे आ राज्यमी नेल्ल क्येडा आइक्च चहिं यूहन्ना क्येडा ठेयब बाक्ब" दे शेंदीमी बाक्त। लूका १:१५

29 आ लोव्र नेंबपुकी नु तिरो पोक्ब का निक्शीमी डोंइती यूहन्ना आ लोव्र नेंशा "परमप्रभु यावे आ देशो ठीक बाक्माक्त" दे मिम्तमे बाक्त। मारदे हना मेको ब्वाक्कुम खुम्शा गुंडपांडसीशो बाक्मा बाक्त। लूका ३:७,१२; मत्ती २१:३२

30 फरिसी नु सास्त्रीपुकीमी चहिं यूहन्ना आ लोव्र नेंशा "ब्वाक्कुम मखुम्पांडसीनीकी" दे परमप्रभु यावे कली थमा मसुइक्थु बाक्मा बाक्त। मेकोपुकीमी परमप्रभु आ पावो, दे देशो लोव्र मपामे बाक्त। प्रेरित १३:४६

31 मेको आन कली येसुमी "एको पाला डा मुर दोदेशो नु सु खोदेशो नमी?

32 मेकोपुकी बजारम बाक्ब आलपुकी खोदेशो बाक्नीमी। हुल कामी अर्को हुल कली 'गो बासुरी ताप्कानु, गे सिल मपनी। गो हिशेक पा डाक्कानु, गे मडाक्नी' दे ब्रेम्मुइनीम।

33 यूहन्नामी माइजा बाक्शा, शांबु राकसी मतूडानु 'वोलम सुम्शो बाक्माक्त' दे मरिम्शो सुइक्तीनी। मत्ती ३:४

34 रागीम जरमेशोमी चहिं जचा तूचा थोव्रकी नेल्ल जाइब तूब।

मेको कली तशा ‘धोक्त्रे, शांबु राकसीमी दुक्ब, क्येट पोक्ब नु पापी आन वारच बाक्माक्त’ देशा, मरिम्शो सुइक्तीनी। लूका १५:२

35 परमप्रभु यावे आ तुइक्तीके आ नोले खोइक्बम ला तुइक्ने चाप्नीम” दे माइक्मी बाक्त। १कोरिन्थी १:२४-३०

### येसुमी फरिसी आ खिंम जशो

36 काबु फरिसी कामी येसु कली खमे जथ ब्रेत्ता बाक्त। मिनु येसु मेको आ खिंम लशा, खमे जचा कली निस्से बाक्त। लूका ११:३

37 मिनु सहर डा मीश मुर का यो बाक्माक्त। मेको तेल्लेम बाक्माक्त। मेकोमी येसु मेको फरिसी आ खिंमी जाक्शो बाक्ब, दे नेंशा, ब्रोव्रशो रिना पाइश्शो तेल कुरशा, जाक्माक्त। मर्कूस १४:३

38 मेको येसु आ खोइलीम बाक्शा डाक्माक्त। मिनु आ प्रेक्कुम येसु आ खोइल जिप्पाइश्शा, आ चांमी फिक्गा बाक्त। मिनु आ खोइल पुक्पु पा मेको तेल खेक्ता बाक्त।

39 मिनु फरिसीमी मो पशो तशा “येसु परमप्रभु यावे आ लोव्र पाइब बाक्त हना, आ कली थीब मीश मुर दोदेशो बाक्म, दे तुइक्त वा। मारदे हना पापी बाक्ब” दे मिम्ता बाक्त।

40 मिनु येसुमी फरिसी कली “ए सिमोन, गो इ कली लोव्र का पाइनुड” देंमाक्त। मिनु मेकोमी “शेंब, मार देंनीनी?” देंमेनु

41 येसुमी “साइ होव्रप का के जेर लाइक्ब मुर निक्शी बाक्सा बाक्त। कामी ५ सहे देनार जेर थुइश्शो बाक्माक्त। कामी ५० देनार जेर थुइश्शो बाक्माक्त। इस्राएल डा क्येट देनार का नाक्त का डा गाल्च बाक्त।

42 मिनु निम्फामी थाप्ने मचाप्सेनु, होव्रपमी निम्फा आस कली प्रोइदीम्सी बाक्त। मुल तेकोमी होव्रप कली शुश दाक्बा?” दे हिल्लो पवा बाक्त।

43 मिनु सिमोनमी “शुश जेर थुइश्शोमी शुश दाक्ब, दे मिम्ताक्ड” देंमाक्त। मिनु येसुमी “ठीक देंते” देशा,

44 मीश मुर कली कोत्रशा, सिमोन कली “एको मीश मुर कली तवी? गो इ खिंमी जाक्डानु, आं खोइल चिक्चा कली ब्वाक्कु मगेयी। एकोमी दा आं खोइल आ प्रेक्कुम जिप्पाइशशा, आ चांमी फिक्तु। उत्पत्ती १८:४

45 गो जाक्डानु, आं कली मुप्शा पुक्पु मपाइय्यी। एकोमी दा इ खिंम बाक्डा रे आं खोइल पुक्पु पना पन बाक्ब। रोमी १६:१६

46 गेमी आं पियाम तेल मखेक्ती। एकोमी दा आं खोइलीम तेल खेक्ताक्यी।

47 मोपतीके एको के शुश पाप नेल्ल क्याम्साक्व। मारदे हना एकोमी शुश आ दाक्तीके कोंइताक्व। सु के पाप इच्का ला क्याम्से, मेकोमी इच्का ला दाक्ब” दे मदा बाक्त।

48 मिनु मीश मुर कली “इ पाप क्याम्साक्व” दे मदा बाक्त।

49 मिनु येसु नु काथा जाइबपुकीमी “पाप क्याम्ने चाप्ब, एको सु बाक्म माइ?” देंमुमा बाक्त। लूका ५:२१

50 मिनु येसुमी मीश मुर कली “इ थमा सुइशशोमी पाप रे ब्रोंइते। इ थुं नाइशशा ग्येरशा बाक्को” देंशा सोइक्ता बाक्त। लूका ८:४८; लूका १७:१९; लूका १८:४२

## 8

येसु नु गाक्शा, वारच पाइबपुकी

1 मिनु नाक्त का निक्शी नोले येसु सहर सहर, गाउं गाउं हिरशा, परमप्रभु यावे आ राज्य डा ग्येरपाइक्ब लोत्र शेंना शेंन गाक्माक्त। मेको नु आ १२ जना शेंसीब यो बाक्मा बाक्त।

2 मेको नु मीश मुर का निक्शी यो बाक्मा बाक्त। मेको वोल गुंडशो नु रोइ रे साशो बाक्मा बाक्त। मेको आन दातेमी माग्दाला डा मरीयम बाक्माक्त। येसुमी मेको रे पा ७ ओटा वोल गुंडशो बाक्माक्त। यूहन्ना २०:१,११-१८

3 का हेरोद आ गेय पाइब कूजा आ मीश योअन्ना बाक्माक्त। का सुसन्ना बाक्माक्त। मिनु अरु मीश मुरपुकी यो बाक्मा बाक्त।

मेको मीश मुरपुकीमी आन बाकशो थोव्रक रे येसु नु आ शेंसीब आन कली मार मार माल्मा, मेको गेशा, वारच पाइक्बाक्मा बाक्त। मर्कूस १५:४०-४१

वांचेर शोक्शो कथा

मत्ती १३:१-९; मर्कूस ४:१-९

4 मिनु सहर सहर, गाउं गाउं रे शुश मुर जाक्शा, येसु आ बाक्तीकेम देल्मानु, मेकोमी कथा सेल्शा शेंदीमी बाक्त

5 “मुर का वांचेर शोक्थ लमाक्त। मिनु ब्वारानु, गेडा का निक्शी लांमी जुक्तमे बाक्त। मिनु मुर गाक्मानु, दिम्दमे बाक्त। मिनु चिक्बीम गुप्शा जामे बाक्त।

6 का निक्शी ग्याडग्रो खपम जुक्तमे बाक्त। मिनु वामा चोटी सिक्शो नु खप मतथु सोव्रशा बेक्मा बाक्त।

7 का निक्शी चू घारीम जुक्तमे बाक्त। मिनु चूम सुम्शा, कोल्चा मगेवा बाक्त।

8 मिनु का निक्शी रिम्शो खपीम जुक्शा वामा बाक्त। मिनु शुश ग्रेल्शा, गेडा का के सहे का गेडा सिम्मा बाक्त” दे शेंशा ठेयब सेंदा पा “सु के नोफा बाक्मे, मेकोमी नेनल” देंमाक्त।

कथा आ अर्थ हिल्लो पशो

मत्ती १३:१०-१७; मर्कूस ४:१०-१२

9 मिनु नोले आ शेंसीबपुकीमी “एको कथा आ अर्थ मार बाक्बा?” दे हिल्लो पामेनु,

10 येसुमी “इन कली परमप्रभु यावे आ राज्य आ पर्बम खुइश्शो लोव्र रुप्तीक थुं गेशो बाक्ब। अरु आन कली चहिं कथा सेल्शा शेंनुडमी। मिनु कोव्रशा यो मतामेक्ल, नेंशा यो मरुप्मेक्ल। यसैया ६:९-१०

कथा आ अर्थ शेंशो

मत्ती १३:१८-२३; मर्कूस ४:१३-२०

11 आं देंशो कथा आ अर्थ मार बाकब देंशा हना, मेको वांचेर परमप्रभु यावे आ लोव्न बाकब।

12 लांमी जुक्शो गेडा देंशो मुरपुकीमी परमप्रभु यावे आ लोव्न नेंनीम। तन्न सैतानमी मेको लोव्न प्रेंपाइक्ब। मोपा थमा मसुइक्नीम। मिनु पाप रे ब्रोंइचा मताइनीम।

13 ग्याडग्नो खपीम जुक्शो देंशो मुरपुकीमी परमप्रभु यावे आ लोव्न नेंशा, बिश्शा ग्येरसीनीम। तन्न शाक्श थोक्चा मतथु शुश मलीथु, थुं थाम्चा पुंडसमानु, थमा सुइक्चा प्रोंइनीम।

14 चू घारीम जुक्शो देंशो मुरपुकीमी परमप्रभु यावे आ लोव्न नेंशा, थुंम वोइक्नीम। तन्न नोले 'मार जचा, मार फेक्चा, दोपा शोंप पाइश्शो दुम्चा? दोपा गेय मपथु ग्येरशा बाक्चा तचा' दे मिम्शा, परमप्रभु यावे आ लोव्न कली सित्चा मगेनीम।

15 रिम्शो खपीम जुक्शो देंशो मुरपुकीमी परमप्रभु यावे आ लोव्न नेंशा, आन रिम्शो थुंमी वोइश्शा, मिम्शा बाक्मानु, मेको लोव्न आन थुंमी सिप्ब। प्रेरित १६:१४

बत्ती आ पर्वम शेंशो

मर्कूस ४:२१-२५

16 सुइमी बत्ती दाशा सुम्शा मवोइक्नीम। खाट आगाम यो मखुइक्नीम। खिं ओव्नब आन कली हाम्सो दुम्ल, दे नेल्लेम ततीकेम वोइक्नीम। मत्ती ५:१५

17 मुल खुइश्शो मारेइ मारेइ नेल्ल नोले तांडसीब। खुइश्शो लोव्न बाक्त हना यो, नोले नेल्लेम तुइक्नीम। मत्ती १०:२६; १कोरिन्थी ४:५

18 होस पा, रिम्शो पा नेनीन। मारदे हना रुप्बमी तेम्शा रुप्पाइक्चा पुंडसीब, मरुप्बम चहिं इक्का खोइ रुप्शो यो, रोइश्शा लाइक्चा पुंडसीब” दे शेंदीमी बाक्त। मत्ती २५:२९

येसु आ खिं डा मुर

मत्ती १२:४६-५०; मर्कूस ३:३१-३५



19 काबु येसु आ ममा नु आ लोकब जाकमा बाक्त। तन्न शुश मुर देल्लतीके येसु कली गुम्चा मतामे बाक्त।

20 मिनु मुर कामी “इन ममा नु इन लोकब इन कली गुम्थ जाकशा, लाङ्गाम रिम्शा बाक्नीम” देंमाक्त।

21 मिनु येसुमी “परमप्रभु यावे आ लोत्र नेंशा, टीबपुकी कका थमा डा आं ममा नु लोकब नम” दे माइक्मी बाक्त।

फश गिवार तेक्शो

मत्ती ८:२३-२७; मर्कूस ४:३५-४१

22 काबु येसु नु आ शेंसीबपुकी डोंगाम डोइश्शा “समुन्द्र शोक्शा, आइक्ची हांबु लय” दे लचा गोत्रमे बाक्त।

23 मिनु मोपा लमानु, येसु निन्द्रा पवा बाक्त। मिनु फश गिवार पचा गोवा बाक्त। मिनु डोंगामी ब्वाक्कु ओत्रशा, डोंगा गुम्चवा बाक्त।

24 मोपतीके शेंसीबपुकीम येसु कली पोक्शा “शेंब, शेंब! मुल बेक्चांडतय, है” दे हिंशा खिंखि पा देंमा बाक्त। मिनु येसु बोक्शा, फश गिवार नु छाल कली हुइक्ता बाक्त। मिनु फश गिवार नाइश्शा ब्वाक्कु यो खा दिक्माक्त। मिनु सिक्सी दुम्माक्त।

25 मिनु शेंसीब आन कली “इन थमा सुइक्तीक ते लम?” देंमाक्त। मेकोपुकी चहिं हिंशा, छक लाक्शा “फश गिवार नु ब्वाक्कुमी यो आ लोत्र टीबाक्तेक्म, एको सु बाक्म माइ?” दे लोत्र पमुमा बाक्त।

फौज माइश्शो वोल कली गुंइशो

मत्ती ८:२८-३४; मर्कूस ५:१-२०

26 मिनु समुन्द्र शोक्शा, गेरासीनी आन रागी जाक्दीम्मा बाक्त। गेरासीनी आन रागी चहिं गालील रागी क्येडा आइक्ची हांबुम बाक्माक्त।

27 मिनु जाक्दीश्शा, डोंगा रे तोइसामानु, वोलम सुम्शो मुर का सहर रे पिशा, येसु आ डोंइती जाक्माक्त। मेको मुर वोलम सुमा

रे शिश्ना गाक्शा, खिंमी मबाक्थु, बेक्शो मुर वोइक्तीकेमी बाक्शो बाक्माक्त। मोपा बाक्शो शुश बर्स दुम्शो बाक्माक्त।

28 मेकोमी येसु कली तशा, वाइ ब्रेशशा, आ डोंइती बाप्शा, ठेयब सेंदा पा “येसु, नेल्ल क्येडा ठेयब, आ तौ, गो मार पमुया डा? श्येत मगेयीनी, दे सेउ पाइनन्नी” देंमाक्त।

29 मारदे हना येसुमी प्रांग्रा दिचा डा वोल कली “गूडो” दे माइशो बाक्माक्त। डोंइती शुश खेयप वोलम मेको मुर कली सुमानु, मुरपुकीमी साडलोम पाइशशा चोक्शा वोइशो बाक्मा बाक्त। तन्न वोलम साडलो पुइक्पाइशशा, गोरशो रागीम चाक्दीशो बाक्माक्त।

30 मिनु मेको येसु आ डोंइती बाप्शा बाक्मेनु, येसुमी वोल कली “इ नें मारम?” दे हिल्लो पवानु, मेकोमी “फौज” देंमाक्त। मारदे हना मेको मुर आ रांमी शुश वोल ओव्रशो बाक्मा बाक्त।

31 मिनु वोलपुकीम “आंइ कली नरकम मसोइक्तीकी” दे पुन्मे बाक्त।

32 मेको डांडामी शुश पोव्र जोना जोन बाक्शो बाक्मा बाक्त। मिनु वोलपुकीमी “मेको पोव्र आन रांम ओव्रचा गेकी” दे पुन्मे बाक्त। मिनु येसुमी ओव्रचा गेमी बाक्त।

33 मिनु वोलपुकी मुर रे गूशा, पोव्रमी ओव्रमानु, पोव्र नेल्ल गशा रोंगु रे दोरशा थिशशा समुन्द्रम प्रेक्ना प्रेक्न बेक्मा बाक्त।

34 मिनु पोव्र योव्रबपुकीमी मो दुम्शो तशा प्रोक्शा, सहर नु सहर आ एर ओंथ नेल्ल मेको लोव्र शोव्रडमे बाक्त।

35 मिनु मुरपुकी मार दुम्मे, दे कोव्रथ जाक्मा बाक्त। मिनु येसु आ नेक्था वोल गूशो मुर वा फेक्शा, आ गशो थुं साशा, येसु नु निशशो तशा, हिंमा बाक्त।

36 वोलम सुम्शो मुर दोपा सामे, मेको ताइबपुकीमी जाक्ब आन कली मार मार दुम्मे, मेको नेल्ल शेंदमे बाक्त।

37 मिनु गेरासीन रागीम बाक्बपुकीमी येसु कली “आंइ रागीम मबाक्कीन, लने” दे पुन्मे बाक्त। मारदे हना थाम्पा हिंमा बाक्त।

मिनु येसु डोंगा डोइशशा लेम्माक्त।

38 मिनु डोंगा डोइशशा लचावानु, वोल गुंड्या पुंडसीशो मुरुमी “गे नु लचा गेयीनी” दे पुना बाक्त।

39 तन्न येसुमी “इ खिंम लशा, इ मुर आन कली परमप्रभु यावेमी इ कली दोदेशो रिम्शो पवा, मेको तुइक्पतो” दे सोइक्ता बाक्त। मिनु मेको लशा, आ खिंमी ला ममाइ, सहर डा मुर नेल्ल आन कली येसुमी दोदेशो रिम्शो पवा, मेको तुइक्पदा बाक्त।

याइरस आ तमी साशो

मत्ती ९:१८-२६; मर्कूस ५:२१-४३

40 मिनु येसु लेशशा जाक्मेनु, शुश मुरुमी येसु कली रिम्शा बाक्शो बाक्मा बाक्त।

41 मिनु मेकेर याइरस माइशो गुम्तीक खिं डा ठेयब मुर का येसु आ डोंइती पोक्च थेक्शा बाप्शा “आं तमी बेक्चा चिकताक्व। आं खिं लय” दे सेउ पा पुना बाक्त।

42 मेको के १२ बर्स जाक्दीशो तमी का ला बाक्माक्त। मिनु मेको रोइ पा बेक्चो बाक्माक्त। मिनु येसु लमेनु, हुल डा मुरपुकीमी येसु कली डी डा चूमे बाक्त।

43 मेको हुलमी १२ बर्स रे हुश याप्शा रोइ पशो मीश मुर का बाक्माक्त। मेकोमी ओरुती पा आ बाक्शो नेल्ल थुम्शो बाक्माक्त। तन्न सुइमी मेको कली आ रोइ सापाइक्ने मचाप्शो बाक्मा बाक्त।

44 मिनु मेकोमी येसु आ नोले जाक्शा, येसु आ फेक्शो वा थिवा बाक्त। मिनु आ हुश याप्चा दिक्माक्त।

45 मिनु येसुमी “सुमी थियी?” दे हिल्लो पवानु, नेल्लेमी “गो मथिड, गो मथिड” देंमा बाक्त। मिनु पत्रुसमी “शेंब, मुरपुकीमी हुल पा नेम्मुइनीम, चुमुइनीम। मिनु मार पचा?” देंमाक्त।

46 येसुमी चहिं “मुर कामी आं कली थिती। मारदे हना आं सक्ति लशो तुइक्ताक्ड” देंमाक्त।

47 मिनु मेको मीश मुरुमी खुइक्ने मचाप्नुड, दे मिम्शा हिंशा खिंखि पना पन येसु आ डोंइती बाम्माक्त। मिनु मेकोमी येसु कली मारदे थिवा चोटीन दोपा सामे, मेको लोत्र नेल्ल मुर आन डोंइती शोत्रडा बाक्त।

48 मिनु येसुमी “आं तमी, इ थमा सुइश्शोमी साते। इ थुं नाइश्शा लावो” दे सोइक्ता बाक्त। लूका ७:५०

49 येसुमी मेको मीश मुर नु लोत्र पवानु, याइरस आ खिं डा मुर का जाक्शा, याइरस कली “शेंब कली श्येत मगेने। इन तमी बेक्त” देंमाक्त।

50 येसुमी मेको मुर आ लोत्र नेंशा, याइरस कली “महिनो। थमा सुइक्ना सुइक्न बाक्को। इ तमी साब” देंमाक्त।

51 मिनु खिंमी जाक्दीश्शा, येसुमी पत्रुस, याकूब, यूहन्ना नु आल आ आम आफ आन कली ला लाइश्शा आगा ओव्रमा बाक्त। मत्ती १७:१

52 मेकेर बाक्ब नेल्ल हिशेक पा डाक्शो बाक्मा बाक्त। मिनु येसुमी मेको आन कली “मडाक्कीन, आल मबेक्शो बाक्ब। मेको इप्शो बाक्ब” देंमाक्त। लूका ७:१३

53 मेकेर बाक्बपुकीमी आल बेक्ने थुम्शो बाक्ब, दे तुइश्शा “एको मार लोत्र पवा?” दे शुक्शी पामे बाक्त।

54 मिनु येसुमी आल कली गुइम ग्याइश्शा “ए आल, सेंसो” देंमाक्त।

55 मो मदानु आ सोक्त लेशशा छुल बोक्माक्त। मिनु येसुमी “मेको आल कली इच्का जचा गेने” दे माइक्मी बाक्त।

56 मेको तशा, आल आ आम आफ छक लाक्सा बाक्त। मिनु येसुमी “एको लोत्र सुइ आन कली मशेंदीसे” दे माइक्सी बाक्त। लूका ५:१४; मर्कूस ७:३६

शेंसीब आन कली सोइशशो

मत्ती १०:१,५-१४; मर्कूस ६:७-१३

1 मिनू काबु येसुमी आ १२ जना शेंसीब आन कली खुप्शा, वोल आन कली गुंडतीक नु रोइ पशो मुर आन कली सापाइक्ती सक्ति नु अधिकार गेमी बाक्त। लूका १०:१-१२

2 मिनू मेको आन कली परमप्रभु यावे आ राज्य डा लोत्र शेंथ नु रोइ पाइब आन कली सापाइक्थ सोइक्तीमी बाक्त।

3 मिनू लचामेनु, येसुमी मेको आन कली “कोक्के, झोला, जचा थोत्रक, क्येट मारेइ मलाइक्चा। फेक्तीक यो मकुरसीचा।

4 मिनू तेको खिंमी ओत्रनी, मेको खिंमी गाक्ची मजाक्म सम्म बाक्कीन।

5 दोकका पा मुरपुकीमी इन कली बाक्चा मगेम्तेक्म हना, मेको सहर रे गाक्ची ना इन खोइल डा फुरकु थुर थुर पा ताइशशा गाक्कीन। मेको, मेको आन पर्बम चिन्ड दुम्ब” दे माइशशा सोइक्तीमी बाक्त।

6 मिनू लशा, गाउं गाउं, सहर सहरम परमप्रभु यावे आ राज्य आ पर्बम शेंना शेंन, रोइ पाइब आन कली सापाइक्ना पाइक्न हिरसमा बाक्त।

हेरोदमी येसु कली गुम्चा दाक्शो

मत्ती १४:१-२; मर्कूस ६:१४-१६

7 मिनू सासन पाइब हेरोदमी मेको लोत्र नेल्ल नेंशा, छक लाक्माक्त। मारदे हना मुर का निक्शीमी “ब्वाक्कुम खुम्शा गुंडब यूहन्ना बेक्शो रे सेंसे बाक्त” देंबाक्मा बाक्त।

8 का निक्शीमी “एको एलीया बाक्माक्त थां का” देंबाक्मा बाक्त। का निक्शीमी “साइ डा परमप्रभु यावे आ लोत्र पाइब का बेक्शो रे सेंसे बाक्त” देंमा बाक्त।

9 मिनू हेरोदमी “गो यूहन्ना आ पिया क्योरपाइक्ता। तन्न एको सु का आ पर्बम लोत्र नेंनु?” दे मेको कली गुम्चा दाक्ता बाक्त। लूका २१:८

येसुम ५ हजार आन कली थुल्शो

मत्ती १४:१३-२१; मर्कूस ६:३१-४४; यूहन्ना ६:१-१३

10 मिनु येसु आ सोइश्शोपुकी येसु आ बाक्तीके लेम्मा बाक्त। मिनु मार मार पामे, दो दो पामे, मेको नेल्ल शोव्रडमे बाक्त। मिनु येसुमी मेको आन कली बेथसैदा सहरम लाइक्मी बाक्त।

11 मिनु मुरपुकीम “येसु नु आ शेंसीब मेक लाम्तेकम” दे तुइश्शा, आन नोले खोइश्शा लशा थित्मे बाक्त। मिनु येसुमी मेको आन कली बाक्चा गेशा, परमप्रभु यावे आ राज्य डा लोव्र शेंशा, रोइ पाइब आन कली सापाइक्मी बाक्त।

12 मिनु नां रिक्चावानु, आ १२ जना शेंसीबपुकीम “मुर आन कली सोइक्तीन। मिनु मेकोपुकी गाउं मेर लशा, जचा तूचा ताइनीम, बास यो थित्नीम। मारदे हना एकेर सुइ मुर मबाक्नीम” दे मदमे बाक्त।

13 मिनु येसुमी “गेपुकीमी एको आन कली जचा गेने” दे माइक्मी बाक्त। मिनु शेंसीबपुकीमी “इं के ५ ओटा शोब्ले नु डांइ निक्शी ला बाक्ब। सहर लशा, जचा थोव्रक ग्याप्शा नेल्ल आन कली थुल्चा देंनी?” देंमा बाक्त।

14 मेकेर देल्शो वोइश्श मुर ला ५ हजार बाक्मा बाक्त। मिनु येसुमी शेंसीब आन कली “मुर आन कली ५०, ५० जना पा निप्पतीन” देंमाक्त।

15 मिनु मेकोपुकीमी निप्पदमे बाक्त।

16 मिनु येसुमी ५ ओटा शोब्ले नु डांइ निक्शी शेशा, सरीड गे कोव्रशा “गे रिम्शो पाइब बाक्नीनी” दे आसीक गेशा जिक्शा, शेंसीब आन कली योक्चा गेमी बाक्त।

17 मिनु नेल्लेमी रूथ्री जामे बाक्त। जशा हेंशो खुप्तमेनु, १२ डालो दुम्माक्त।

पत्रुसमी “ख्रीस्त ननी” देंशो

मत्ती १६:१३-१९; मर्कूस ८:२७-२९; यूहन्ना ६:६७-६९

18 मिनु काबु आ शेंसीबपुकी नु बाक्शा प्रार्थना पा, येसुमी “मुरपुकीमी आं पबर्म मार देंनीमी?” दे हिल्लो पवा बाक्त।

19 मिनु मेकोपुकीमी “का निक्शीमी ब्वाक्कुम खुम्शा गुंडब यूहन्ना, का निक्शीमी एलीया, का निक्शीमी साइ नेसी डा परमप्रभु यावे आ लोत्र पाइब का बेक्शो रे सेसे बाक्त देंनीम” देंमा बाक्त। लूका ९:-८

20 मिनु येसुमी “गेपुकी चहिं आं कली सु मिम्नीनी?” देमेनु, पत्रुसमी “गे परमप्रभु यावे आ सोइश्शो ख्रीस्त ननी” देंमाक्त।

21 मिनु येसुमी “एको लोत्र सुइ आन कली मशेंदीने” दे अरेमी बाक्त।

ख्रीस्तम “श्येत जचा माल्नुड” देशो

मत्ती १६:२०-२१; मर्कूस ८:३०-३१

22 येसुमी “रागीम जरमेशोमी शुश श्येत जचा माल्ब। जोक्ब तुइक्ब खाल्पापुकी, ठेयब चढेबपुकी नु सास्त्रीपुकीमी मेको कली मब्रथु साइक्पाइक्नीम। मिनु बेक्शो आ नित्थ नाक्ती सेंसीब” दे शेंदीमी बाक्त। लूका ९:४४-४५; लूका १८:३१-३४

आ नोले खोइक्ब “श्येत जाइनीम” देशो

मत्ती १६:२४-२८; मर्कूस ८:३४-९:१

23 मिनु येसुमी मेको आन कली “सुमी आं नोले खोइक्चा थुं पाइबा, मेकोमी आंम दला दाक्स पचा प्रॉइशा, नाक्त कित कित श्येत जचा महिंथु, आं नोले खोइय्यील।

24 सुमी आंम गिंम प्रॉइचा माल्बा, मेको आ गिंम योल्ब। आं पबर्म आ गिंम सोइक्बमी आ गिंम प्रॉइब। लूका १७:२३; मत्ती १०:३९; यूहन्ना १२:२५

25 रागी नेल्ल आंम के सेल्शा, आ थुं खतम दुम्त हना, मार रिम्शो दुम्बा डा?

26 सुमी आं पबर्म नु आं लोत्र आं पबर्म देंचा कली मुने पाइबा, मेको आ पबर्म रागीम जरमेशोमी, आ आफ आ छेडछेडमी, परमप्रभु

यावे आ स्वर्ग डा गेय पाइबपुकी नु जाक्मेनु ‘मेको कली मतुइक्नुड, सु बाक्मे?’ देंब। मत्ती १०:३३; रतिमोथी १:८

27 गो इन कली थमा लोत्र पाइनुड मुल गो नु काथा बाक्ब का निक्शीमी परमप्रभु यावे आ राज्य मतथु मबेक्नीम” दे माइक्मी बाक्त।

येसुमी आ रां फाइशा तपांडसीशो

मत्ती १७:१-८; मर्कूस ९:२-८

28 मेको लोत्र पशो हप्ता का नोले, येसुमी पत्रुस, यूहन्ना नु याकूब सां आन कली प्रार्थना पथ डांडाम लाइक्मी बाक्त।

29 मिनु येसुमी प्रार्थना पवानु, फांडसीशा आ कुल बुबु देंशो नु आ फेक्शो वा यो बुबु पा तांडसे बाक्त।

30 मिनु मुर निक्शी, मोसा नु एलीया गूशा, येसु नु लोत्र पशो तामे बाक्त।

31 मेको यो छेडछेडम गिल्सीशा येसु नु लोत्रसी पामे बाक्त। मेकोपुकीम यरूसलेमम दोपा श्येत जशा, बेक्चा मेको आ पर्बम लोत्र पामे बाक्त।

32 मेको सांफा मोदेंशो लोत्र पामेनु, पत्रुस, यूहन्ना नु याकूब मारेइ मतुइक्चा डा पा निन्द्रा पामे बाक्त। तन्न मेको आ डोंइती येसु नु मुर निक्शी राप्शो तामे बाक्त। येसु आ छेडछेडम मेको निक्शी नु बाक्शो तामे बाक्त।

33 मिनु मोसा नु एलीया गाक्चाम्सेनु, पत्रुसमी येसु कली “शेंब, इं कली एकेर बाक्चा रिम्शो दुम्ब। बाक्तीके सां सेल्नीकी। का इन कली, का मोसा कली, का एलीया कली” देंमाक्त। मोपा ब्वाक्शो आंमान मतुइक्ता बाक्त।

34 मिनु पत्रुसमी लोत्र पवानु, सरीड रे गोस्स यिशा, मेको आन कली सुम्मी बाक्त। मेको गोस्सुम गिल्मीनु, हिंमा बाक्त।

35 मिनु गोस्स आगा रे सेंदा का “एको आं योत्रशो तौ बाक्ब। मेको आ लोत्र नेनीन” देंशो नेन्मे बाक्त। लूका ३:२२; भजन संग्रह २:७; ब्यवस्था १८:१५



36 मिनु मेको लोव्र नेन्मेनु, येसु का ला तामे बाक्त। मिनु मेको आन तशो नु नेशो शुश नाक्ती सम्म सुइ आन कली मशेंथु, सिक्सी पा थुंमी वोदमे बाक्त।

वोलमी सुम्शो आल कली सापाइश्शो

मत्ती १७:१४-२१; मर्कूस ९:१४-२९

37 मो दुम्मे आ दीसा डांडा रे यिशा, शुश मुर नु गुम्शा देल्मा बाक्त।

38 मेकेर मुर का जाक्शा ठेयब सेंदा पा “हे शेंब, आं तौ कली वारच पने। मारदे हना आं तौ का ला बाक्ब।

39 मेको कली वोल्म हो हु सुमानु, वाइ ब्रेशशा, शोत्र रे बोग्यो गुंइशा, ख्रिंख्रि पना पन मोल मोल थाइब।

40 गो इन शेंसीब आन कली ‘वोल गुंइदीने’ दे पुंइता। तन्न गुंइने मचबेम” देंमाक्त।

41 मिनु येसुमी “गे थमा पा थमा मसुइक्ब नु दूली पाइब, गेना सम्म इन पशो फाल्शा बाक्नुडा डा? इ तौ एक चाक्को” दे मदा बाक्त।

42 मिनु चाक्गानु, वोल्म मेको वोंइश आल कली खोलशा रोप्से पा, शोत्र रे बोग्यो गुंइपदा बाक्त। मिनु येसुमी ग्रांग्रा दिचा डा वोल्म कली हुइश्शा, वोंइश आल कली सापाइश्शा, आ आफ कली गेवा बाक्त। लूका ७:१५

रागीम जरमेशो श्येत जचा माल्ब देशो

मत्ती १:२२-२३; मर्कूस ९:३०-३२

43 मिनु मुर नेल्लेमी परमप्रभु यावे आ गेय तशा छक लाक्शा “परमप्रभु यावे ठेयब बाक्ब” दे लोव्र पामे बाक्त। मिनु मुर नेल्लेमी येसु आ पशो तशा छक लाक्मानु, येसुमी आ शेंसीब आन कली

44 “नोफा दाइश्शा नेनीन। आं देशो लोव्र थुंमी वोतीन। रागीम जरमेशो दा मुर आन गुडमी गेशा साइक्चा पुंइसीब” देंमाक्त। लूका ९:२२; लूका १८:३१-३४

45 तन्न मेकोपुकीमी मेको लोत्र काइ मरुप्मे बाक्त। मारदे हना मेको आन कली मेको लोत्र रुप्चा कली थुं मगेशो बाक्माक्त। येसु कली “एको लोत्र मार में?” दे हिल्लो पचा यो हिंमा बाक्त। लूका २४:४५

“ठेयब सु बाक्या माइ?” देशो

मत्ती १८:१-५; मर्कूस ९:३३-३७

46 काबु शेंसीबपुकीमी “गो इं १२ जनामी नेल्ल क्येडा ठेयब सु बाक्या माइ?” दे लोत्र पमुमा बाक्त।

47 येसुमी मेको आन मिम्शो तुइश्शा, आल का कली आ नेक्था वोइश्शा

48 “सुमी एको आल कली आं नेमी ब्राइबा, मेकोमी आं कली ब्राइब। मिनु सुमी आं कली ब्राइबा, मेकोमी आं कली सोइक्ब कली यो ब्राइब। गे इन दातेमी सु नेल्ल क्येडा आइक्च सुंइसीबा, मेको नेल्ल क्येडा ठेयब दुम्ब” दे शेंदीमी बाक्त। मत्ती १०:४०

छक लाक्चा गेय पाइब का

मर्कूस ९:३८-४०

49 मिनु यूहन्नामी “शेंब, इं नोले मखोइक्ब मुरुमी इन नें थिशा, वोल आन कली खेरशो ताइतक। मिनु मो पचा मदुम्ब, दे माइक्तक। मारदे हना मेको इं नोले खोइश्शा मगाक्ब” दे मदा बाक्त।

50 मिनु येसुमी “मोदेंचा मदुम्ब, मारदे हना इं कली मरिम्शो मपाइब इं मरुन बाक्ब” दे शेंदा बाक्त। लूका ११:२३; फिलिप्पी १:१८

बास मगेचा पुंइसीशो

51 मिनु येसुमी परमप्रभु यावे आ बाक्तीके लची नाक्त आं नेक्था जाक्शो तुइश्शा, यरूसलेम लचा थुं पवा बाक्त। मर्कूस १०:३२

52 मिनु सामरीया रागी डा गाउं आ नेक्था जाक्दीश्शा, मुर का निक्शी आन कली “आं डोइती लशा, नेल्ल ठीक पने” दे सोइक्तीमी बाक्त। मिनु मेको सामरीया डा मुर आन गाउंमी ओत्रमा बाक्त।

53 तन्न मुरपुकीम बाक्चा गेने मबिस्समा बाक्त। मारदे हना येसुमी “यरूसलेम लाइनुड” देशो बाक्माक्त। मिनु सोइशशो मुरपुकी लेशशा जाक्शा “बास मगेनीकी, देतेक्म” दे येसु कली मदमे बाक्त। यूहन्ना ४:९

54 मिनु आ शेन्सीब याकूब नु यूहन्नामी मेको लोव्र नेंशा, येसु कली “प्रभु, मेको गाउं डा मुर आन कली परमप्रभु यावे कली पुंइशा, सरीडरे मी तोक्पाइशशा, खतम पपाइय्य?” दे हिल्लो पाम्से बाक्त। २राजा १:१०-१२

55 तन्न येसुमी मेको आस गे हिरशा हुइक्तीम्सी बाक्त।

56 मिनु बास बाक्थ अर्को गाउं लमा बाक्त।

आ नोले खोइक्चा कली सु शिरबा?

मत्ती ८:१९-२२

57 मिनु लांमी गाक्मानु, मुर कामी येसु कली “प्रभु, गो इन नोले खोइक्चा दाक्नुड” देंमाक्त।

58 मिनु येसुमी “सिवार आन बाक्तीके ढोडोडगा बाक्ब, चिक्ब आन बाक्तीके ग्योव्र बाक्ब। तन्न रागीम जरमेशो के आ बाक्तीके खिं मबाक्ब” देंमाक्त।

59 नोले येसुमी अर्को मुर का कली “आं नोले खोइय्यी” दे मदानु, मेकोमी “डोंइती लशा, आं आफ कली थिम्चा गेयीनी” देंमाक्त।

60 मिनु येसुमी मेको कली “बेक्शो मुरुमी बेक्शो कली थिम्मेक्ल। गे चहिं परमप्रभु यावे आ राज्य डा लोव्र नेपाइक्थ लावो” दे मदा बाक्त।

61 अर्को मुरुमी “प्रभु, गो इन नोले खोइक्चा दुम्ती, तन्न डोंइती आं खिं डा मुर आन कली तुइक्पाइक्थ लचा गेयीनी” देंमेनु, १राजा १९:२०

62 येसुमी “ब्यफ वाक्बमी वाक्तानु, आ नोले हिरशा मवाक्ब। नोले हिरशा कोव्रना कोव्रन वाक्ब मुर चहिं परमप्रभु यावे आ राज्य डा गेय पचा मशिरब” देंमाक्त। फिलिप्पी ३:१३

## 10

शेंसीब आन कली शेंथ सोइशशो  
मत्ती १०:७-१६

1 मिनु नोले प्रभुमी ७० जना अरु शेंसीब आन कली योव्रशा, डोंइती आ लशो सहर गाउंमी निक्कीशी पा सोइक्तीमी बाक्त। का निक्की किताबम ७२ देंनीम। लूका ६:१३-१६; लूका ९:१; मर्कूस ६:७

2 मिनु गाक्चामेनु, मेको आन कली “बाली नाली रुप्चा शुश बाक्ब। रुप्ब मुर चहिं का निक्की ला बाक्नीम। मोपतीके ‘बाली रुप्चा कली मुर योव्रशा सोइक्तीने’ दे बाली नाली आ परमप्रभु कली पुनीने। मत्ती ९:३७-३८; यूहन्ना ४:३५

3 मिनु गे लने। भेडा पाठा आन कली फर आन दातेमी सोइशशो खोदेशो पा सोइक्तान्नी।

4 लनीनु, क्येट, झोला, जुत्ता मकुरथु लने। लांमी मुर आन कली गुम्तीनी हना, लोव्र मपने। लूका ९:३-५; २राजा ४:२९

5 मुर आन खिंमी जाक्दीशशा ओव्रनीनु, मेको खिं डा मुर आन कली ‘थुं नाइशशा बाक्कीन’ दे आसीक गेने। यूहन्ना २०:१९

6 मेको खिंमी थुं नाइक्चा ताइब का बाक्त हना, इन थुं नाइक्तीक आसीक मेकोम राइब। तन्न मबाक्ब हना, मेको थुं नाइक्तीक आसीक गे राइनीनी।

7 मुरपुकीम बास गेम्तेक्म हना, गाक्ची मजाक्म सम्म मेकेरन बाक्कीन। खिं खिं याक्शा मबाक्कीन। इन कली मार जचा तूचा गेमे, मेको जने तूडीन। मारदे हना गेय पाइबपुकीमी आन गाल्च तचा माल्नीम।

8 सहरम जाक्दीन्नीनु, मुरपुकीम इन कली ब्रशा, बास गेशा थुल्लेक्म हना, मार जचा गेमे, मेको जने।

9 रोइ पाइब आन कली सापतीन। मिनु मुर आन कली ‘परमप्रभु यावे आ राज्य इन नेक्था जाक्शो बाक्ब’ दे नेंपतीन।

10 तन्न मुरपुकीमी इन कली मब्राम्तेकम हना, सहर डा लांमी गाकनीनु,

11 ‘आंइ खोइलीम क्येप्शो इन सहर डा फुरक यो फिकनीकी। मो हना यो परमप्रभु यावे आ राज्य इन नेक्था जाक्शो बाक्ब, दे तुइक्तीन।

12 परमप्रभु यावे आ ठेयब निसाफ पची ना गे इन क्येडा सोदोम सहरम शिशी ताइब, देनीन।’ उत्पत्ती १९:१-२९

गालील डा सहर आ पर्बम लोव्र

मत्ती ११:२०-२४

13 ए खोराजीन, ए बेथसैदा, इन तशो चिन्ड नु छक लाक्चा डा गेय टायर नु सीदोन डा मुरपुकीमी तशो नम हना, भाडरा फेक्शा, पुलुम निश्शा आन थुं परमप्रभु यावे गे लेत्तेम वा।

14 ठेयब निसाफ पची नाक्ती टायर नु सीदोन डा मुर आन क्येडा गे शुश सजाइ ताइनीनी।

15 ए कापेरनाउम, मार गे स्वर्ग सम्म क्युक्सीनेवे डा? ममाइ, बेक्शो आन बाक्तीक तोक्चा पुंइसीनेवे।

16 सुमी इन शेंशो नेंना, मेकोमी आं शेंशो नेंब। सुमी इन कली मब्राइबा, मेकोमी आं कली मब्राइब। आं कली मब्राइबमी आं कली सोइक्ब कली यो मब्राइब” दे माइश्शा सोइक्तीमी बाक्त। मत्ती १०:४०; यूहन्ना ५:२३

येसुमी ग्येरसीन देशो

मत्ती ११:२५-२७

17 मिनु मेको ७० जना लशा शेंने थुम्शा, येसु आ बाक्तीके लेशशा जाक्मा बाक्त। मिनु जाक्शा, येसु कली “प्रभु, इन नें थिशा, हुइश्शोनो वोलम यो टिशा प्रोक्बाक्तेकम” दे थाम्पा ग्येरसीशा मदमे बाक्त। ७२ जना शेंसीब यो देंनीम।

18 मिनु येसुमी “सरीड रे चिला आप्शो खोदेशो पा गो सैतान कली दोक्शो ताता। यूहन्ना १२:३१; प्रकाश १२:८-९

19 गे बुस्स नु बिच्छी दिम्ताक्नी हना यो, इन कली मकोक्नीम। मारेइ पने मचाप्नीम। मोदेशो पा सैतानमी इन कली मारेइ पने मचाप्ब। सुइमी यो इन कली मारेइ पने मचाप्ब। भजन संग्रह ९१:१३; मर्कूस १६:१८

20 वोलम इन देशो टीनीम, दे तुइक्नीनी। मेको आ पर्बम मग्येरसीन। तन्न 'परमप्रभु यावे आ मुर दुम्शा, इं नें परमप्रभु यावे नु ब्रोंइचा ताइब आन किताबम ब्रेकसाक्व' दे तुइश्शा थाम्पा ग्येरसीने" दे माइक्मी बाक्त। प्रस्थान ३२:३२; यसैया ४:३; फिलिप्पी ४:३; प्रकाश ३:५

21 मिनु येसु परमप्रभु यावे आ सोक्तीम पतीके ग्येरशा "आं आफ, सरीड नु रागी डा परमप्रभु, गे नेल्ल क्येडा ठेयब ननी। गे शुश रिम्शो पाइतीनी। जोक्ब तुइक्ब नड, दे मिम्ब आन कली इन लोत्र रुप्तीक थुं मगेनी। मजोक्ब मतुइक्ब आन कली रुप्तीक थुं गेतीनी। गे मोदेशो पचा दाक्ताक्नी। १कोरिन्थी २:७

22 आं आफोमी आं कली नेल्ल कली अधिकार पतीक सक्ति गेती। तन्न सुइमी आ तौ सु बाक्बा, मतुइक्नीम, आं आफोमी ला तुइक्ब। सुइमी आं आफ कली मतुइक्नीम। आ तौमी ला तुइक्ब। मिनु तौमी सु सु आन थुंम तुइक्तीक वोइक्बा, मेकोपुकीमी यो तुइक्नीम" देमाक्त।

23 मिनु आ शेंसीब गे हिरशा, मेको आन कली "सुम इन खोदेशो पा ताइनीमी, मेकोपुकी ग्येरसीमल। मती १३:१६-१७

24 मारदे हना इन तशो नेंशो साइ नेसी रे परमप्रभु यावे आ लोत्र पाइब नु पिपीपुकीमी तचा नेंचा दाक्ताक्मे। तन्न तचा नेंचा मतामे" दे माइक्मी बाक्त। १पत्रुस १:१०

इ नेक्था डा मुर सु बाक्बा, दे शेंशो

25 मिनु येसुमी मुर आन कली शेंदानु, सास्त्री का बोक्शा, येसु आ थुं थाम्शा "हे शेंब, गो गेना हना यो ब्रोंइशा बाक्चा कली मार

पचा माल्नुडा?” दे हिल्लो पवा बाक्त। मत्ती २२:३५-४०; मर्कूस १२:२८-३४; लूका १८:१८-२०

26 मिनु येसुमी “परमप्रभु यावे आ अरेशो लोत्रमी मार ब्रेक्शो बाक्मे? मेको मपढेनी?” देंमेनु,

27 मेकोमी “इ थु नेल्लेमी, इ रां नेल्लेमी नु इ सक्ति नेल्लेमी परमप्रभु, इ परमप्रभु यावे कली दाक्तो। मिनु आंम कली दाक्शो खोदेंशो पा इ नेक्था बाक्ब आन कली यो दाक्तो, दे ब्रेक्शो बाक्ब” देंमाक्त। ब्यवस्था ६:५; लेवी १९:१८

28 मिनु येसुमी “ठीक देंते। मेको इ देंशो खोदेंशो पाप्तीवी हना, गेना हना यो ब्रोंइशा बाक्चा ताइनेवे” देंमाक्त। लेवी १८:५; मत्ती १९:१७

29 मिनु आंम कली ठीक सेल्शा, मेकोमी “आं नेक्था डा मुर सु बाक्नीमी, गो मतुइक्नुड” देंमाक्त।

30 मिनु येसुमी “मुर का यरूसलेम रे यिशा, यरीको सहर डा लां खोदा बाक्त। मिनु लमेनु, खुइपुकीमी लांम बाप्शा, मेको कली तुप्शा, थपाइश्शा, आ बाक्शो मारेइ मारेइ नेल्ल रोइश्शा, प्रोक्मा बाक्त।

31 इच्का नोले मेको लां पा चढेब का पिशा, मेको तुप्शा बेक्चशो मुर कली तशा, हेरशा लाक्गा बाक्त।

32 मिनु इच्का नोले लेवी आ थर डा मुर का यो मेको लां रे पिमाक्त। मेकोमी यो मेको बेक्चशो मुर कली तशा, हेरशा लाक्गा बाक्त।

33 मिनु नोले सामरीया रागी डा मुर का पिमाक्त। मेकोमी बेक्चशो मुर कली तशा शिशी पवा बाक्त।

34 तुप्शो मुर आ गारमी तेल नु ओरुत्ती खेक्शा वाम फ्रेंशा, आ गधा तारी डोइक्पाइश्शा, होटेल सम्म लाइश्शा, बास पुंइशा, जचा बाक्चा गोवा बाक्त।

35 आ दीसा नाक्ती गाक्चा क्येडा डोंइती निम्फा आस जशो नु बास डा नेल्ल थाप्शा, होटेल दाइक्ब कली क्येट गेशा वोइश्शा ‘मेको तुप्चा पुंइसीशो मुर कली रिम्शो पा कोत्रडीने। मसाम सम्म

वारच पने। गो लेड्डानु, मजाकदीशशो क्येट नेल्ल थाप्नन्नी' दे लोव्र गार पा लमाक्त।

36 मेको लां गाकब सांमी सु चहिं तुप्शा रोइकचा पुंडसीशो मुर आ नेकथा डा मुर दुम्मे?" दे हिल्लो पवा बाक्त।

37 मिनु सास्त्रीमी "शिशो पाइब मुर थमा पा आ नेकथा डा मुर बाक्त" देंमाक्त। मिनु येसुमी "मेको आ खोदेशो पावो" दे माइशशा सोइक्ता बाक्त। यूहन्ना १३:१७

मरीयम नु मारथा आस खिम बाक्शो

38 मिनु येसु नु आ शेंसीबपुकी यरूसलेम डा लां रे गाक्मानु, गाउं कामी जाकदीम्मा बाक्त। मेकेर मारथा नें पाइशशो मीश मुर कामी येसु कली मान पा बास गेवा बाक्त। यूहन्ना ११:१

39 मारथा आ लोकब मरीयम येसु आ खोइल आ नेकथा बाक्शा आ शेंशो नेंना बाक्त।

40 मारथामी शुश गेय पा श्येत पशा "प्रभु, आं लोकबमी आं कली काइ वारच मपाइब। गे मोदेशो तशा यो मारेइ मदेनी? मेको कली 'बोक्शा, इ लोकब कली वारच पतो' दे मतीन" देंमाक्त।

41 मिनु येसुमी मारथा कली "मारथा, आं लोव्र नेनो। इ थुंमी ग्येत्थ लुकच मिम्शा, पीर पाइबाक्ते।

42 तन्न थोव्रक का ला माल्ब। मरीयममी रिम्शो थोव्रक योव्रतु। मेको सुइम लाइक्ने मचाप्नीम" दे मदा बाक्त। मरीयम६:३३

## 11

प्रार्थना पचा आ पर्वम शेंशो

मत्ती ६:९-१३

1 काबु येसुमी प्रार्थना पवा बाक्त। मिनु प्रार्थना पने थुमानु, आ शेंसीब कामी "हे प्रभु, यूहन्नामी दोपा आ शेंसीब आन कली प्रार्थना पचा शेंदा, मोपा आंइ कली यो शेंदीकी" देंमाक्त।

2 मिनु येसुम "परमप्रभु यावे कली प्रार्थना पनीनु 'आं आफ, इन नें का ला ठेयब बाक्ल। इन राज्य जाक्ल।



3 नाक्त किंत किंत डा आंइ जचा थोव्रक गेकी।

4 आंइ मरिम्शो पशो क्याम्शा गेकी। मारदे हना गो यो आंइ कली मरिम्शो पाइब आन कली का का पा माफ गेनीकी। सैतानमी आंइ थुं थाम्चा मगेने' दे प्रार्थना पने" दे शेंदीमी बाक्त।

परमप्रभुम शिशी पाइब, दे शेंशो

मत्ती ७:७-११

5 मिनु येसुमी "सुइमी नाक्दो इप्शो वारच कली पोक्शा 'ए वारचै, शोब्ले सां गेयी।

6 वारच का डोन रे जाक्त। मेको कली थुलु देंडानु, गो नु मारेइ जचा थोव्रक मबा।

7 मोपतीके जचा थोव्रक गेचा नड' दे पुंइतु हना, वारचम लाप्चो मरोक्थु, खिं आगा रे 'रेयके मपावो। लाप्चो चौक्ता। आल इप्तेकम। सेंसीनीम। बोक्शा, इ पुंइशो गेने मचाप्नुड' देंत हना,

8 तन्न मेकोमी पुंइस डा पुंइस बाक्त हना, मेको मगेनुड देंब मुरुमी वारच, दे ला ममाइ ढिपी पतीके मेको कली आ पुंइशो गेब।

9 परमप्रभु यावे कली पुनीने। मिनु इन पुंइशो ताइनीनी। मालीने। मिनु इन माल्शो थित्नीनी। 'बाक्नी?' दे लाप्चो खोकोल पने। मो पाइतीनी हना ओव्रचा ताइनीनी।

10 मोपतीके सुम पुंइबा, मेकोमी आ पुंइशो ताइब। सुम माल्बा, मेकोमी आ माल्शो थिप्ब। सुम ओव्रनुड, दे लाप्चो खोकोल पाइबा, मेको ओव्रचा ताइब। लूका १३:२५

11 तौमी आ आफ कली 'डांइ ब्वाइनुड' दे पुंइतु हना, मार, आ आफोमी डांइ, दे बुस्स ब्वचा गेबा डा? मत्ती ७:९

12 'ब्वोफु जाइनुड' दे पुंइतु हना, ब्वोफु, दे बिच्छी ब्वचा गेबा डा?

13 गे, मरिम्शो पाइब बाक्तीनी हना यो, इन आल आन कली रिम्शो थोव्रक गेने चाप्नीनी, इन पशो क्येडा स्वर्गम बाक्ब इन आफोमी आ तमी तौ आन कली आन पुंइशो गेब। मेकोपुकीमी

‘इन सोक्त गेकी’ दे पुंइतेक्म हना, आ सोक्त यो गेब” दे शेंदीमी बाक्त।

वोल गुंइचा आ पबर्म शेंशो

मत्ती १२:२२-३०; मर्कूस ३:२२-२७

14 मिनु काबु येसुमी लाटा वोलम थिशो मुर का कली गुमा बाक्त। मिनु लाटा वोल कली गुंइशा खेरा बाक्त। वोल गूम नोले मेकोमी लोत्र पने चबा बाक्त। मेकोमी लोत्र पशो नेंशा, मुर नेल्ले छक लाक्मा बाक्त।

15 मिनु का निक्शीमी चहिं “वोल आन पिप बेल्जीबुल आ सक्तिम वोल आन कली गुंइशा खेरबाक्माक्त” देंमा बाक्त।

16 का निक्शीमी येसु कली थुं कोत्रचा कली चिन्ड कोइपाइक्चा माल्मे बाक्त। मर्कूस ८:११

17 येसुमी मुर आन थुं डा लोत्र नेल्ल तुइश्शा, मेको आन कली “राज्य का डा मुर जिशा ब्राशा गाक्तेक्म हना, राज्य जाम्शा लाइब। खिं का डा मुरपुकी जिशा ब्राशा गाक्तेक्म हना, मेको खिं मलीब।

18 सैतान आ राज्य डा सक्ति ब्रात हना, रीब पा आ राज्य जाम्शा मलाइबा डा? ‘बेल्जीबुल आ सक्तिम वोल आन कली खेरबाक्माक्त’ देंतीनी।

19 गो बेल्जीबुल आ सक्तिम वोल आन कली खेरतामी हना, इन तौपुकीमी सुका आ सक्तिम खेरनीमी? इन तौपुकीमी इन कली निसाफ पाइनीम।

20 गोमी परमप्रभु यावे आ सक्तिम वोल आन कली खेरता हना, परमप्रभु यावे आ राज्य जाक्शो बाक्माक्त, दे तुइक्तीन। प्रस्थान ८:१५

21 बोल्यो मुर कामी या शेशा आ दरवार खाल पाप्तु हना, आ शोंप सुइमी खुइ पने मचाप्नीम।

22 तन्न मेको क्येडा यो बोल्यो अर्को का जाक्त हना ला, मेको आ या नेल्ल रोइश्शा, ग्राशा, शोंप नेल्ल आंम के सेल्ब। कलस्सी २:१५; १यूहन्ना ४:४

23 गो नु मगारब आं जोरी सत्रु दुम्नीम। गो नु मखुप्बपुकीमी आं खुप्शो यो फ्राइनीम। लूका ९:५०

वोल लेशशा जाक्ब, दे शेंशो  
मत्ती १२:४३-४५

24 ग्रांग्रा दिचा डा वोल मुर रे गूशा लशा, ब्वाक्कु मबाक्तीकेम नाइक्तीके माल्ब। मिनु नाइक्तीके मथित्तु हना 'डोंइती आं बाक्तीकेमीन लेत्नुड' दे लेप्ब।

25 मिनु लेशशा जाक्मेनु, आ डोंइती बाक्तीके फिक्शा सिल्शा वोइशो ताइब। मिनु आ क्येडा ग्रांग्रा दिचा डा ७ ओटा वोल आन कली माल्थ लशा चाक्ब। मिनु ओव्रशा बाक्नीम।

26 मिनु डोंइती क्येडा मेको मुर शुश मरिम्शो दुम्ब" दे शेंदीमी बाक्त। यूहन्ना ५:१४

परमप्रभु कली टीब आसीक राइब।

27 येसुमी मेको लोव्र पवानु, मीश मुर कामी ठेयब सेंदा पा "इन कली थिशा थुल्शा कोल्पाइक्ब ममा आसीक रशो मुर बाक्माक्त" दे येसु कली ठेयब सेला बाक्त। लूका १:२८:४८

28 मिनु येसुमी "आं ममा क्येडा परमप्रभु यावे आ लोव्र नेंशा, थुंमी वोइशो पाइबपुकी आसीक राइब नम" देंमाक्त। लूका ८:१५:२१

चिन्ड कोव्रकोव्र दाक्बपुकी

मत्ती १२:३८-४२

29 येसु आ लोव्र नेंबपुकी बारना बारन लशा, शुश दुम्मा नोले येसुमी "सिनाक्त मुलाक्त डा मुर थम मरिम्शो बाक्नीम। मारदे हना चिन्ड ला कोव्रकोव्र दाक्नीम। मेको आन कली योना आ चिन्ड डा लाक्शा, मारेइ चिन्ड मकोइनुडमी। लूका ११:१६

30 निनवे सहर डा मुर आन कली योना आ चिन्ड खोदेशो पा, रागीम जरमेशो सिनाक्त मुलाक्त डा मुर आन कली चिन्ड दुम्ब।

31 निसाफ पची नाक्त दक्खिन रागी डा पिपीममी बोक्शा, एको पाला डा मुर आन कली दोस ताइब सेल्ब। मारदे हना मेकोमी डोन रागी रे पिप सोलोमन आ जोक्तीक तुइक्तीक नेंचा कली जाक्त। नेनीन, एकेर सोलोमन क्येडा यो ठेयब का बाक्ब। १राजा १०:१

32 निसाफ पची नाक्ती निनवे सहर डा मुरपुकी बोक्शा, एको पाला डा मुर आन कली दोस ताइब सेल्नीम। मारदे हना मेकोपुकीमी योना आ लोव्र नेंशा, आन थुं परमप्रभु यावे गे लेत्ताक्म। नेनीन, एकेर योना क्येडा यो ठेयब का बाक्ब। योना ३:५

इन रां छेडछेड दुम्चा माल्ब

मत्ती ५:१५; मत्ती ६:२२-२३

33 बत्ती दाशा, सुइमी खुइशशा सुम्शा मवोइक्नीम। खिं ओव्रब आन कली हाम्सो दुम्ल, दे नेल्लेम ततीकेम वोइक्नीम। लूका ८:१६

34 इन मिक्च इन रां डा छेडछेड बाक्ब। गे हेंथे मकोव्रतीनी हना, इन रां नेल्ल छेडछेड दुम्ब। गे मरिम्शो कोव्रचा दाक्ताक्नी हना, इन रां नेल्ल छिडछिड बाक्ब।

35 मोपतीके होस पांइसीने, इन रां डा छेडछेड छिडछिड मदुम्ल।

36 मिनु इन रां छिडछिड मदुम्थु, छेडछेडम ब्रीशो बाक्त हना, बत्ती दाशो खोदेशो पा तांइसीनीनी” दे शेंदीमी बाक्त।

फरिसी नु सास्त्री कली हुइशशो

मत्ती २३:१-३६

37 काबु येसु फरिसी आ खिंमी खमे जथ लमेनु, आ गुइ मचिक्सीथु निस्से बाक्त। लूका ७:३६; लूका १४:१

38 मिनु फरिसीमी येसु कली गुइ मचिक्थु जचशो तशा छक लाक्माक्त। मत्ती १५:२

39 मिनु प्रभु येसुमी मेको कली “गे फरिसीपुकी बोस शेक्तीनीनु, आ तार ला शेक्नीनी। आगा मशेक्नीनी। मेको खोदेशो पा इन थुंमी रोइक्तीके नु परमप्रभु कली मटितीकेमी ब्रीशो बाक्ब।

40 गे मूर्खपुकी, सुमी आ लाडगा डा सेला, आगा डा यो मेकोम सेल्शो ममाइ डा?

41 गे आगा डा थोव्रक मथीब आन कली गेने। मिनु इन कली नेल्ल रिम्शो दुम्ब।

42 तन्न आबी, फरिसीपुकी, गे खतम बाकनीनी। मारदे हना सुप्तीके के १० भाग डा भाग का परमप्रभु यावे कली गेनीनी। तन्न गे मुर आन कली ठीक निसाफ मपथु, परमप्रभु यावे कली मदाकनीनी। गे डोंइती नु नोले डा निम्फा पचा माल्नीनी। यूहन्ना ५:४२

43 आबी, फरिसीपुकी, गे खतम बाकनीनी। मारदे हना ग्रुम्तीक खिमी मान तशो ठेयब मुर आन नित्तीकेमी नित्चा दाकनीनी। बजारमी गाकनीनु, मुरपुकीमी मान पा सेउ पशो ताक्चा दाकनीनी। लूका १४:७

44 आबी, फरिसीपुकी, गे खतम बाकनीनी। मारदे हना गे मततीक तुरस खोदेशो बाकनीनी। मुरपुकीमी मेको कली मतुइक्थु, दिम्शा गाकनीमी” देंत।

45 मिनु सास्त्री कामी “शेंब हजुर, इन हुइश्शो फरिसी आन कली ला ममाइ। आंइ कली यो हुइक्ताकनी” देंमेनु,

46 येसुमी “आबी, सास्त्रीपुकी गे यो खतम बाकनीनी। मारदे हना हेल्शो भारी सेल्शा, मुर आन कली कुरपाइकनीनी। गे चहिं ब्रेप्यो कामी यो नेप्शा वारच मपाइनीनी।

47 आबी, गे खतम बाकनीनी। मारदे हना इन किकी पिपीपुकीमी परमप्रभु यावे आ लोव्र पाइब आन कली साइक्तेक्म। मिनु गे मेको आन तुरस सेल्तीनी। प्रेरित ७:५२

48 मोपा इन किकी पिपी नु गारशो दुम्तीनी। मेको आन पशो ठीक बाक्माक्त, दे आन पशो खोदेशो पाइब दुम्तीनी। मारदे हना इन किकी पिपीपुकीमी परमप्रभु यावे आ लोव्र पाइब आन कली साइक्ना साइक्न बाक्तेक्मे। गेपुकीमी चहिं तुरस सेल्ना सेल्न बाक्तीनी।

49 साइ नेसी परमप्रभु यावे आ तुइक्तीक पाइशशोमी 'गो आं लोव्र शेंब मुर सोइक्नुडमी। मेको आं सोइशशो मुर का निक्शी आन कली खेदा पा श्येत गेनीम, का निक्शी आन कली साइक्नीम' देशो बाक्त।

50 साइ डोंइती रे मुल सम्म परमप्रभु यावे आ लोव्र पाइब शुश आन कली साइशशो क्येक्क एको पाला डा मुर आन रे ताक्सीब।

51 डोंइती साइशशो हाबील बाक्त। नेल्ल क्येडा नोले साइशशो जकरिया बाक्त। मेको कली परमप्रभु यावे कली चढ़ेतीक नु आ खिं आस दातेम साइशशो बाक्त। मेको नेल्ल आन कली मोपा साइक्तीके सिनाक्ती मुलाक्ती डा मुर दोस गेने पुंइसीशा सजाइ ताइनीम।

52 आबी, सास्त्रीपुकी, गे खतम बाक्नीनी। मारदे हना गे जोक्तीक तुइक्तीक सांचो ताक्तीनी, तन्न मेकेर मओव्रनी। मिनु ओव्रचा दाक्ब आन कली यो ओव्रचा मगेनी” दे हुइक्तीमी बाक्त।

53 मिनु येसु फरिसी आ खिं रे गाक्चवानु, सास्त्री नु फरिसीपुकी गाइशशा, शुश लोव्र हिल्लो पा आ थुं थाम्मे बाक्त।

54 मारदे हना आ लोव्र खाइक्पाइशशा, दोस गेचा माल्मे बाक्त।  
लूका २०:२०

## 12

परमप्रभु कली थमा सुइक्चा माल्ब

मत्ती १०:२६-३३

1 मिनु हजार, हजार मुर खुम्सीशा, नेम्मुशा, चुमुशा, येसु आ लोव्र नेंथ जाक्मा बाक्त। मिनु येसुमी आ शेंसीब आन कली “फरिसी आन बोरपाइक्तीक ओख्ती रे होस पा बाक्कीन। मेको आन जोल पा शेंतीक बाक्ब। मत्ती १६:६; मर्कूस ८:१५

2 सुम्शा वोइशशो नोले नेल्ल हाक्सीशा तांइसीब। खुइशशा वोइशशो लोव्र नेल्ल नोले तुंइसीब। लूका ८:१७

3 मोपतीके इन छिडछिडम बाक्शा पशो लोत्र नोले छेडछेडम नेंसीब। मुल इन खिंमी बाक्शा, नोफाम मुइक्मुशा पशो लोत्र नोले ठेयब सेंदा पा देंनीम।

4 आं वारचपुकी, इन रां कली साइक्ने चाप्बपुकी तशा महिनीन। मारदे हना साइक्ने थुम्शा, नोले मारेइ पने मचाप्नीम।

5 तन्न परमप्रभु यावे कली मान पा हिनीन। मारदे हना मुर आन कली साइश्शा, नाराक सोइक्तीक सक्ति मेको नु बाक्ब। मोपतीके मेको कली तशा मान पा हिनीन। हिलू १२:२९

6 आस्सारीयोन निक्शीम ५ ओटा भंगेरा मग्याम्सीबा डा? मो हना यो परमप्रभु यावेमी मेको आन कली कोत्रशो बाक्ब। आस्सारीयोन का नेल्ल क्येडा आइक्च तांबा के क्येट बाक्त।

7 मेको आन कली ला ममाइ। इन पिया डा चां का का पा हिक्शा, गिश बाक्मा, दे तुइश्शो बाक्ब। मोपतीके महिनीन। गे भंगेरा क्येडा शुश हिक्सीशो बाक्नीनी। लूका २१:१८

8 सुमी मुर आन कली 'गो येसु आ मुर नड' देंबा, रागीम जरमेशोमी यो मेको आ पर्बम परमप्रभु यावे आ स्वर्ग डा गेय पाइब आन डोंइती 'मेको आं मुर बाक्ब' देंब।

9 सुमी चहिं मुर आन कली 'येसु सु बाक्मे? मतुइक्नुड' देंबा, मेको आ पर्बम परमप्रभु यावे आ स्वर्ग डा गेय पाइब आन डोंइती 'मेको कली मतुइक्नुड' देंब। लूका ९:२६; १सामुएल २:३०

10 सु सुमी रागीम जरमेशो आ पर्बम शुक्शी पामे, मेको का का पा माफ ताइनीम। सु सुमी चहिं परमप्रभु यावे आ सोक्त आ पर्बम शुक्शी लोत्र पामे, मेको आन पाप गेनायो मक्याम्सीब। मत्ती १२:३२; मर्कुस ३:२८-२९

11 इन कली आन गुम्तीक खिं डा ठेयब मुर नु हुकुम पाइब आन डोंइती लाइश्शा राप्पदमेनु 'मुल मार देंचा, मार लोत्र लेत्चा' दे सुर्ता मपने।

12 मोपा राप्पदमेनु, परमप्रभु यावे आ सोक्तीमी इन कली मार देंचा दो देंचा तुइक्पाइश्शा देंपाइक्ब" दे शेंदीमी बाक्त।

शोंप गे थुं महिरचा, दे शेंशो

13 मिनु काबु आ लोव्र नेंथ शुश मुर खुम्समानु, मुर कामी “शेंब, आं लोक्ब कली आं तचा डा अडस योक्शा गेवो, दे मतीन” दे पुना बाक्त।

14 मिनु येसुमी “मार गो इस अडस योक्ब नडा डा? मनड” देंमाक्त।

15 मिनु नोले मुर आन कली “नेनीन, होस पा बाक्कीन। शिम मडुमीन। मारदे हना शुश शोंप बाक्शा ला ब्रोंडशा बाक्चा मतांइसीब” देंमाक्त। उपदेसक ५:९; १तिमोथी ६:९-१०

शोंप पाइशो मूर्ख

16 मिनु कथा सेल्शा “शोंप पाइशो मुर का आ बाली नाली शुश ग्रेल्माक्त।

17 मिनु मेकोमी शुश ग्रेल्शो तशा ‘मुल अन्न वोइक्तीके खिं मजाक्दीप्ब।

18 मोपतीके खिं प्रेशशा अन्न वोइक्तीक ठेयब खिं सेल्शा, बाक्शो अन्न नेल्ल मेकेर उप्नुड’।

19 मिनु मेकोमी ‘शुश बर्स कली जाक्दीप्ब। शुश शोंप गे नु बाक्ब। मोपतीके जशा तूशा ग्येरशा बाक्को’ दे आंम थुं कली देंमाक्त। भजन संग्रह ४९:१-२०

20 मिनु परमप्रभु यावेमी मेको कली ‘गे मूर्ख नवे। मारदे हना मुलाक्दो बेक्नेवे। मिनु इ खुप्शा उप्शो शोंप सुम जाइबा?’ दे मदा बाक्त।

21 परमप्रभु यावे कली ममिंथु, शोंप ला मिम्ब मुर नेल्ल मोदेंशो दुम्नीम” दे शेंदीमी बाक्त। मत्ती ६:२०

सुर्ता मपचा, दे शेंशो

मत्ती ६:२५-३३

22 मिनु आ शेंसीब आन कली “मार जचा, मार फेक्चा, दे सुर्ता मपने।



23 मारदे हना जचा क्येडा ब्रोंइचा ठेयब बाक्ब। फेक्चा क्येडा इन रां ठेयब मिम्तीने।

24 खद आन कली कोव्रडीने। मेकोपुकीमी मशोकनीम, मारेइ मरुप्नीम मखुप्नीम। आन अन्न वोइक्तीक सिं यो मबाक्ब। तन्न परमप्रभु यावेमी मेको आन कली कोव्रशा थुल्ब। मिनु गे मेको चिक्ब आन क्येडा हिवसीशो मबाक्नीनी डा?

25 मार, गेपुकीमी सुर्ता पा इन ब्रोंइतीक नाक्त बारपाइक्ने चाप्नीनी डा?

26 मोदेशो लायो मचाप्तीनी हना, मारदे अरु थोव्रक आन कली सुर्ता पाइनीनी?

27 लिली फू कली कोव्रशा मिम्तीने। गिश रिम्शो तांडसीनीमी। श्येत पा गेय मपाइनीम। पांडतो मपाइनीम। पिप सोलोमन गिश ग्योम्साक्व हना यो, मेको लिली फू खोइ दारशो मदुम्माक्त।

28 परमप्रभु यावेमी मेको घांस रिम्शो पा ग्योम्ताक्व बाक्त हना यो, याम का बाक्चा गेब। नोले मेको घांस मीम हुम्चा पुंडसीब। घांस कली लायो मिश रिम्शो पा ग्योम्ताक्व हना, गे रिम्शो पा थमा सुइक्ने मचाप्ब इन कली मग्योम्बा डा?

29 मार जचा मार तूचा, दे थुंमी सुर्ता मपने।

30 रागी रागी डा मुर नेल्लेमी मोदेशो मिम्नीम। इन आफ, परमप्रभु यावेमी इन माल्शो नेल्ल तुइक्ब।

31 मोपतीके मोदेशो मिम्चा प्रोंइशा, परमप्रभु यावे आ राज्य मालीने। मिनु मारेइ मारेइ यो ताइनीनी।

32 गे आइक्च बगाल, महिनीन। मारदे हना इन आफोमी इन कली आ राज्यम वोइक्चा दाक्ब। लूका २२:२९

33 इन के बाक्शो लेयशा, मथीब आन कली योक्शा गेने। मो पनीनु, स्वर्गम इन शोंप लीब। मिनु मेको मोपा वोइश्शो शोंप खुइमी खुइ पने मचाप्नीम, खिया मजोइब मराक्ब, गेनायो मजाम्ब। लूका १८:२२

34 तेकेर इन शोंप बाक्बा, मेकेरन इन थुं यो लीशो बाक्ब।

सासीशा बाक्कीन, दे शेंशो  
मत्ती २४:४३-५१

35 बत्ती दाशा वा फेक्शा सासीशा बाक्कीन। प्रस्थान १२:११;  
१पत्रुस १:१३; मत्ती २५:१-१३

36 होत्रप ग्युंवे भोज जथ लमेनु, आ गेय पाइबपुकीमी 'इं होत्रप  
लेशशा जाक्ब। मोपतीके लेशशा मजाक्म सम्म मइप्थु बाक्य, दे  
रिम्नीम। मिनु होत्रप जाक्शा, लाप्चो खोकोल पदानु, गु रोकशा  
ओव्रचा गेनीम। प्रकाश ३:२०

37 मोदेशो गेय पाइब आसीक ताइब बाक्नीम। होत्रप लेशशा  
जाक्मेनु, आ गेय पाइब आन कली मइप्थु रिम्शा बाक्शो थित्तु हना,  
आ होत्रप थाम्पा ग्येरसीशा, मेको आन कली निप्पाइशशा थुल्ब।

38 होत्रप नाक्दो नाक्ती गेना हना यो लेशशा जाक्मेनु, आ  
गेय पाइब मइप्थु बाक्तेक्म हना, मेको मुर रिम्शो दुम्शा आसीक  
ताइनीम'।

39 नेनीने, खिं डा मुरुमी 'मुल खुइ जाक्नीम' दे तुइशो नम  
हना, मेकोम खिं मप्रोंइथु मइप्थु बाक्शा, खुइ पचा मगेम वा।  
१थिस्सलोनिकी ५:२

40 मोदेशो पा गे यो मइप्थु सासीशा बाक्कीन। मारदे हना रागीम  
जरमेशो इन मतुइक्थु जाक्ब" दे शेंदीमी बाक्त।

41 मिनु पत्रुसमी "प्रभु, एको लोत्र गो आंइ कली ला शेंदीनी देय  
मुर नेल्ल आन कली शेंदीनी?" दे हिल्लो पवानु,

42 प्रभुमी "होत्रपमी आ खिं कोत्रब कली जची जाक्मेनु जचा  
गेचा, दे अरेशा वोइक्चा पुंइसीब। मेको खोदेशो निप्स पाइशशा  
थमा सुइक्चा पुंइसीशो गेय पाइब सु बाक्बा?

43 आ होत्रप लेशशा जाक्मेनु, आ गेय पाइबमी आ अरेशो गेय  
पना पन बाक्शो थित्तु हना, मेको गेय पाइब आसीक राइब दुम्ब।

44 नोफा दाइशशा नेनीने, मेको होत्रपमी आ बाक्शो मारेइ मारेइ  
मेको गेय पाइब कली जिम्मा गेब।

45 तन्न मेको गेय पाइबमी 'आं होव्रप इच्का नोले जाक्ब' दे मिम्शा, मेकोमी गेय पाइब वोंइश मुर, मीश मुर आन कली तुप्शा श्येत गेशा, जशा तूशा, दुक्शा पाप्तु हना,

46 आ ममिम्शो मतुइश्शो नाक्त आ होव्रप लेशशा जाक्ब। मिनु मेकोमी मेको गेय पाइब कली सजाइ गेशा, मरिम्शो गेय पाइबपुकी नु काथा वोइक्ब।

47 मिनु होव्रप आ देंशो रुप्शा यो मतुइश्शो खोदेंशो पा मेको आ देंशो मटीब गेय पाइब शुश तुप्चा पुंइसीब। याकूब ४:१७

48 होव्रप आ देंशो मतुइक्थु, मरिम्शो पाप्तु हना, इच्का ला तुप्चा पुंइसीब। सुमी शुश रुप्शा तुइश्शो बाक्मे, मेकोम शुश जिम्मा ब्राइबा। मिनु सुमी शुश जिम्मा ब्राइबा, मेको शुश जिम्मा वारी दुम्ब" दे शेंदीमी बाक्त।

फ्राचा कली जाक्ती

मत्ती १०:३४-३६

49 मिनु येसुमी शेंना शेंन "गो एको रागीम मी जेतथ जाक्शो नड। एको मी आं क्येडा डोंइती जेशशो हना, रिम्शो दुम वा।

50 गो श्येत का जचा माल्नुड। मेको बेक्चा डा श्येत मजडा सम्म परमप्रभु यावेम गेशो गेय पाइनुड। लूका १८:३१; मत्ती २०:२२; मत्ती २६:३८

51 गो रागीमी नेल्ल आन कली गारपाइक्थ जाक्शो बाक्नुड, दे मिम्नीनी? तन्न गो इन कली फ्राथ कका जाक्ती।

52 खिं कामी ५ जना मुर बाक्तेक्म हना, मेको ५ जना ब्रानीम। सांमी थमा सुइक्नीम, निक्शीमी थमा मसुइक्नीसी। निक्शीम थमा सुइक्नीसी, सांमी थमा मसुइक्नीम।

53 आफोमी थमा सुइक्ब, आ तौमी थमा मसुइक्ब। मिनु आफ कली आइक्च सेल्ब। तौमी थमा सुइक्ब, आ आफोम थमा मसुइक्ब। मिनु आ तौ कली आइक्च सेल्ब। ममामी थमा सुइक्ब, तमीमी थमा मसुइक्ब। तमीमी थमा सुइक्ब, ममामी

थमा मसुइक्ब। शिमीमी थमा सुइक्ब, चाइमीमी थमा मसुइक्ब। चाइमीमी थमा सुइक्ब, शिमीमी थमा मसुइक्ब। मोपा थुं का पा बाक्ने मचाप्नीम” दे शेंदीमी बाक्त।

54 मिनु मेकेर खुम्सीशो शुश मुर आन कली “नां पेरतीकेम गोस्स ग्रूमेनु, ‘इच्ची ना रेउ यीब’ देंनीनी। मिनु रेउ यीब। मत्ती १६:२-३

55 दक्खिन रागी रे फश पवानु ‘मुलाक्ती हुप्ब’ देंनीनी। मिनु हुप्ब।

56 गे कपटीपुकी, सरीड, रागी कोव्रशा, मुल मार दुम्बा, दे तुइक्नीनी। मुल मार दुम्चशो बाक्मे, मेको चहिं मारदे मरुप्नीनी?

57 तेको गेय पशोमी रिम्शो दुम्बा, तेको गेय पशोमी मरिम्शो दुम्बा, मेको मिम्ने मचाप्नीनी?

58 इन कली दोस गेमेनु, दुशा बाक्कीन। मारदे हना इन कली दोस गेशा, निसाफ पाइब आ डोंइती लाइक्तेक्म हना, मेकोमी इन कली लल पिया आन गुइमी जिम्मा गेशा, जेल्खानम चोक्पाइक्नीम। मत्ती ५:२५-२६

59 नोफा दाइश्शा नेनीने, मेकोम इन कली नोले डा लेप्तोन सम्म मथाप्पाइक्थु मप्रोंइनीम” दे माइक्मी बाक्त। लेप्तोन का नेल्ल क्येडा आइक्च रोमी आन तांबा के क्येट बाक्ब।

## 13

इन थुं परमप्रभु गे लेत्तीन, दे शेंशो

1 मोपा शेंदीमीनु, आ लोव्र नेंब का निक्शीमी “साइ गालील रागी डा मुरपुकीमी मारेइ मारेइ क्योरशा जारदमेनु, पिलातसमी सिपाइ सोइश्शा, मेको जारब आन कली क्योरपाइश्शा, मेको आन जारशो हुश नु ब्वाइक्ताक्व” देंमा बाक्त।

2 मिनु येसुमी मेको आन कली “मोपा साइक्चा पुंइसीब आन कली रागी डा मुर क्येडा मरिम्शो बाक्मा बाक्त, दे मिम्नीनी? ममाइ, मेको इन खोदेंशोन नम। यूहन्ना ९:२

3 इन थुं परमप्रभु यावे गे मलेत्ताक्नी हना, गे यो मोदेंशो पा बेक्नीनी।

4 सिलोआमी नेल्ल क्येडा लाइशो खिं ब्रेम्मेनु, १८ जना चिप्शा बेक्मा बाक्त। मोपा बेक्शोपुकी यरूसलेम सहरम बाक्ब नेल्ल आन क्येडा मरिश्शो बाक्मा बाक्त, दे मिम्नीनी? ममाइ, मेको इन खोदेंशोन नम।

5 इन थुं परमप्रभु यावे गे मलेत्ताक्नी हना, गे यो मोदेंशो पा बेक्नीनी” दे माइक्मी बाक्त।

6 मिनु कथा सेल्शा “मुर कामी पोव्रशी रवा का खुमा बाक्त। मिनु फल सित्ची ना, सिदा कों, दे कोव्रथ लमाक्त। मिनु कोव्रडानु दा, काइ मसिश्शो बाक्माक्त। मत्ती २१:१९

7 मोपा मसिश्शो तशा, आ गेय पाइब कली ‘एको रवा फल मसिप्ब। गो बर्स बर्सम खेयप सां कोव्रथ जाक्डानु, काइ मसिश्शो बाक्त। एको रवामी रू ला नेक्तु। मोपतीके एको कली तिम्शा ताइक्तो’ दे मदा बाक्त।

8 आ गेय पाइबमी चहिं ‘आं होव्रप, मुल बाक्ल। बर्स का सम्म आ पुं मेर दोशा, मोल कुर पाइनुड। २पत्रुस ३:९, १५

9 मिनु सित्त हना, बाक्ल। मसित्त हना, तिम्शा ताइक्चा’ देंमाक्त” दे शेंदीमी बाक्त। लूका ३:९

### कूंजी कली सापाइशो

10 काबु नाइक्तीक नाक्ती गुम्तीक खिंमी मुर आन कली शेंदीमी बाक्त। लूका ६:६-११

11 मेकेर वोल्म तशा, १८ बर्स कूंजी दुम्शो मीश का मुर बाक्माक्त। मेको गुर ब्वेशो बाक्माक्त। रिम्शो पा राप्ने मचाप्बाक्माक्त।

12 मिनु येसुमी मेको मीश मुर कली तशा “एक पिवो” दे ब्रेत्ता बाक्त। मिनु पिमेनु “आं तमी, कूंजी दुम्शो रे प्रोंइतन” देंशा आ गुइ मेको तारी वोदा बाक्त।

13 मोपा वोदानु, साशा राम्माक्त। मिनु ग्येरशा परमप्रभु यावे कली ठेयब सेला बाक्त।

14 मिनु ग्रुम्तीक खिं डा ठेयब मुरुमी नाइक्तीक नाक्ती सापाइश्शो तशा, आ थुं मनुमाक्त। मिनु आ थुं मनुथु, मेकेर बाक्ब आन कली “साता कामी ६ नाक्त गेय पचा माल्ब। काबु नाइक्चा माल्ब। मिनु नाइक्तीक नाक्ती गेय पचा मदुम्ब। मोपतीके इन रोइ सापाइक्चा कली नाइक्तीक नाक्ती गेनायो मजाक्कीन। अरु नाक्त जाक्कीन” दे हुइक्तीमी बाक्त। प्रस्थान २०:९-१०

15 मिनु प्रभुमी हुइक्ब मुर कली “ए कपटी, गे नाइक्तीक नाक्ती इन ब्यफ नु गधा आन कली प्रौइशा, ब्वाक्कु मतूपाइक्नीनी डा? लूका १४:५

16 एको मीश मुर अब्राहाम आ तमी बाक्ब। सैतानमी एको कली १८ बर्स सम्म रोइम गुरपाइश्शा वोइश्शो बाक्त। मिनु एको कली नाइक्तीक नाक्ती मप्रौइचा? मसापाइक्चा?” दे हुइक्ता बाक्त। लूका १९:९

17 मोदेशो लोव्र पवानु, आ कली मरिम्शो देंब मुर मुने दोक्माक्त। मेकेर बाक्ब मुर नेल्ल येसु आ पशो रिम्शो गेय तशा, थाम्पा ग्येरसमा बाक्त।

परमप्रभु आ राज्य आ पर्बम शेंशो

मत्ती १३:३१-३३; मर्कूस ४:३०-३२

18 मिनु मेकोमी “परमप्रभु यावे आ राज्य दोदेशो बाक्ब देंशा हना,

19 मुर कामी आ रूमी तोरी शोकगा बाक्त। मिनु वाशा ठेयब रवा दुम्माक्त। मेको रवाम चिक्बपुकीमी ग्योव्र सेल्मे बाक्त।

20 मिनु परमप्रभु यावे आ राज्य दोदेशो बाक्ब देंशा हना,

21 मीश मुर कामी सेआह सां फसीम बोरपाइक्ब ओरूती सुप्ताक्व। मिनु मेको फस नेल्ल बोरत” दे शेंदीमी बाक्त। सेआह का १३ लिटर गारचा डा पुक्तीके बाक्ब। अरु ब्रेक्तीकेमी चहिं ७ लिटर पुक्तीके बाक्ब, दे ब्रेक्शो बाक्त। सेआह सां ३९ लिटर कि २१ लिटर पुक्तीके बाक्ब।

आइक्च लाप्चो आ पर्बम शेंशो

22 येसु गाउं सहर ते ते जाकदीम्मे, मेक मेक शेंना शेंन यरूसलेम गे लमावत।

23 मिनु मुर कामी “शेंब हजुर, परमप्रभु यावे आ राज्य ओव्रचा ताडबपुकी का निक्शी ला बाक्नीमी?” दे हिल्लो पवा बावत

24 मिनु येसुमी “आइक्च लाप्यो रे ओव्रचा मालो। मेकेर रे शुश मुर ओव्रचा दाक्नीम, तन्न ओव्रने मचाप्नीम। मती ७:१३-१४

25 मारदे हना खिं डा मुरुमी लाप्यो चोक्ब। मिनु जाक्शोपुकी लाडगाम राप्शा ‘ओव्रचा गेकी, प्रभु’ दे ब्रेत्नीनी। तन्न खिं डा मुरुमी ‘इन कली मतुइक्नन्नी, ते रे जाक्शो ननी?’ देंब। मती २५:११-१२

26 मिनु गेपुकीमी ‘हजुर, गे नु काथा खमे जाइब नकी। आंइ गाउं सहर सहरमी शेंदीनीनु, गो इन लोव्र नेंतक’ देंनीनी। मती ७:२२-२३

27 तन्न मेकोमी इन कली ओव्रचा मगेशु ‘ते रे जाक्नी मतुइक्नुड। मरिम्शो पाइबपुकी आं रे पा डोन लने’ दे खेरब।

28 मोदेशो पा खेरचा पुंइसीशा, डाक्शा इन खुइ शेप्नीनी। मारदे हना इं किकी पिपी अब्राहाम, इसहाक, याकूब नु परमप्रभु यावे आ लोव्र पाइब नेल्ल आन कली परमप्रभु यावे आ राज्यम ओव्रशा, बाक्शो ताइनीनी। गे चहिं खेरचा पुंइसीनीनी। मती ८:११-१२

29 मुरपुकी पूर्व पच्छिम उत्तर दक्खिन रे जाक्शा, परमप्रभु यावे आ राज्यम ओव्रशा भोज जशा बाक्शो ताइनीनी। लूका १४:१५

30 नेल्ल आन क्येडा नोले दुम्शोपुकी डोंइती दुम्नीम। मिनु नेल्ल आन क्येडा डोंइती दुम्शोपुकी नोले दुम्नीम” दे शेंदीमी बावत।

हेरोदम येसु कली साइक्चा माल्शो

31 येसुमी शेंना शेंन बाक्मेनु, फरिसीपुकी जाक्शा, येसु कली “पिप हेरोदम इन कली ग्याइश्शा साइक्चा माल्शो बाक्ब। मोपतीके एक रे रीब पा लने” देंथ जाक्मा बावत।

32 मिनु येसुमी “लशा, मेको फ्याउरे कली ‘मुलाक्ती नु दीसा वोल आन कली खेरनुडमी। रोइ पशो मुर आन कली सापाइक्नुडमी। मिनु नित्थ नाक्ती आं गेय थुम्नुड।

33 मुलाक्ती, दीसा नु नित्थ नाक्ती यरूसलेम मेर गाक्नुड। मारदे हना परमप्रभु यावे आ लोत्र पाइबपुकी साइ रेन यरूसलेम सहरम ला खतम दुम्नीम' देनीन" दे सोइक्तीमी बाक्त।

यरूसलेम मिम्शा, येसु आ थुं खाइशो

मत्ती २३:३७-३९

34 मिनु यरूसलेम कली "ए यरूसलेम, यरूसलेम, परमप्रभु यावे आ लोत्र पाइब आन कली साइक्तीवी। इ कली शेंथ सोइशो आन कली फुल्लु क्रोम्ताक्वी। पोत्रथीमी आ चितोली आन कली पुप्शो खोदेशो पा, गो शुश खेयप इ आल आन कली पुप्चा माल्ती, गे चहिं मबिस्से। मत्ती २३:३७-३९; लूका १९:४१-४४

35 मुल इ खिं ब्रेशशा मारेइ मलीब। 'प्रभु आ नेंमी जाक्ब ठेयब बाक्ब' मर्देने सम्म गे आं कली मताइनेवे" देमाक्त। येरमीया २२:५, भजन संग्रह ६९:२७; भजन संग्रह ११८:२६

## 14

नाइक्तीक नाक्ती सापाइशो

1 मिनु काबु नाइक्तीक नाक्ती मार दुम्माक्त देशा हना, येसु फरिसी आ खिंमी खमे जथ लमाक्त। मिनु फरिसीपुकीम "मार पाइबा, मार शेंबा" दे योत्रकी पा बाक्मा बाक्त। लूका ६:६-११; लूका ११:३७

2 मिनु मेकेर शुश ब्वाक्कुम ब्रीशा होम्शो रोइ पशो मुर का बाक्माक्त।

3 मिनु मेको रोइ पशो मुर येसु आ डोंइती बाक्मेनु, येसुमी सास्त्री नु फरिसी आन कली "नाइक्तीक नाक्ती सापाइक्चा दुम्बा, दे मदुम्बा?" दे हिल्लो पामी बाक्त।

4 मेकोपुकीमी आ लोत्र मलेत्थु ब्वालेइ पा बाक्मा बाक्त। मिनु येसुमी रोइ पाइब कली थिशा, सापाइशशा, आ खिं सोइक्ता बाक्त।



5 मिनु मेको योत्रकी पाइब आन कली “नाइक्तीक नाक्ती इन ब्यफ, इन गधा का इनारम बिक्त हना, मगुंडनीनी डा?” दे हुइक्तीमी बाक्त। लूका १३:१५; मती १२:११

6 मिनु मारेइ लोत्र लेन्ने मचाप्मे बाक्त।

लोत्र खाइक्पाइशो

7 मिनु मेकेर खमे जथ जाक्शो शुशेमी ठेयब लेशशा, ठेयब मुर आन नित्तीकेमी नित्चा माल्शो तशा मती २३:६

8 “जन्ती लनीनु, सम्दी नित्तीकेमी मनिस्सीन। हितोपदेस २५:६-७

9 मारदे हना सम्दी जाक्मेनु, खिं डा मुरुमी इन कली पोक्शा याक्पाइक्ब। मिनु सम्दी नित्तीकेमी सम्दी कली निप्पाइक्ब। इन कली चहिं वाइलपुकी नु निप्पाइक्ब। मिनु मुने दोक्नीनी।

10 जन्ती लनीनु, वाइल आन नित्तीकेम निस्सीने। मिनु खिं डा मुरुमी इन कली वाइल नु निश्शो तशा ‘ए जन्तीपुकी, एक पिने’ दे ब्रेशशा, इन कली मान पा ठेयब मुर नु निप्पाइक्ब। मिनु मेकेर बाक्बपुकीमी यो इन कली मान पाइनीम।

11 मारदे हना ठेयब सुंडसीब कली मुरपुकीमी महिक्थु मान मपाइनीमी। ठेयब मसुंडसीब कली चहिं मुरपुकीमी ठेयब सेल्शा, मान पाइनीम” दे शेंदीमी बाक्त। लूका १८:१४; मती २३:१२; याकूब ४:६,१०

12 मिनु खमे जथ ब्रेप्ब कली “गे जचा तूचा सेल्शा मान पा गेवीनु, आंम मुर वारचपुकी नु शोंप पाइशो मुर आन कली मब्रेत्तीमी। मारदे हना इ कली यो लेंशा ब्रेशशा मान पा जचा गेशा, इ देदेड लेत्नीम।

13 भोज पवीनु, पुडग आन कली कूंजी कुंजे, नु मिक्च मताइब आन कली ब्रेत्तीमी। ब्यवस्था १४:२९

14 मिनु मेकोपुकीमी इ देदेड लेन्ने मचाप्नीम। तन्न परमप्रभु यावेमी निसाफ पची ना इ पशो नेल्ले ताइनेवे” देंमाक्त। १कोरिन्थी १५:२३; प्रेरित २४:१५

ठेयब भोज  
मत्ती २२:१-१०

15 मिनु मेकेर बाक्ब कामी येसु आ लोव्र नेंशा “सु परमप्रभु यावे आ राज्यम ओव्रशा, जचा खेत्चा पुंडसीबा, मेको ग्येरसेक्ल” देंमाक्त। लूका १३:२९

16 मो देब कली येसुमी “मुर कामी ठेयब भोज का गेचा कली, शुश मुर आन कली ब्रेत्ता बाक्त।

17 मिनु जचा तूचा सेल्शा, आ गेय पाइब का कली ‘जचा तूचा ठीक पाता। मुल जथ पिन’ दे ब्रेत्थ सोइक्ता बाक्त।

18 मिनु गेय पाइब लशा, खिं कामी जाक्दीशशा ‘लो जथ पिने’ देंमेनु ‘गो रू ग्याप्ता। मुलाक्ती कोव्रथ लड देंती। मिनु पिचा मताइनुड, देंत, देनो’ देंमाक्त।

19 मिनु अर्को आ खिंमी जाक्दीम्मेनु ‘गो ५ हाल ब्यफ ग्याप्ता। मिनु मुलाक्त ब्वाक्शा, कोव्रथ लाइनुड। मोपतीके गो पिचा मताइनुड, देंत, देनो’ देंमाक्त।

20 मिनु अर्को खिं लमेनु, मेकोमी ‘गो ग्युंभे पाता। मिनु गो पिचा मताइनुड’ देंमाक्त। का का पा ‘पिचा मताइनुड’ दे मेको गेय पाइब कली लोव्र लेत्मे बाक्त। १कोरिन्थी ७:३३

21 मिनु गेय पाइबमी मेको लोव्र नेल्ल आ होव्रप कली शेंदा बाक्त। मिनु मेको गाइशशा ‘मो हना गे सहर मेर हिरशा लावो। मिनु पुडग, कूंजी कुंजे, मिक्च मताइब नु गुइ खोइल मदुक्ब आन कली खुप्शा चाक्मी’ दे सोइक्ता बाक्त।

22 मिनु ब्रेत्थ लशा चाक्शा, आ होव्रप कली ‘इन देंशो नेल्ल पाता, चिनु नित्तीकेम मुर मब्रीम’ देंमाक्त।

23 मिनु होव्रपमी ‘नित्तीके मब्रीम सम्म मुर आन कली “जाक्कीन है, जाक्कीन” दे ब्रेशशा चाक्मी। मिनु आं खिं ब्रील।

24 डोंइती आं ब्रेशशो सुइमी मारेइ यो जचा थोव्रक थाम्चा मतामेक्ल’ ” देंमाक्त।

येसु आ नोले दोपा खोइक्चा

25 येसु गाक्मेनु, शुश मुरुमी आ नोले खोदमे बाक्त। मिनु येसुमी मेको आन कली कोव्रशा

26 “सु सु गो नु बाक्चा दाक्नीमी, मेकोपुकीमी आम आफ, आंम मीश, आंम वोंइश, तमी तौ, लोकबपुकी नु आंम कली यो ममिम्थु, आं नोले खोइय्यीमील। मारदे हना मेको मिम्बपुकीमी आं नोले खोइक्ने मचाप्नीम। लूका १८:२९-३०; ब्यवस्था ३३:९; १कोरिन्थी ७:२९

27 सु सुमी आन श्येत कुरशा, आं कली मखोइक्नीमी, मेको आं शेंसीब दुम्ने मचाप्नीम। लूका ९:२३

28 मार, गेपुकीमी लाइशो खिं सेल्चा क्येडा डोंइती, सेल्ने थुम्चा कली क्येट जाक्दीप्बा देय मजाक्दीप्बा, दे हिसाब मपाइनीनी डा?

29 हिसाब मपथु सेल्चा गोशा, खिं सेल्ने मथुम्थु क्येट नुप्त हना

30 ‘आ क्येट मजाक्दीत्थु, मार सेल्चा गोवा?’ दे शुक्शी पाइक्चा पुंइसीशा मुने दोक्सीब।

31 पिप काम आ बाक्शो १० हजार लडाइ पाइब लाइशशा, २० हजार लडाइ पाइब बाक्शो पिप नु लडाइ पचा थुं पाप्तु हना, मेकोमी ग्राने चाप्नुडा देय मचाप्नुडा, दे ममिम्बा डा?

32 ग्राने मचाप्नुड, दे मिम्ताक्व हना, डोन बाक्मानु ‘दुशा बाक्च’ दे लोव्रसी पचा कली आ मुर सोइक्ब।

33 मोदेशो पा गे यो आं नोले खोइक्चा क्येडा डोंइती ‘खोइक्ने चाप्नुडा देय मचाप्नुडा’ दे मिम्तीने। गे नु बाक्शो मारेइ ममिम्थु, आं नोले खोइय्यीनी। ममिम्थु मचाप्नीनी हना, आं शेंसीब दुम्ने मचाप्नीनी। लूका ९:६२

34 हिक्सीम ब्रोव्रपाइक्ब। तन्न आ डाम्चा जाम्त हना, मारम मेको कली डाम्पाइक्चा। मत्ती ५:१३; मर्कूस ९:५०

35 मेको ना रू कली दुम्बा, ना मुर कली दुम्बा। मोपतीके मुरुम मेको कली ताइक्नीम। सु के नोफा बाक्मे, मेकोमी नेनल” दे शेंदीमी बाक्त।

## 15

“जाम्शो थिश्शा ग्येरसमल” दे शेंशो

1 मिनु शुश तिरो पोक्ब नु पापीपुकी येसु आ लोत्र नेंथ जाक्मा बाक्त।

2 मिनु फरिसी नु सास्त्रीपुकीमी तिरो पोक्ब नु पापी शुश येसु नु काथा बाक्शा जशो तशा “मेको मुरुमी पापी आन कली ब्राइब। पापीपुकी नु काथा बाक्शा, खमे जाइब” दे आन थुं मनुथु, लोत्र पामे बाक्त। लूका ५:३०; लूका १९:७

3 मिनु येसुमी मेको आन थुं मनुशो तुइक्ता बाक्त।

जाम्शो भेडा आ कथा

4 मिनु “मुर कामी सहे का भेडा थुल्शा, मेको आन कली योव्रडानु, भेडा का जाम्त हना, मार, मेकोमी लीशो ९९ भेडा आन कली प्रोंइशा, जाम्शो कली माल्थ मलाइबा डा? मथिदा सम्म माल्ना माल्न गाक्ब। मत्ती १८:१२-१४; लूका १९:१०; इजीकीएल ३४:१२; यूहन्ना १०:११-१२

5 मिनु मेको जाम्शो भेडा का कली थिश्शा, ग्येरसीशा, बलाम लाप्शा, आ खिं चाक्ब।

6 मिनु आ वारच आन कली ‘आं जाम्शो भेडा थिश्शा चाक्ता। मोपतीके नेल्ल ग्येरसय’ देंब।

7 मारदे हना ९९ परमप्रभु यावे गे लेत्वा ममाल्शो रिम्शो पाइब आन क्येडा पापी कामी पाप पचा प्रोंइशो तशा, स्वर्गम बाक्बपुकी ग्येरसीनीम” दे शेंताक्मी।

जाम्शो क्येट आ कथा

8 मिनु “मार, मीश मुर कामी १० ओटा द्राक्मे वोइश्शोमी का जाम्त हना, बत्ती दाशा, खिं गा, कुना लाडगा नेल्ल हिरशा, मथिदा सम्म ममाल्बा डा? द्राक्मे ग्रीक लोत्र बाक्ब। मेको देनार का खोदेंशो नाक्त का डा गाल्च बाक्त। देनार चहिं रोमी लोत्र बाक्ब।

9 मिनु थिश्शा आ वारच आन कली नु आ नेक्था डा मुर आन कली ब्रेशशा 'आं के जाम्शो द्राकमे का माल्शा थित्ता। मुल ग्येरसाक्यी' देंब।

10 मोपा पापी मुर कामी पाप पचा प्रोंइशा, आ थुं परमप्रभु यावे गे लेत्ताक्व हना, परमप्रभु यावे आ स्वर्ग डा गेय पाइबपुकी ग्येरसीनीम" दे माइक्मी बाक्त।

### जाम्शो तौ आ कथा

11 मिनु लोत्र बोइश्शा "मुर का के तौ निक्शी बाक्सा बाक्त।

12 मिनु काबु कान्छा तौमी 'आं आफ अडस योक्शा गेयी' देंमाक्त। मिनु आफोमी जेठा नु कान्छा आस कली अडस योक्शा, गेम्सी बाक्त।

13 मिनु कान्छामी इच्का नाक्त नोले आ अडस नेल्ल खुप्शा, क्येट नेल्ल कुरशा गाक्माक्त। मिनु जशा, तूशा, तेल्लेम पा, जवा ग्यारशा, क्येट नेल्ल थुमा बाक्त। हितोपदेस २९:३

14 मिनु मेको रागीमी अन्काल दुम्माक्त। मिनु कान्छामी श्येत जवा बाक्त।

15 मिनु मेको रागी डा मुर का आ खिंमी गेय पवा बाक्त। मिनु मेको मुरुमी कान्छा कली पोत्र योत्रब सेला बाक्त।

16 मिनु जचा मतथु, शोत्रलु बेक्शा, पोत्र कली जचा गेशो थोत्रकी यो जड खोदेशो दुम्माक्त। तन्न सुइमी मारेइ जचा मगेमे बाक्त। हितोपदेस २३:२१

17 मिनु शुश श्येत जशा 'आं आफ आ खिंमी गेय पाइबपुकीमी रूथ्री जाइनीम। हेंथ्री दुम्ब। गो चहिं शोत्रलुम बेक्चता।

18 मुल गो आं आफ आ खिं लेत्नुड। मिनु आं आफ कली "गो परमप्रभु यावे आ देशो मटिड। इन देशो यो मटिड। भजन संग्रह ५१:६; येरमीया ३:१२-१३

19 मुल इन तौ देंचा मशिरनुड। मोपतीके इन गेय पाइब का सेल्यीनी" दे माइक्नुड' दे मिम्ता बाक्त।

20 मिनु आ आफ आ खिं लेम्माक्त। मिनु आ आफ आ खिं जाकदीत्चावानु, आ आफोमी कान्छा कली पिशो तशा, शिशी पा दोरशा लशा मुप्शा पुक्पु पदा बाक्त।

21 मिनु मेकोमी 'आं आफ, गो परमप्रभु यावे आ देशो मटिड। इन देशो यो मटिड। मोपा मटितीके पापम गुम्ती। इन तौ देंचा मशिरनुड' देंमाक्त।

22 मिनु आफोमी गेय पाइब आन कली 'नेल्ल क्येडा दारशो फेक्तीक वा गुंडशा, आं तौ कली फेक्तीने। आ गुडमी औंठी लिक्तीन। जुत्ता मुइक्पतीने।

23 मिनु दोम्शो बाछा क्योरशा, क्येशा जचा तूचा सेल्शा, नेल्ल ग्येरसय।

24 मारदे हना आं बेक्शो तौ सेस दुम्त। आं जाम्शो तौ थित्ता' देंमाक्त। मिनु जशा तूशा नेल्ले ग्येरसमा बाक्त। एफिसी २:५

25 मेकोपुकी ग्येरसीशा बाक्मानु, जेठा तौ रूमी गेय पथ लशो बाक्माक्त। मिनु लेशशा खिं आ नेक्था जाक्मेनु, शुश मुर खुम्सीशा सिल पा, जशा तूशा ग्येरसीशा बाक्शो तवा बाक्त।

26 मिनु गेय पाइब का कली 'इं खिंमी मार दुम्मे?' दे हिल्लो पवानु,

27 मेकोमी 'इन लोकब जाक्त। मिनु इन आफोमी जाक्शो तशा, ग्येरसीशा, दोम्शो बाछा क्योरपाइक्तु' देंमाक्त।

28 मिनु मेको नेल्ल नेशा 'खिं मओव्रनुड' दे चुरशा बाक्माक्त। मत्ती २०:१५

29 मिनु आफोमी लेम्शा 'ओव्रडो, गे यो ग्येरसो' देंमेनु 'मार ग्येरसीनुडा, गो शुश बर्स एको खिं डा गेय पना पन बाक्ती। इन लोव्र नेल्ल टिशा बाक्ती। गेना हना यो रिम्शो ला पाता। तन्न आं वारचपुकी नु बाक्शा ग्येरसीचा कली बोका का यो मगेनी।

30 इन तौ कान्छामी इं खिं डा बाक्शो नेल्ल लाइशशा, तेल्लेम पा थुम्तु। मोदेशो मुर लेशशा जाक्मेनु, दोम्शो बाछा क्योरतीनी। मिनु मचुरनुडा डा?' देंमाक्त।

31 मिनु आफोमी 'आं तौ, गे गो नु काथा बाक्ते। आं मार मार बाक्मा, मेको नेल्ल इ के नमी।

32 इ लोकब चहिं बेक्शा रे ब्रोंइत। जाम्शो रे थिस्साक्व। मोपतीके गो नेल्ल ग्येरसय' देंमाक्त" दे येसुमी शेंदीमी बाक्त।

## 16

थुं का पा परमप्रभु कली ठेयब सेल्लीन

1 काबु येसुमी आ शेंसीब आन कली "क्येट थीब मुर कामी आ मार मार बाक्मा, मेको नेल्ल हिसाब पाइब का कली जिम्मा गेशा वोइशशो बाक्माक्त। मिनु काबु मुरपुकीमी 'हजुर, इन हिसाब पाइबमी क्येट मारेइ मारेइ हेंथे पा थुम्तु' दे शेंदमे बाक्त।

2 मिनु क्येट थीबमी आ हिसाब पाइब कली ब्रेशशा 'गेमी आं क्येट थुम्शा गेयी बाक्त। डोंइती रे डा दोशो चेमी दोशो थुमी, लो, नेल्ल कोइदी। मुल डा मेरे इ कली मवोइक्नन' दे मदा बाक्त।

3 मिनु मेकोमी 'आं गेय रोइशशा सोइक्ताकयी। मुल गेय मताइनुड। कोदाली देने यो मचाप्नुड। पुंइशा जचा कली यो मुने पाइनुड।

4 मुल मार पचा माल्नुडा। गो मेको तुइक्नुड। मुर आन खिं लडानु आं कली दोपा लोत्र पाइनीमी, मेको यो तुइक्नुड' दे मिम्ता बाक्त।

5 मिनु मेकोमी आ होत्रप आ जेर लाइब आन कली का का पा ब्रेशशा, डोंइती जाक्ब कली 'गे दोशो, मार लदी?' दे हिल्लो पवा बाक्त।

6 मिनु मेकोमी 'सहे का बाथ जचा तेल लाइशशो नड' देंमेनु 'लो, नक कागज का सेल्स। मिनु जोल पा ५० बाथ ला ब्रेक्ताक्स' देंमाक्त। बाथ का २२ लिटर खोदेशो बाक्ब।

7 मिनु अर्को कली 'गे दोशो मार लदी' दे हिल्लो पवानु, 'सहे का कोर चेरब लाइशशो नड' देंमेनु 'लो, नक कागज सेल्शा, जोल पा ८० कोर ब्रेक्ताक्स' दे नक कागज का सेल्से बाक्त। कोर का २२० लिटर बाक्ब।

8 मिनू जेर लाइक्ब नेल्ल आन के नक कागज सेल्शा, होत्रप कली कोंइदा बाक्त। मिनू मेकोमी कोत्रशा 'गे मेको आन कली वारच सेल्शा, निप्स पाइश्शो गेय पा कोंइताक्यी' देंमाक्त। रागीमी थमा सुइक्ब क्येडा थमा मसुइक्बपुकीमी निप्स पाइश्शो गेय पाइनीम। एफिसी ५:८-९

9 मोपतीके गे यो निप्स पाइश्शो गेय पा वारचपुकी सेलीने। इन शोंप क्येट मारेइ मारेइ यो मथीब आन कली शिशी पा गेतीनी हना, परमप्रभु यावेमी इन पशो खोदेशो पा गेब” देंमाक्त। लूका १४:१४; मत्ती ६:२०; मत्ती १९:२१

### थुं निक्शी पाइश्शो मदुमीन

10 मिनू लेंशा “सुमी थम आइक्च गेय कली रिम्शो पा पाइबा, मेकोमी ठेयब गेय यो रिम्शो पा पाइब। सुम आइक्च गेय, दे मरिम्शो पा पाइबा, मेकोमी ठेयब गेय यो मरिम्शो पा पाइब। लूका १९:१७

11 मोपतीके गे रागी डा क्येट आ पबर्म जोल पाइब दुम्तीनी हना, स्वर्ग डा शोंप दोपा ताइब दुम्ने चाप्नीनी?

12 गे अर्को मुर आन थोत्रक आ पबर्म जोल पाइतीनी हना, आंमा इन शोंप इन कली सुम गेबा डा?

13 गेय पाइब कामी होत्रप निक्शी आस गेय पने मचाप्ब। मारदे हना का आ देशो टिप्टु हना, अर्को कली मटीब दुम्ब। का कली दाक्ताक्व हना, अर्को कली चहिं काइ मदाक्ब। मोपतीके गे यो परमप्रभु यावे नु शोंप निक्शी आस नोले खोइक्ने मचाप्नीनी” दे येसुमी शेंदीमी बाक्त। मत्ती ६:२४

### फरिसी आन कली हुइश्शो

14 फरिसीपुकीमी क्येट नु शोंप दाक्बाक्मा बाक्त। मिनू येसु आ लोत्र नेंशा गाइश्शा, शुक्शी पामे बाक्त।

15 मिनू येसुमी “मुर आन कली 'गो ठीक नकी' देंखु पा कोंइनीनी। मिनू मुरपुकीमी इन कली ठेयब सेल्नीम। परमप्रभु यावेमी चहिं इन



मिम्शो नेल्ल तुइक्ब। मुर आन दातेमी हिक्सीशो नेल्ले परमप्रभु यावे आ डोंइती थम आइक्च दुम्नीम। लूका १८:९-१४

### साइ ब्रेक्शो लोत्र आ पर्वम शेंशो

16 साइ डोंइती रे परमप्रभु यावे आ अरेशो लोत्र नु आ लोत्र पाइब आन ब्रेक्शो यूहन्ना आ पाला सम्म शेंताक्म। यूहन्ना जाक्म रे परमप्रभु यावे आ राज्य डा लोत्र नेंपाइक्नीम। मिनु शुश मुरुमी मेको लोत्र नेंशा, थमा सुइश्शा, परमप्रभु यावे आ राज्यम ओत्रचा बोल पाइनीम। मत्ती ११:१२-१३

17 परमप्रभु यावेमी ब्रेक्पाइश्शो लोत्र का यो मग्याम्ब। मेको ग्याम्चा क्येडा सरीड नु रागी ग्याम्ब। मत्ती ५:१८; मत्ती १९:९

18 सुमी आ मीश कली प्रोंइशा, अर्को मीश चाक्बा, मेकोमी मीश वोंइश आस नाता खोइश्शा, हेंथे पाइब। सुमी आ वोंइश नु ब्राशा गाक्शो मीश चाक्बा, मेकोमी यो वोंइश मीश आस नाता खोइश्शा, हेंथे पाइब।

### शोंप पाइश्शो मुर नु लाजरस

19 शुश शोंप पाइश्शो मुर का बाक्माक्त। मेको रिम्शो रिम्शो फेक्शा, ब्रोत्रब्रोत्रशो जशा बाक्बाक्माक्त।

20 आ खिं डा लाडगाम चहिं जचा मतथु, श्येत जशो लाजरस माइश्शो मुर का गोल्शा बाक्बाक्माक्त। मेको रोइ पा आ रां नेल्ल गार गूशा राक्शो बाक्माक्त।

21 मेको शोंप पाइश्शो मुरुम आ जशो रे खपीम दोक्शो जचा ताइनुडा कों, दे आस पा कोत्रशा बाक्बाक्माक्त। आ गार कुचुमपुकीमी तुक्बाक्मा बाक्त।

22 मिनु लाजरस शुश श्येत जशा बेक्माक्त। मिनु परमप्रभु यावे आ स्वर्ग डा गेय पाइबमी अब्राहाम आ थुकुमी वोदमे बाक्त। मेको नोले शोंप पाइश्शो मुर यो बेक्शा थिम्चा पुंइसे बाक्त।

23 मेको शोप पाइशो मुर बेक्शो मुर आन बाक्तीक जाक्दीम्माक्त। मिनु शुश श्येत जशा, डोन रे कोव्रडानु, लाजरस कली अब्राहाम आ थुकुम बाक्शो तवा बाक्त।

24 मिनु ठेयब सेंदा पा 'ए, आं आफ अब्राहाम, शिशी पाइय्यीनी। मारदे हना गो मीम दुप्शा, आं शोव्र सोव्रशा बेक्चता। लाजरस कली आ ब्रेचो ब्वाक्कु खुम्शा, ब्वाक्कु तोक्पाइक्थ सोइक्तीने' दे ब्रेम्माक्त।

25 तन्न अब्राहाममी 'डोंइती थम रिम्शो पा बाक्ते। लाजरस चहिं शुश श्येत जशा बाक्त। मुल चहिं लाजरस आ थुं नाइक्चा ताप्तु, गे चहिं श्येत जशा बाक्नेवे। लूका ६:२४

26 मोशो ला ममाइ। परमप्रभु यावे आ राज्य डा मुर नरक मलाइनीम। मिनु नरक डा मुर यो परमप्रभु यावे आ राज्यम ओव्रचा मताइनीम' देंमाक्त।

27 मिनु मेकोमी 'आं आफ, सेउ पाइनन्नी, खिंमी आं के ५ जना लोकब बाक्नीम।

28 मेको आन कली "इन लोकब बेक्शा, नरक लशा श्येत जशा बाक्त। आ पशो खोदेशो मपने। मो पाइतीनी हना, आ खोदेशो दुम्नी" दे माइक्थ, लाजरस कली सोइक्तीने' दे सेउ पवा बाक्त।

29 मिनु अब्राहाममी 'परमप्रभु यावेमी मोसा कली ब्रेक्पाइशो लोव्र नु परमप्रभु यावे आ लोव्र पाइब आन ब्रेक्पाइशो लोव्र मेकोपुकी नु बाक्नीम। मेको पढेशा नेन्मेक्ल' देंमेनु, २तिमोथी ३:१६

30 'ममाइ, आ आफ, बेक्शो रे सेंसीशो मुर सोइक्ताक्नी हना ला, मेको आ लोव्र नेंशा टिशा, पाप पचा प्रोइशा, आन थुं परमप्रभु यावे गे लेत्नीम' दे सेउ पवा बाक्त।

31 मिनु अब्राहाममी 'ममाइ, परमप्रभु यावे आ ब्रेक्पाइशो लोव्र मटिम्तेक्म हना, बेक्शो रे सेंसीशो मुर तशा यो थमा मसुइक्नीम' देंमाक्त" दे येसुमी शेंदीमी बाक्त।

# 17

पाप पपाइक्ब बोकनीम, दे शेंशो

मत्ती १८:६-७; मत्ती १५:२१-२२; मर्कूस ९:४२

1 काबु येसुमी आ शेंसीब आन कली “मुरपुकीमी पाप पपाइशशा दाइल पाइक्चा गोइनीम। तन्न सुइमी अरु आन कली दाइल मपपदल, मारदे हना दाइल पपाइक्ब कली शुश मरिम्शो दुम्ब। मत्ती १८:६-७

2 मेको आ शुरमी यात क्युक्शा, समुन्द्रमी खुम्शा साइक्चा अरु सजाइ क्येडा रिम्शो दुम्ब।

3 इन कली का का पा शेंनन्नी। मिनु नेनीने। इ लोकबमी पाप पाप्तु हना, मेको कली ‘मो मपचा’ दे अर्ती गेवो। इ अर्ती नेंशा माफ पुंइतु हना, माफ गेवो। मत्ती १८:१५

4 काबुम ७ खेयप पाप पशा, ७ खेयप माफ पुंइथ जाक्त हना यो, ७ खेयप माफ गेवो” दे शेंदीमी बाक्त। मत्ती १८:२१-२२

थमा सुइक्तीक बारपाइक्चा, दे पुंइशो

5 मिनु शेंसीबपुकीमी येसु कली “प्रभु, आंइ थमा सुइक्तीक थुं बारपा गेकी” दे पुन्मे बाक्त।

6 मिनु प्रभुमी “रायो गेडा खोइ ला थमा सुइक्तीनी हना, इन पने मचाप्चा डा मारेइ मलीब। एको रवा कली ‘शाक्श सुन्दा दुल्शा समुन्द्रम याक्सो’ देंनीनु, एको रवा यो याक्सीब।

गेय पाइबम गाल्च ला ताइब, दे शेंशो

7 नेनीने, मिनु मिम्तीने। इन गेय पाइब कामी ब्यफ वाक्शा, कि बी योत्रशा, खिं लेशशा जाक्मेनु, खमे खेत्नीनी डा? ममाइ।

8 गेमी ‘लो, मी मुइशशा, खमे क्येशा थुल्यी। मिनु गे यो जावो’ देंनीनी।

9 गेय पाइबमी अरेशो गेय पवानु, आ ठेयब मुरुमी सेवासी गेबा डा?

10 गेपुकी गेय पाइब ननी। परमप्रभु यावेम इन कली आ गेय पाइब सेल्शा, गेय पपाइवतु। मिनु एको गेय पशा 'परमप्रभु यावे आ देंशो पाइतय। तन्न सेवासी गेने मपुंडसय। मारदे हना आ वोइशशो मुर नय' दे मिम्तीने" दे शेंदीमी बावत। १कोरिन्थी ९:१६

कोव्रर पाइब आन कली सापाइशशो

11 मिनु यरूसलेम डा लां खोइशशा, गालील नु सामरीया रागी आन दाते डा लां लमा बावत। लूका ९:५१; लूका १३:२२

12 मिनु काबु गाउं का जाकदीम्मानु, १० जना कोव्रर पशो मुरपुकीमी "येसु पीब" देंशो नेंशा, लां कोव्रशा बाक्मा बावत। लेवी १३:४५-४६

13 मिनु मेकोपुकीमी "येसु, शेंब, आंइ कली शिशी पाइक्की" दे सेउ पा ब्रेम्मा बावत।

14 मिनु येसुमी मेको आन कली तशा "गेपुकी, चढेब आ डोंइती लशा, इन साशो रां कोंइदीने" दे सोइक्तीमी बावत। मिनु लना लन लांमीन आन कोव्रर सामा बावत। लूका ५:१४

15 कामी आ रां साशो तशा, फ्रा लेशशा परमप्रभु यावे कली ठेयब सेला बावत।

16 मिनु दोरशा पिशा, येसु आ डोंइती बाप्शा खुम्की पा "प्रभु, गे आं कली रिम्शो पाइतीनी" दे सेउ पवा बावत। मेको सामरीया डा मुर बाक्मावत।

17 मिनु येसुमी "१० जना आन कली सापदुमी ममाइ डा? अरु ९ जना ते लाग्मे?"

18 मेको सामरीया डा मुर ला परमप्रभु यावे कली ठेयब सेल्शा 'गे रिम्शो पाइब बाक्नीनी' देंथ जाक्मे?" देंमावत।

19 मिनु "गे रिम्शो पाइब बाक्नीनी" देंथ जाक्ब कली "इ पिया पोक्को। आं कली थमा सुइक्तीवी। मोपतीके साते" देंशा सोइक्ता बावत। लूका ७:५०

परमप्रभु आ राज्य आ पबर्म शेंशो

मत्ती २४:-; मर्कुस १३:-

20 मिनु फरिसीपुकीमी येसु कली “परमप्रभु यावे आ राज्य जाक्चशो गेना तांइसीबा, दोपा तांइसीबा?” दे हिल्लो पामे बाक्त। मिनु येसुमी “परमप्रभु यावे आ राज्य मिक्चीम तचा डा पा मतपांइसीब। यूहन्ना १८:३६

21 एक जाक्त, मेरेक जाक्त, दे मदेनीम। नेनीन, परमप्रभु यावे आ राज्य जाक्ने थुम्शा, गेपुकी नु बाक्त” दे शेंदीमी बाक्त।

22 मिनु आ शेंसीब आन कली नोले दुम्ब लोत्र पा “दोपा मुल रागीम जरमेशो नु काथा बाक्चा तनी, मोपा नोले चिनु काथा बाक्चा दाक्नीनी। तन्न काथा बाक्चा मताइनीनी।

23 मिनु मुरपुकीमी ‘परमप्रभु यावे आ सोइशो हुकुम पाइब एक जाक्त, मेरेक जाक्त, इरी जाक्त, उयु जाक्त, कोत्रथ लय’ देंमानु, मेको थमा मसुइक्थु, मेको आन नोले मखोतीन। लूका २१:८

24 रागीम जरमेशोमी चिन्ड कोइशा तपांइसेनु, चिला पवानु, चिलाम नां दाप्तीक रे नां पेरतीक सम्म थिशो तांइसीशो बाक्ब।

25 मोपा तपांइसीचा क्येडा डोंइती शुश श्येत जचा माल्ब। मारदे हना एको पाला डा मुरपुकीमी आं कली मब्रथु, आं लोत्र मनेनीम, थमा मसुइक्नीम। लूका ९:२२

26 रागीम जरमेशो जाक्मेनु, मुरपुकीमी नोआह आ पालामी पशो खोदेशो पाइनीम।

27 नोआह ठेयब डोंगाम मओत्रम सम्म मुरपुकी जशा तूशा, ग्युंभे पशा, ग्युंभे पांइसीशा बाक्मा बाक्त। मिनु रेउ यिशा मुर नेल्ल बेक्मा बाक्त।

28 लोत आ पालामी यो मोदेशो दुम्माक्त। मुरपुकीमी जचा फेक्चा, ग्याप्चा लेयचा, खुम्शा मीमेनु रिक्चा नु मार मार सेल्चा मिम्तमे बाक्त। उत्पत्ती १९:१५, २४-२५

29 काबु चहिं लोत सोदोम प्रोंइशा प्रोक्मेनु, परमप्रभु यावेमी सरीड रे मी नु बारुक तोक्पदा बाक्त। मिनु सोदोम सहरम बाक्ब नेल्ल बेक्मा बाक्त।

30 रागीम जरमेशो जाकशा तपांडसेनु, नोआह नु लोत आस पालाम दुम्शो खोदेशो दुम्ब।

31 में नाकती बारदलीम बाकबमी खिं गाम मार मार बाकमा, मेको ब्रदीचा ममालीन। रूमी गेय पाइब खिं मलेतीन।

32 लोत आ मीश दोपा बेकमे, मेको मिम्तीने। उत्पत्ती १९:२६

33 आ गिंम प्रोंइचा माल्ब के आ गिंम योल्ब। आ गिंम सोइकबमी आ गिंम प्रोंइब। लूका ९:२४

34 मिनु मुर निक्शी ब्राख्ये कामी इप्शो बाकनीस। का लाइक्चा पुंडसीब, का प्रोंइशा वोइक्चा पुंडसीब।

35 मीश मुर निक्शी यात हिल्शा बाकनीस। का लाइक्चा पुंडसीब, का प्रोंइशा वोइक्चा पुंडसीब।

36 वोंइश मुर निक्शी रूम गेय पा बाकनीस। का लाइक्चा पुंडसीब, का प्रोंइशा वोइक्चा पुंडसीब, दे इन कली देंनुड” दे शेंदीमी बाक्त। मत्ती २४:४०

37 मिनु आ शेंसीबपुकीमी “प्रभु, इन देशो तेकेर दुम्बा?” दे हिल्लो पामेनु “तेकेर सिनु बाकमे, मेकेरन गिद हिरसीनीम” देंमाक्त।

## 18

### पुंडचा मप्रोंइचा, दे शेंशो

1 मिनु येसुमी आ शेंसीब आन कली “परमप्रभु यावे कली पुंडचा नु ‘गे रिम्शो पाइब बाकनीनी’ देंचा गेनायो मप्रोंइचा” दे रुप्पाइक्चा कली कथा सेला बाक्त। १थिस्सलोनिकी ५:१७

2 मिनु मेकोमी “सहर कामी निसाफ पाइब का बाक्माक्त। मेको सुइ नु महिंब बाक्माक्त। परमप्रभु यावे कली ममिम्थु, मुर आन लोत्र यो मनेंथु, आ थुमी मार पिमे में ला पाइबाक्माक्त।

3 मेको सहरमी आ वोंइश बेक्शो मीश मुर का बाक्माक्त। मेको मीश मुर मेको निसाफ पाइब आ बाक्तीके जाक्ना जाक्न ‘आं

कली दोस गेब आन कली सजाइ गेशा, आं कली ग्रापाइय्यीनी' देंबाक्माक्त।

4 शुश नाक्ती सम्म निसाफ पाइबमी मेको कली आ पुंइशो मगेवा बाक्त।

5 काबु चहिं 'परमप्रभु यावे कली मान पा महिंथु, मुर आन लोव्र यो मनेंथु, आं थुंमी मार पिमे में ला पा बाक्ती। तन्न मेको मीश मुरुम नाक्त किंत किंत जाक्शा, श्येत गेती। मुल आ लोव्र नेंचा ब्रीताक्ड, नेंने यो मदाक्ड। आ देंशो मपाता हना, जाक्स डा जाक्स पाइब। मोपतीके मेको आ देंशो मपथु मप्रोंइनुड' दे मिम्ता बाक्त। लूका ११:७-८

6 मेको निसाफ पाइब आ मिम्शो मिम्तीने।

7 मारदे हना निसाफ पाइब आ पशो खोदेंशो पा परमप्रभु यावेमी आ योव्रशो आन कली आन पुंइशो मगेबा डा? मेकोपुकीमी नाक्त किंत किंत पुंइचा मप्रोंइथु बाक्नीम। मुल मगेप्टु हना, काबु डा काबु गेब। मिनु ग्रापाइक्ब।

8 रागीम जरमेशो तपांइसेनु, थमा सुइश्शा, परमप्रभु यावे कली पुंइशा 'गे रिम्शो पाइब बाक्नीनी' देंस डा देंस बाक्शोपुकी ताइबा को?" दे येसुमी देंमाक्त।

### ठेयब मसुंइसीचा, दे शेंशो

9 काबु येसुमी अरु आन कली महिंथु, ठेयब सुंइसीशो आन कली लोव्र पवा बाक्त। मेकोपुकीमी "गो आंम पचा माल्शो पा ठीक दुम्तक" दे मिम्शो बाक्मा बाक्त। रोमी १०:३

10 मोदेंशो ठेयब सुंइसीब आन कली "मुर निक्शी परमप्रभु यावे आ खिंमी परमप्रभु यावे कली प्रार्थना पथ लसा बाक्त। का फरिसी बाक्माक्त, का तिरो पोक्ब बाक्माक्त।

11 फरिसीमी मुर नेल्ल आन कली तपांइसीशा, चढेतीक आ नेक्था राप्शा 'परमप्रभु यावे, गे रिम्शो पाइब बाक्नीनी। मारदे हना गो अरु मुर खोदेंशो पा मुर आन मार मार रोइक्ब मनड। गो

जोल पाइब यो मनड। मीश वोंइश आस नाता खोइक्ब मनड। मेरे तिमो पोक्ब खोदेशो पापी मनड। यसैया ५८:२-३

12 साता कामी खेयप निक्शी माइजा बाक्नुड। क्येट ताक्गुनु, १० भाग डा भाग का योक्शा गेनुड' दे प्रार्थना पवा बाक्त। मत्ती २३:२३

13 तिमो पोक्ब चहिं हारे बाक्शा, शुर खुक्शा 'परमप्रभु यावे, गो पापी नड। शिशी पाइयीनी' दे प्रार्थना पवा बाक्त। भजन संग्रह ५१:१३, १९

14 परमप्रभु यावेमी मेको कली आ पाप क्याम्शा, ठीक दुम्पाइक्तु। मिनु ठीक दुम्शा, आ खिं लेत्त। फरिसी चहिं पाप क्याम्चा मतव। मारदे हना सुमी ठेयब सुंडसीबा, मेको महिक्शो दुम्ब। ठेयब मसुंडसीब कली चहिं परमप्रभु यावेमी ठेयब सेल्ब" दे येसुमी माइक्मी बाक्त। मत्ती २१:३१; लूका १४:११; मत्ती २३:१२

### आल आन कली आसीक गेशो

15 मिनु मुरपुकीमी येसुमी आल आन कली थिवल, दे चाक्मेनु, शेंसीबपुकीमी आल चाक्ब आन कली हुइक्तमे बाक्त।

16 तन्न येसुमी मेको आन कली ब्रेशशा "आल आन कली आं बाक्तीके चाक्चा मतेक्कीन। मारदे हना परमप्रभु यावे आ राज्य आल आन केन बाक्ब।

17 नोफा दाइशशा नेनीने, मुरपुकीमी आल आन थुं डा मिम्शो खोदेशो पा ममिम्ताक्म हना, परमप्रभु यावे आ राज्यम ओव्रचा मताइनीम" दे माइक्मी बाक्त।

### शोंप आ पर्बम लोव्र

मत्ती १९:१६-२६; मर्कूस १०:१७-२७

18 मिनु ठेयब मुर कामी येसु कली "गे रिम्शो शेंब बाक्नीनी। गेना हना यो ब्रोंइशा बाक्चा कली मार पचा माल्नुडा?" दे हिल्लो पवानु, लूका १०:२५-२८

19 येसुमी "मारदे आं कली रिम्शो मुर, दे माइय्यीनी? सुइ रिम्शो मनमी। परमप्रभु यावे ला रिम्शो बाक्ब।



20 परमप्रभु यावेम ब्रेकपाइशो लोत्र तुइकनीनी 'वोंइश मीश आस नाता मख्रोइक्चा, मसाइक्चा, खुइ मपचा, सांकछी बाक्शोनु जोल मपचा, आम आफ आस कली मान पचा' ” दे मदा बाक्त। प्रस्थान २०:१२-१६

21 मिनु मेकोमी “आल रेन मोदेशो पा पिशो नड” देंमाक्त।

22 मिनु येसुमी “नेल्ल पाप्तीवी, का चहिं मपवी। इ शोंप नेल्ल लेयशा, क्येट मथीब आन कली योक्शा गेमी। मिनु आं नोले खोइय्यी। मिनु इ शोंप स्वर्गम बाक्ब” देंमाक्त। मत्ती ६:२०

23 मिनु येसु आ लोत्र नेंशा, आ थुं खाइक्माक्त। मारदे हना मेको शुश शोंप पाइशो मुर बाक्माक्त।

24 येसुमी मेको आ थुं खाइशो तुइशशा, मिक्च मयाक्थु कोत्रशा “शुश शोंप पाइशो मुर परमप्रभु यावे आ राज्य ओत्रचा गिश श्येत बाक्मे। लूका १९:९

25 शोंप पाइशो मुर परमप्रभु यावे आ राज्य ओत्रने चाप्चा क्येडा दालओठ लूजे आ पोलाम ग्रीने चाप्ब” देंमाक्त।

26 येसु आ लोत्र नेंबपुकीमी “मो हना सु ओत्रचा ताइबा डा?” देंमा बाक्त।

27 मिनु येसुमी “मुर आन पने मचाप्शो परमप्रभु यावेमी पने चाप्ब” दे माइक्मी बाक्त।

नेल्ल प्रोंइबम मार ताइनीमी

मत्ती १९:२७-३०; मर्कूस १०:२८-३१

28 मिनु पत्रुसमी “गोपुकी आंइ खिं प्रोंइशा, इन नोले खोइक्तक” देंमाक्त।

29 मिनु येसुमी “नोफा दाइशशा नेनीने, सुमी आ खिं, आ मीश, आ वोंइश, आ लोक्बपुकी, आम आफ, तमी तौ नु मारेइ मारेइ नेल्ल परमप्रभु यावे आ राज्य आ पर्बम प्रोंइबा, मेकोमी मुल एको रागीम बाक्मेनुन आ प्रोंइशो क्येडा शुश ताइब।

30 मोशो ला ममाइ, नोले गेना हना यो परमप्रभु यावे नु बाक्चा ताइब” देंमाक्त।

रागीम जरमेशोम साइक्चा पुंडसीब

मत्ती २०:१७-१९; मर्कूस १०:३२-३४

31 मिनु येसुमी आ १२ जना शेंसीब आन कली “नेनीने, मुल यरूसलेम लाइनय। मेकेर जाक्दीशशो नोले रागीम जरमेशो आ पर्बम साइ परमप्रभु यावे आ लोव्र पाइबपुकीम ब्रेक्शो लोव्र नेल्ल थमा दुम्ब।

32 रागीम जरमेशो अर्को जात डा मुर आन गुइमी गेचा पुंडसीब। मिनु मेकोपुकीमी शुक्शी पा, मेको आ कुलुम तोक्नीम।

33 मिनु युक्शा, हुश यिपाइक्नीम। मिनु नोले साइक्नीम। साइशशो आ नित्थ नाक्त बेक्शो रे सेंसीब” दे शेंदीमी बाक्त।

34 आ लोव्र नेंशा, मारेइ मरुप्मे बाक्त। मारदे हना खुइशशो लोव्र बाक्माक्त।

मिक्च मताइब कली सापाइशशो

मत्ती २०:२९-३४; मर्कूस १०:४६-५२

35 मिनु यरीको सहर आ नेक्था जाक्दीम्मानु, लांमी मिक्च मताइब पुंडब मुर का बाक्माक्त।

36 मेको मिक्च मताइबमी शुश मुर लोव्रसी पा पिशो नेंशा “सु ननी? ते लनी? मार माल्नी?” दे हिल्लो पवानु

37 “नासरथ डा येसु एको लां पित” देंमा बाक्त।

38 मिनु मिक्च मताइबमी “हे येसु, दाऊद आ तौ, शिशी पाइय्यी” दे ब्रेम्माक्त।

39 मिनु येसु आ डोंइती गाक्बपुकीमी “सिक्सी पावो” दे हुइक्तमे बाक्त। आं चहिं वाइ ब्रेशशा “दाऊद आ तौ, शिशी पाइय्यी” देंमाक्त।

40 मिनु येसु खा दिक्शा “मेरे मिक्च मताइब कली एक चाक्कीन” देंमाक्त। मिनु चाक्मेनु

41 “इ कली मार पड? मार पुंइनेवे?” दे हिल्लो पवानु “प्रभु, मिक्च ताइब सेल्यीनी” दे पुना बाक्त।

42 मिनु “इ मिक्च साल। इ थमा सुइश्शोमी साते” दे मदा बाक्त।

43 मो मदानु, आ मिक्च ब्रा साशा, मिक्च ताइब दुम्शा, येसु आ नोले खोइश्शा, परमप्रभु यावे कली मान पवा बाक्त। मेको कली मिक्च ताइब दुम्शो तशा, मुर नेल्लेमी यो परमप्रभु यावे कली ठेयब सेल्मे बाक्त।

## 19

### तिरो पोक्ब जक्कै

1 मिनु यरीको सहरम जाक्दीश्शा, बास मबाक्चा, दे गाक्मा बाक्त।

2 मेको सहरमी जक्कै नें पाइश्शो शुश शोप पाइश्शो तिरो पोक्ब ठेयब मुर का बाक्माक्त।

3 मेकोमी “इ सहरम येसु जाक्ब” देशो नेंशा “गो कोव्रथ लाइनुड” दे मिम्ता बाक्त। सहर डा मुरपुकी यो “येसु कली कोव्रचा” दे लांमी रिम्शा, आ लां कोव्रशा बाक्मा बाक्त।

4 जक्कै अरु आन क्येडा आइक्च बाक्माक्त। मिनु शुश मुरुमी लांमी रिम्शा फारशो तशा, मेको आन डोंइती लशा, रवा का डोइश्शा कोव्रडा बाक्त।

5 मिनु येसु मेको लां पिमेनु, जक्कै कली रवाम डोइश्शा बाक्शो तशा “ए जक्कै, फ्रु तोंइसो। मारदे हना मुलाक्दो इ खिंमी बास बाक्नुड” देंमाक्त।

6 मिनु जक्कै फ्रु तोंइसीशा, ग्येरसीशा आ खिं लाइश्शा, बास बाक्चा गेवा बाक्त।

7 मेकोमी मोदेशो पशो तशा, मेकेर बाक्बपुकीमी “मेको पापी आ खिंम ओव्रशा बास बाक्त” दे आन थुं मनुथु, लोव्र पामे बाक्त।  
लूका १५:२

8 मिनु जककैमी प्रभु कली खिंम ओइशा “हे प्रभु, आं शोंप क्येट नेल्ल उइक्थ पा योक्शा, मथीब आन कली गेनुडमी। सु सु कली हिम हिम पा मार मार ताक्गु, मेको आन कली ४ खेयप तेम्शा लेशशा गेनुडमी” देंमाक्त। प्रस्थान २१:३७; इजीकीएल ३३:१४-१६

9 मिनु येसुमी “थमा पा इ खिंमी बास बाक्शो रिम्शो दुम्त। मारदे हना गे पाप रे ब्रोंइते। इं किकी पिपी अब्राहाम आ तौ बाक्डे बाक्त। लूका १३:१६

10 रागीम जरमेशो लां साम्शो आन कली लां कोंइथ जाक्त” देंमाक्त। लूका ५:३२; इजीकीएल ३४:१६; १तिमोथी १:१५

ठेयब मुर लेशशा जाक्ब, दे शेंशो

मत्ती २५:१४-३०

11 मिनु यरूसलेम आ नेक्था जाक्दीम्मा बाक्त। मिनु शुश मुरुमी “यरूसलेम जाक्दीशशा नोले येसु पिप दुम्ब। मिनु परमप्रभु यावे आ राज्य पशो तांडसीब” दे मिम्शो बाक्मा बाक्त। येसुमी मेको आन मिम्शो तुइशशा कथा सेल्शा

12 “खेयप का ठेयब मुर का पिप रे सासन पतीक ताक्चा कली डोन रागी लचा चिक्शो बाक्माक्त।

13 मिनु मेकोमी ‘गो शुश नाक्ती खिंम मबाक्नुड’ दे तुइशशा, लचा डोंइती आ गेय पाइब १० जना मुर आन कली ब्रेशशा, का का पा मीना का का गेशा ‘एको क्येटम खेलो पने। नोले जाक्डानु, लेशशा गेयीनी’ दे गाक्माक्त। मीना का १०० देनार बाक्ब। देनार का नाक्त का डा गाल्च बाक्माक्त। देनार रोमी आन चांदी के क्येट बाक्माक्त। मत्ती २०:२

14 मेको मुर गाक्म नोले मेको रागी डा मुरपुकीमी ‘मेको मुर आंइ कली सासन पाइब मदुम्ल’ दे लोव्र कुरब मुर मेको पिप आ बाक्तीक सोइक्तमे बाक्त। मारदे हना मेको कली मदाक्बाक्मा बाक्त। यूहन्ना १:११

15 मो हना यो मेकोमी सासन पतीक अधिकार ताक्शा, खिं लेम्माक्त। मिनु जाक्शा, आ गेय पाइब आन कली ब्रेशशा, आ

डोंइती राप्पाइशशा 'आं गेशो क्येटमी मार पनी? गिश सेल्नी?' दे हिल्लो पवा बाक्त।

16 मिनु डोंइती डा जाक्शा 'आं होत्रप, इन गेशो क्येटमी, मार मार ग्याप्शा लेयशा, अर्को १० मीना चेम्ता' देंमाक्त।

17 'गे रिम्शो गेय पाइब बाक्ते, आइक्च गेयमी रिम्शो पाप्तीवी। मोपतीके १० ओटा सहर कली अधिकार पाइब सेल्नन' देंमाक्त। लूका १६:१०

18 मिनु मेको नोले अर्को जाक्शा 'आं होत्रप, इन गेशो क्येटमी ग्याप्शा लेयशा, अर्को ५ मीना चेम्ता' देंमाक्त।

19 मिनु मेकोमी 'इ कली यो ५ ओटा सहर कली अधिकार पाइब सेल्नन' देंमाक्त।

20 मिनु मेको आ नोले अर्को जाक्शा 'आं होत्रप, इन क्येट एकेर बाक्त। गो मेको वाम गिल्शा खुइशशा वोइक्ता।

21 गो इन क्येडा हिंती। मारदे हना गे हिंचा डा होत्रप बाक्नीनी। इन मगेशो थोत्रक ताक्नीनी। इन मशोक्शो खुप्नीनी' देंमाक्त।

22 मिनु ठेयब मुरुमी 'गो इ लोत्रम इ कली निसाफ पाइनुड। आं देंशो मटीब गेय पाइब बाक्नेवे। मार मगेडा, मेको ताक्नुड। मार मशोक्गु, मेको खुप्नुड। गो मरिम्शो मुर नडा दे गे तुइशोन नवे?

23 गे मारदे मेको क्येट वोइक्तीक खिंमी मवोदी? गो मेको आ चाइक्ब तड वा' देंमाक्त।

24 मिनु मेकेर बाक्ब आन कली 'मेको आ क्येट रोइशशा १० मीना चेम्ब कली गेने' देंमाक्त।

25 मिनु मुरपुकीमी 'हजुर, मेको नु १० मीना सुन बाक्ब' देंमा बाक्त।

26 मिनु मेकोमी 'सु नु बाक्मे, मेको तेम्शा गेचा पुंइसीब। सु नु मबाक्मे, मेको के बाक्शो यो रोइक्चा पुंइसीब। लूका ८:१८; मत्ती १३:१२

27 तन्न आं कली मटीब आं जोरी सत्रु आन कली चहिं ग्याइशशा चाक्शा आं डोंइती क्योरशा सतीन' देंमाक्त" दे शेंदीमी बाक्त।

येसु यरूसलेम जाक्दीशशो

मत्ती २१:१-११; मर्कूस ११:१-१०; यूहन्ना १२:१२-१६

28 मिनु मेको लोव्र नेल्ल शेने थुम्शा, यरूसलेम मेर लमा बाक्त।

29 मिनु जैतून डांडा जाक्दीम्मा बाक्त। मेको डांडा आ आइदी बेथफागे नु बेथानी गाउं निक्शी बाक्सा बाक्त।

30 मेको गाउं आ नेक्था जाक्दीशशा, येसुमी आ शेंसीब निक्शी आस कली “मेरे गाउं लसे। मिनु गाउं ओव्रसीनु, सुइमी मडोइशशो गधा आ चाइक्ब का पाइशशो थित्नीसी। मेको कली प्रोंइशा चाक्कीसे।

31 मुरपुकीमी “मारदे प्रोंइशा लाइक्सी?” दे हिल्लो पाम्तेक्म हना “प्रभु कली माल्ताक्व” दे मतीसे” दे माइशशा, सोइक्तीम्सी बाक्त।

32 मिनु लसानु, येसुमी देंशो खोदेंशो पा गधा पाइशशा वोइशशो थित्से बाक्त।

33 मिनु प्रोन्सेनु, गधा आ होव्रपमी “गधा मारदे प्रोंइसी?” दे हिल्लो पवा बाक्त।

34 मिनु मेको निक्शीमी “प्रभु कली माल्ताक्व” देंसा बाक्त।

35 मिनु लाइशशा येसु आ बाक्तीकेम चाक्दीत्से बाक्त। मिनु येसु आ शेंसीबपुकीमी गधा तारी आन वा ब्रशा, येसु कली डोइक्पदमे बाक्त।

36 मिनु गाक्मा बाक्त। मिनु मुरपुकीमी आन फेक्शो वा लांमी ब्रामे बाक्त।

37 मेको जैतून डांडा लाक्शा ब्रुम्मा बाक्त। येसुमी शुश छक लाक्चा डा गेय पतीके मुर नेल्ल थाम्पा ग्येरशा, कुम्सो पा परमप्रभु यावे कली ठेयब सेल्ना सेल्न,

38 “परमप्रभु यावे आ नेमी जाक्ब पिप ठेयब बाक्ब। सरीडम यो ग्येरसमल। इर डा नेल्ल रिम्शो दुम्ल” दे रेयके पामे बाक्त। भजन संग्रह ११८:२६; लूका २:१४

39 मेकेर फरिसी का निक्शी यो बाक्मा बाक्त। मेकोपुकीमी येसु कली “इन शेंसीब आन कली हुइक्तीन” देंमा बाक्त।

40 तन्न येसुमी “एकोपुकीमी सिक्सी पाम्तेक्म हना, फुल्लुमी यो रेयके पचा गोइनीम” देंमाक्त।

41 मिनु यरूसलेम सहर आ नेक्था जाक्शा, सहर तांइसेनु, येसु मेको सहर आ पर्वम डाक्शा

42 “थुं नाइक्तीक ते रे जाक्बा, दे तुइक्ती हना दुम वा। तन्न मुल मेको इ डोंइती रे खुइश्शो बाक्ब। लूका १३:३४; मत्ती १३:१३, १४

43 नोले इ जोरी सत्रु बोक्शा, इ कली एर ओंथ रे पुम्शा, तेइ लचा मगेथु, गारो डोइक्नीम।

44 मेकोपुकीमी इ कली नु इ आल आन कली खपीम राप्नीम। मेकेर फुल्लु का सम्म ख्रोप्शा मलीनीम। मारदे हना गे इ कली गुम्थ जाक्ब कली मतुइक्ती” देंमाक्त। लूका २१:६

यरूसलेम सहरम बाक्शा, शेंशो

मत्ती २१:१२-१६; मर्कूस ११:१५-१८; यूहन्ना २:१३-१६

45 मिनु येसु सहरम जाक्दीश्शा, परमप्रभु यावे आ खिं लमाक्त। मिनु मार मार लेयब आन कली खेरा बाक्त।

46 मिनु येसुमी मेको आन कली “परमप्रभु यावे आ लोत्रमी ‘आं खिं आं कली प्रार्थना पचा कली बाक्ब’ दे ब्रेक्शो बाक्ब। तन्न गेपुकीमी चहिं खुइ आन बाक्तीक पुक्खी सेल्तीनी” दे हुइश्शा खेरमी बाक्त। यसैया ५६:७; येरमीया ७:११

47 मिनु येसुमी परमप्रभु यावे आ खिंमी बाक्शा, नाक्त किंत किंत मुर आन कली शेंदीमी बाक्त। ठेयब चढ़ेब, सास्त्री नु ठेयब मुरपुकीमी येसु कली साइक्चा माल्मे बाक्त।

48 तन्न मेकोपुकीमी येसु कली मारेइ दोस गेने मचाप्मे बाक्त। मारदे हना मुर नेल्लेमी येसु आ शेंशो थाम्पा नोफा दाइश्शा नेंन्मे बाक्त।

## 20

“इ कली सुम अधिकार गेवे?”

मत्ती २१:२३-२७; मर्कूस ११:२७-३३

1 मिनु काबु येसुमी परमप्रभु यावे आ खिंमी बाक्शा, मुर आन कली ग्येरपाइक्तीक लोत्र शेंना शेंन बाक्मेनु,

2 ठेयब चढेब, सास्त्री नु जोक्ब तुइक्ब खाल्पापुकीमी “तेको अधिकारमी मोदेशो पवी? इ कली अधिकार गेब सु बाक्बा, लो देन” देंमा बाक्त।

3 मिनु येसुमी “गो इन कली लोत्र का हिल्लो पाइनुड। मिनु आं हिल्लो पशो लोत्र लेत्तीने।

4 यूहन्नामी मुर आन कली ब्वाक्कुम खुम्शा गुंडतीक अधिकार स्वर्ग रे तवा देय मुरपुकी रे तवा?” दे हिल्लो पामी बाक्त।

5 मिनु मेकोपुकीमी “स्वर्ग रे तवा बाक्त देंतय हना, मो हना यूहन्ना आ लोत्र मारदे थमा मसुइक्नी? देंब। लूका ७:२९-३०

6 मुरपुकी रे तवा बाक्त देंतय हना, एकेर बाक्बपुकीमी इं कली फुल्लु आप्शा साइक्नीम। मारदे हना यूहन्ना परमप्रभु यावे आ लोत्र पाइब बाक्त, दे थमा सुइक्ब बाक्नीम” दे शुश मिम्शा लोत्रसी पामे बाक्त।

7 मिनु शुश मिम्शा “यूहन्ना कली अधिकार सुमी गेवा सुम? गो मतुइक्नीकी” देंमा बाक्त।

8 मिनु येसुमी “मो हना तेको अधिकारमी एको गेय पडा, गो यो मशेंनन्नी” दे माइक्मी बाक्त।

मरिम्शो बुम्था पाइबपुकी

मत्ती २१:३३-४६; मर्कूस १२:१-१२

9 मिनु मुर आन कली कथा सेल्शा “मुर कामी ठेयब रूमी अडगुर खुमा बाक्त। मिनु नोले ‘गो रागी हिरथ लाइनुड’ दे मिम्शा, आ रू बुम्था पाइब आन कली गेशा वोदा बाक्त। मिनु लशा, शुश नाक्त मलेम्माक्त।



10 अडगुर मीशा सेक्ची जाक्मेनु, होव्रपमी आ गेय पाइब का कली 'अडगुर योक्शा चाक्को' दे ब्रथ सोइक्ता बाक्त। मिनु गेय पाइब जाक्दीम्मेनु, बुम्था पाइबपुकीमी तुप्शा, श्येत्थ सोइक्तामे बाक्त। २इतिहास ३६:१५-१६

11 मिनु लेंशा अर्को गेय पाइब का कली सोइक्ता बाक्त। मेको कली तुप्शा मुने तोक्शा, श्येत्थ सोइक्तामे बाक्त।

12 मोपा यो लेंशा गेय पाइब का कली सोइक्ता बाक्त। मेको कली यो हुश यिथ्री तुप्शा खेरमे बाक्त।

13 मिनु नोले 'मार पड? मुल आं दाक्शो तौ कली सोइक्नुड। मेको कली तशा मान पाइनीमी कों?' दे मिम्ता बाक्त। मिनु आ तौ कली सोइक्ता बाक्त।

14 मिनु बुम्था पाइबपुकीमी आ तौ कली पिशो तशा 'एको हक ताइब बाक्ब। लो, साइय्य। मिनु रू, अडगुर नेल्ल इं केन दुम्ब' देंशा गारमा बाक्त।

15 मिनु रू रे गुंइशा सदमे बाक्त। रू आ होव्रपमी मोदेशो पाइब आन कली मार पाइबा?

16 जाक्शा मेको बुम्था पाइब आन कली साइक्ब। मिनु आ रू अरु आन कली गेब" दे शेंदीमी बाक्त। आ लोव्र नेंबपुकीमी मेको कथा नेंशा "मोदेशो मदुम्ल" देंमा बाक्त।

17 मिनु येसुमी आ लोव्र नेंब आन कली मिक्च मयाक्थु कोव्रशा "परमप्रभु यावेमी ब्रेक्पाइशो एको लोव्र रे मार रुम्सीबा, लो देनीन 'खिं सेल्बपुकीमी गारो प्रोव्रडमेनु, एको फुल्लु मगार' दे ताइक्तामे बाक्त। मेको मगारथु ताइशो फुल्लु चहिं सुर डा सुरे फुल्लु दुम्माक्त। भजन संग्रह ११८:२२

18 सु मेको फुल्लु तारी थिप्बा, मेको खतम दुम्ब। मेको फुल्लुम सु कली चिप्ता, मेको फस दुम्ब" दे शेंदीमी बाक्त। दानीएल २:३४,३५,४४,४५

19 मिनु ठेयब चढेब नु सास्त्रीपुकीमी "इं कली कका एको कथा देंमाक्त" दे रुप्शा चुरशा, येसु कली ग्याइक्पाइक्चा माल्मे बाक्त।

तन्न शुश मुरुमी आ लोव्र नेंशो तशा हिंमा बाक्त। लूका १९:४८

तिरो आ पर्बम लोव्र पशो

मत्ती २२:१५-२२; मर्कूस १२:१३-१७

20 सास्त्री नु ठेयब चढेबपुकीमी मुर योव्रशा, येसु आ थुं नाक्शा, आ लोव्र खुइ पथ सोइक्तमे बाक्त। मारदे हना दोस गेशा हुकुम पाइब आ गुइमी गेचा माल्शो बाक्मा बाक्त। मेको सोइशशोपुकीमी येसु आ लोव्र नेंशा, थमा सुइशशो खोदेंशो पखु पामे बाक्त। लूका ११:५४; लूका २३:२

21 मिनु मिलो शिलो पा “शेंब, गे रिम्शो शेंनीनी। सुइ कली तशा महिंथु, मुर आन कुल मकोव्रथु, परमप्रभु यावे आ लोव्र थमा पा शेंनीनी। मुल लोव्र का शेंदीकी,

22 मार लोव्र देंशा हना, पिप सिजर कली तिरो थाप्चा माल्बा देय मथाप्यु यो दुम्बा?” दे हिल्लो पखु पा, लोव्र खाइक्पाइक्चा माल्मे बाक्त।

23 मिनु येसुमी मेको आन थुं डा लोव्र तुइशशा

24 “देनार का कोंइदीनी। एको सु का आ नेमी खोइशशो बाक्मे?” देंमेनु “सिजर आ नेमी खोइशशो बाक्त, हजुर” देंमा बाक्त। देनार का चांदी के क्येट बाक्त। मेको नाक्त का डा गाल्च बाक्त।

25 मिनु प्रभु येसुमी “मो हना पिप सिजर आ मार मार बाक्मे, मेको सिजर कली गेने। परमप्रभु यावे आ मार मार बाक्मे, मेको परमप्रभु यावे कली गेने” देंमाक्त। रोमी १३:१,७

26 मिनु मेकेर देल्शो मुर आन डोंइती आ लोव्र खाइक्पाइशशा मारेड दोस गेने मचाप्मे बाक्त। आ लोव्र लेशशो नेंशा छक लाक्शा सिक्सी पामे बाक्त।

बेक्शो रे सेंसीचा आ पर्बम शेंशो

मत्ती २२:२३-३३,४६; मर्कूस १२:१८-२७,३४

27 मिनु सदुकीपुकी जाक्मा बाक्त। सदुकीपुकीमी “मुर बेक्शो रे मसेंसीनीम” दे शेंबाक्मा बाक्त।

28 मेको जाकबपुकीमी येसु कली “शेंब, मोसामी बेक्शो लोवमी ‘मुर का आल मथिथु बेक्त हना, आ लोकबमी आ भोग्यु वोंइसीशा, आ दाग्यु आ पा डा खिं डा मुर मजाम्मल, दे तमी तौ थिल’ दे बेक्शो बाकब। ब्यवस्था २५:५-६

29 साइ ७ जना लोकब बाक्मा बाक्त। मिनु जेठाम ग्युंबे पवा बाक्त। मिनु आल मथिथु बेक्माक्त।

30 मिनु माइलामी आ भोग्यु वोंइसे बाक्त। मिनु मेको यो आल मथिथु बेक्माक्त।

31 मिनु साइलाम आ भोग्यु वोंइसे बाक्त। मेको यो आल मथिथु बेक्माक्त। मोदेशो पा ६ जनामी आन भोग्यु वोंइसीशा, आल मथिथु बेक्मा बाक्त।

32 नोले मेको मीश मुर यो बेक्माक्त।

33 मुर बेक्शो रे सेंसीशा ब्रोंइमानु, मेको ७ जना वोंइश आन मीश दुम्शो मीश मुर तेको आ मीश दुम्बा?” दे हिल्लो पामे बाक्त।

34 मिनु येसुमी मेको आन कली “एको रागीमी बाक्मानु, मुरपुकीमी ग्युंबे पांइसीनीम। ग्युंबे पा गेनीम।

35 तन्न बेक्शो रे सेंसीशा परमप्रभु यावे नु बाक्चा शिरशोपुकी ग्युंबे मपांइसीनीम, ग्युंबे पा यो मगेनीम।

36 मेकोपुकी गेनायो मबेक्ब दुम्शो बाक्नीम। बेक्शो रे सेंसीशा, परमप्रभु यावे आ स्वर्ग डा गेय पाइबपुकी खोदेशो दुम्नीम। मेकोपुकी परमप्रभु यावे आ तमी तौ बाक्नीम। १यूहन्ना ३:१-२

37 बेक्शो रे सेंसीशा ब्रोंइचा तांइसीब, दे इं किकी पिपी मोसामी अरु आन कली तुइक्पदा बाक्त। दोपा तुइक्पदा बाक्त देंशा हना, परमप्रभुमी मोसा कली मी ब्रशो बुटा रे तपांइसेनु, मोसामी परमप्रभु यावे कली ‘गे अब्राहाम, इसहाक नु याकूब आ परमप्रभु यावे ननी’ दे ब्रेत्ता बाक्त। प्रस्थान ३:६

38 परमप्रभु यावे बेक्शो मुर आन परमप्रभु ममाइ। ब्रोंइशो आन परमप्रभु यावे बाक्ब। मारदे हना परमप्रभु यावे आ डोंइती नेल्ल

ब्रोंइशो बाक्नीम” देंमाक्त। रोमी १४:८

39 मिनु सास्त्री का निक्शीमी “शेंब, गे रिम्शो शेंताक्नी” देंमा बाक्त।

40 मारदे हना सदुकीपुकीमी लेंशा हिल्लो पचा हिंशा सिक्सी पामे बाक्त।

ख्रीस्त सुका आ तौ बाक्बा?

मत्ती २२:४१-४४; मर्कूस १२:३५-३७

41 मिनु येसुमी मेकेर बाक्ब आन कली “ख्रीस्त दाऊद आ तौ बाक्ब, दे दोपा देंनीमी?

42 मारदे हना दाऊद आ ब्रेक्शो भजन संग्रह माइश्शो कुम्सो किताबम

43 ‘प्रभुमी आ प्रभु कली इ जोरी सत्रु आन कली इ खोइल थेक्तीके मसेलु सम्म आं ग्युरा गे बाक्को’ दे ब्रेक्ताक्व। भजन संग्रह ११०:१

44 दाऊदमी मेको कली ‘प्रभु’ देंब। मिनु दोपा आ तौ दुम्मे? लो, देंनीन” देंमाक्त।

“सास्त्री खोदेंशो मपने” दे शेंशो

मत्ती २३:५-५

45 मेकेर बाक्ब शुश मुरुमी येसु आ लोव्र नेन्मे बाक्त। मिनु येसुमी आ शेंसीब आन कली

46 “लाइश्शो वा फेक्शा एर ओंथ गाक्ब, बजार मेर गाक्मानु, सेउ ताक्चा दाक्ब, गुम्तीक खिं लशा, ठेयब नित्तीकेम नित्चा दाक्ब नु भोजमी लशा, मान ताइब आन नित्तीकेम नित्चा माल्ब, सास्त्री आन कली तशा होस पा बाक्कीन। लूका ११:४३

47 मेकोपुकीमी वोंइश बेक्शो मीश मुर आन खिं रोइक्नीमी, दुइश्शो प्रार्थना पा कोइखु पाइनीम। मोदेशो पाइबपुकी अरु आन क्येडा शुश सजाइ ताइनीम” देंमाक्त।

## 21

भेटी चढेचा आ पर्वम शेंशो

मर्कूस १२:४१-४४

1 मिनु नोले येसुमी शोंप पाइश्शो मुरपुकीमी भेटी चढेशो तवा बाक्त।

2 आ वोंइश बेक्शो मारेइ मथीब प्रुडग मीश मुरुमी जाक्शा, लेप्तोन निक्शी चढेशो यो तवा बाक्त। लेप्तोन (ग्रीक लोत्र) नेल्ल क्येडा आइक्च तांबा के क्येट बाक्त।

3 मिनु येसुमी “नोफा दाइश्शा नेनीने, नेल्लेमी चढेशो क्येडा एको प्रुडग मीश मुरुमी शुश चढेप्टु।

4 मारदे हना आ बाक्शो नेल्ल गेप्टु। अरुमी चहिं आन गाप्शो रे गेम्तेक्म” देंमाक्त। २कोरिन्थी ८:१२

परमप्रभु आ खिं मलीब

मत्ती २४:१-३६; मर्कूस १३:१-३२

5 काबु मुरपुकीमी “परमप्रभु यावे आ खिं ठेयब नु दारशो सेल्शो बाक्त” देंमा बाक्त।

6 मिनु येसुमी “एको खिं मुल ठेयब नु दारशो सेल्शो ताइतीनी। नोले नेल्ल ब्रेशशा, फुल्लु का यो खोप्शा मलीब” देंमाक्त। लूका १९:४४

श्येत डा चिन्ड

7 मिनु मुरपुकीमी “शेंब, इन देंशो लोत्र गेना दुम्बा? मेको दुम्चशो चिन्ड दोपा तांइसीबा?” दे हिल्लो पामे बाक्त।

8 मिनु येसुमी “सुइमी इन थुं मक्याल्मेक्ल, दे होस पा बाक्कीन। मारदे हना शुश मुरपुकीमी आं नें ब्रशा ‘गो मेको नड। गो मेको नड देंतीक नाक्त नेक्था जाक्शो बाक्ब’ दे शेंनीम। मो देंब आन लोत्र थमा मसुइक्थु, आन नोले मखोतीन।

9 लडाइ दुम्शो, जुलुस बोक्शो लोत्र शुश नेंनीनी। मेको लोत्र नेंशा महिनीन। मोदेंशो दुम्चा माल्ब। मिनु इच्का नोले ला रागी नुप्ची नाक्त जाक्ब” देंमाक्त।

- 10 मिनु लोत्र बोइशशा “जात जात नु राज्य राज्य लडाइ पाइनीम।  
 11 ठेयब खिनु कुइब। रागी रागीमी ठेयब अन्काल दुम्ब। शुश मुर रोइ पा बेकनीम। हिंचा डा श्येत जाकनीम। सरीडम ठेयब चिन्ड तांइसीनीम।

### थमा सुइक्ब श्येत जाइनीम

12 मो दुम्चा क्येडा डोंइती थमा सुइक्ब इन कली खेदा पा ग्याइकनीमी। मिनु ग्याइशशा, आन गुम्तीक खिंम लाइशशा दोस गेशा, जेल्खानमी चोकनीम। आं नें आ पबर्म ठेयब मुर नु पिप आन डोंइती चाकदीशशा, राप्पाइक्चा पुंइसीनीनी। मत्ती १०:१८-२२,३०

13 मोपा राप्पाइक्चा पुंइसीनीनु, सांकछी का दुम्नीनी।

14 ‘ठेयब मुर आन डोंइती मार देंचा?’ दे गेनायो पीर मपाइनुड, दे इन थुं फ्रेंशा बाककीन। लूका १२:११

15 मारदे हना मोपा राप्पदमेनु, इन जोरी सत्रुमी लेन्ने मचाप्चा डा लोत्र इन शोत्र रे पपाइकनन्नी। इन कली ठीक लोत्र पपाइकनुड। मिनु मेकोपुकीमी इन लोत्र खोइक्ने मचाप्नीम। प्रेरित ६:१०

16 इन आम आफ, लोकबपुकीमी, इन जात डा मुर, इन वारचपुकीमी इन कली दोस गेशा, खेदा पा ग्याइक्पाइशशा, चोकपाइकनीम। का निक्शी आन कली साइक्पाइकनीम।

17 मुरपुकी नेल्लेमी आं नें आ पबर्म इन कली काइ मदाकनीम।

18 तन्न इन पिया डा चां का यो महेम्ब। लूका १२:७

19 मोपतीके थमा सुइक्चा मप्रोनीन। मिनु ला गे ब्रोंइचा ताइनीनी।  
 हिब्रू १०:३६

### ‘यरूसलेम जाम्शा लाइब’ देशो

20 यरूसलेम सहर आ एर ओंथ लडाइ पाइबपुकीमी पुम्शो ताइतीनी हना ‘मुल सहर खतम दुम्ची नाक्त जाक्माक्त’ दे तुइक्तीन।

21 मोपतीके यहूदीया रागीम बाक्बपुकी डांडा ग्येतथ प्रोक्मल। सहरम बाक्बपुकी सहर प्रोंइशा प्रोक्मल। सहर एर ओंथ रू मेर बाक्बपुकी सहर मओव्रमल।

22 परमप्रभु यावे आ लोव्रमी एको ओदेशो दुम्ब, दे ब्रेक्शो बाक्ब। एको ब्रेक्शो नेल्ल थमा दुम्शा, सहर खतम दुम्ब। ब्यवस्था ३२:३५

23 मेना आल कुरशो नु दूध तूब आल पाइशो मीश मुर आन कली श्येत दुम्ब। मारदे हना रागीमी शुश श्येत दुम्शा, मेको मुरपुकीमी परमप्रभु यावे आ गाइशो ताइनीम।

24 कोइ तरवारम बेक्नीमी। कोइ ग्याइशशा अर्को रागीम लाइक्चा पुंडसीनीम। मिनु आन नाक्त मजाक्दीम सम्म अर्को जात डा मुरपुकीमी यरूसलेम कली दिप्शा वोइक्नीम। यसैया ६३:१८; प्रकाश ११:२; रोमी ११:२५

चिन्ड तांडसीब, दे शेंशो

25 मिनु सरीड नु रागीमी चिन्ड तांडसीनीम। सरीडमी नां, तास्ला नु सोरुल मार मार तांडसीब। रागीम समुन्द्रमी ठेयब ब्वाक्कु ब्रुइशशा, मुर नेल्ल आन कली हिंपाइक्ब। प्रकाश ६:१२-१३

26 मुरपुकी सरीड नु रागी कोव्रशा, हिंशा थाइनीम। मारदे हना सरीड डा सक्ति हिम्सीनीम।

27 मिनु रागीम जरमेशो कली गोस्स तारी बाक्शा, सक्ति नु ठेयब छेडछेडमी यिशो ताइनीम। दानीएल ७:१३

28 मेको चिन्डपुकी दुम्शो तनीनु, इन पिया पोक्शा, ठेयब थुं पा ग्येरसीने। मारदे हना श्येत रे प्रोंइब इन नेक्था जाक्शो बाक्ब” दे शेंदीमी बाक्त। फिलिप्पी ४:४,५

29 मिनु कथा सेल्शा “फोव्रशी रवा नु अरु रवा कोव्रडीन।

30 कोच्वा दाप्शा कुशो तशा, रेउ यिची ना जाक्चा चिक्शो बाक्त, दे तुइक्नीनी।

31 आं देशो लोव्र थमा दुम्शो तनीनु, परमप्रभु यावे आ राज्य इन नेक्था जाक्माक्त, दे तुइक्नीनी।

32 नोफा दाइशशा नेनीने, एको मुरपुकी मनुप्यु, आं देंशो नेल्ल थमा दुम्ब।

33 सरीड नु रागी नेल्ल जाम्शा लाइनीम। तन्न आं लोव्र चहिं गेनायो मजाम्ब।

34 आं देंशो मप्रेंथु होस पा बाक्कीन। शांबु राकसी दुक्शा मबाक्कीन। मार जचा मार फेक्चा, दो पचा, दे शुश ममिम्तीने। मारदे हना आं देंशो लोव्र इन मतुइक्थु दुम्ब। मर्कूस ४:१९; १थिस्सलोनिकी ५:३

35 मेको मोदेंशो श्येत नेल्ल रागीम दुम्ब।

36 मोपतीके आं देंशो मिम्शा बाक्कीन। परमप्रभु यावे कली 'श्येत नेल्ल फाल्शा, थमा सुइक्तीक सक्ति गेकी। मिनु रागीम जरमेशो जाक्मेनु, सासीशा ग्रुम्चा तकल' दे पुंइना पुंइन बाक्कीन" दे अर्ती गेमी बाक्त।

नाक्त कित कित शेंशो

37 मिनु येसुमी नाक्त मुर आन कली शेंना शेंन नाक्दो चहिं जैतून डांडाम लशा इप्बाक्माक्त।

38 शुश मुरुमी नाक्त कित कित सुनी कना बोक्शा, परमप्रभु यावे आ खिं लशा, येसु आ लोव्र नेंबाक्मा बाक्त।

## 22

येसु कली साइक्चा, दे लोव्र पशो

मत्ती २६:- २८:-; मर्कूस १४:- १६:-; यूहन्ना १८:- २१:-

1 मिनु बोरब ओरुत्ती मसुप्शो शोब्ले जतीक पास्सा चाड जाक्चशो बाक्माक्त।

2 मिनु ठेयब चढेब नु सास्त्रीपुकीमी "येसु कली दोपा ग्याइशशा साइक्चा?" दे लोव्र पमुशा, साइक्चा माल्मे बाक्त। तन्न शुश मुरुमी येसु आ लोव्र नेंशो तशा, हिंमा बाक्त। लूका २०:१९

3 मिनु सैतान इस्कारीयोत डा यहूदा आ थुंम ओव्रमाक्त। मेको शेंसीब आन दाते डा का बाक्माक्त। यूहन्ना १३:२, २७



4 मिनु मेको ठेयब चढेब नु ठेयब मुर आन कली ग्रुमथ लशा “येसु ग्याइक्पाइक्चा कली वारच पाइनन्नी” दे माइक्मी बाक्त।

5 मिनु मेकोपुकीमी ग्येरशा “दुम्ब, ग्याइक्चा वारच पाप्तीवी हना, क्येट गेनीकी” देंमा बाक्त।

6 में डा मेरे यहूदामी “सुइमी मतुइक्थु, दोपा ग्याइक्पदु?” दे मिम्शा बाक्माक्त।

### पास्सा चाड डा भोज

7 मिनु बोरब ओरुती मसुप्शो शोब्ले जची चाड जाक्माक्त। मेको नाक्ती पाठा का क्योरचा माल्बाक्माक्त। प्रस्थान १२:१८-२०

8 मिनु येसुमी पत्रुस नु यूहन्ना आस कली “पास्सा चाड डा भोज साथ लसे” दे माइक्सी बाक्त।

9 मिनु मेको निक्शीमी “ते लशा साचा?” दे हिल्लो पाम्से बाक्त।

10 मिनु येसुमी “नेनीसे, मुल सहर लसे। सहरम जाक्दीस्सीनु, गाग्री कुरशा ब्वाक्कु दिथ पिशो मुर का ग्रुम्नीसी।

11 मेको आ नोले खोइश्शा, तेको खिं ओव्रबा, मेको खिं ओव्रडीसे। मिनु खिं डा मुर कली ‘शेंबमी सोइश्शो नस्कु। शेंबमी, आ शेंसीबपुकी नु काथा बाक्शा, पास्सा ते मानेचा? दे हिल्लो पथ सोइक्ताक्स्की’ दे मतीसे।

12 मो माइक्सीनु, मेकोमी इस कली तला तारी ठेयब कोठा का कोंइब। मेको कोठामी गुन्द्री पीरा ब्रशा वोइश्शो थित्नीसी। मिनु मेकेरन साचा” दे सोइक्तीम्सी बाक्त।

13 मिनु लसानु, येसुमी दोदेशो देंमे, मोदेशो थित्से बाक्त। मिनु पास्सा चाड डा भोज सादसे बाक्त। लूका १९:३२

14 मिनु भोज जचा कली येसु नु आ शेंसीबपुकी जथ निस्समा बाक्त।

15 मिनु जचामेनु, येसुमी “गो श्येत गेचा पुंइसीचा क्येडा डोंइती गेपुकी नु काथा बाक्शा, एको पास्सा मानेशा जत दाक्ती।

16 मारदे हना परमप्रभु यावे आ राज्य पशो मतांइसे सम्म लेंशा गेपुकी नु काथा बाक्शा, पास्सा मानेचा मताइनुड” देंमाक्त। लूका १३:२९

17 मिनु कचौरा शेशा “गे रिम्शो पाइब बाक्नीनी” दे प्रार्थना पशा “ताक्शा, का का पा तूडीन।

18 मुल डा मेरे एको अडगुर रस मतूनुड। परमप्रभु यावेमी राज्य पशो तांइसे नोले ला तूनुड, दे इन कली देंनुड” देंमाक्त।

19 मिनु शोब्ले शेशा “गे रिम्शो पाइब बाक्नीनी” दे प्रार्थना पा, जिक्शा योक्शा “एको आं रां बाक्ब। इन कली गेतन्नी। आं कली मिम्शा जने” दे शोब्ले जपाइक्मी बाक्त। १कोरिन्थी ११:२३-२५

20 मिनु जशा, कचौरा शेशा “एको तूनीनु, आं हुश चढेशो मिम्तीने। आं हुशेमी परमप्रभु यावे आ गेशो नक कबल खाप्ता। आं हुश जारशोमी शुश मुर आन पाप क्याम्सीब।

21 नेनीने, आं कली ग्याइक्ब आन कली वारच पाइब का गोपुकी नु काथा बाक्शो बाक्ब। यूहन्ना १३:२१-२२

22 रागीम जरमेशो कली साइ मोदेशो दुम्चा माल्ब देशो लोत्र नेल्ल थमा दुम्चा माल्त हना यो, ग्याइक्ब आन कली वारच पाइब कली शुश मरिम्शो दुम्ब” देंमाक्त।

23 मिनु शेंसीबपुकीमी येसु आ लोत्र नेंशा “मोदेशो पाइब सु बाक्म माइ?” दे लोत्रसी पमुचा गोत्रमे बाक्त।

नेल्ल क्येडा ठेयब सु बाक्या माइ?

24 मिनु लोत्रसी पस डा पस बाक्मानु “गो इं दातेम नेल्ल क्येडा ठेयब सु बाक्या माइ?” दे जिचा पोक्मे बाक्त। मत्ती २०:२५-२८; मर्कूस १०:४२-४५; लूका ९:४६

25 मिनु येसुमी “अर्को रागी डा पिपपुकीमी इन कली हुकुम पाइनीम। मिनु मुरपुकीमी मेको आन कली मान पा ठेयब सेल्नीम।

26 गेपुकी चहिं मेको आन पशो खोदेशो पा ठेयब दुम्चा ममालीने। नेल्ल क्येडा ठेयबमी आइक्च सुंडसीशा, नेल्ल आन कली वारच पवल।

27 मान पा खमे योक्गमेनु, जाइब मुर आन कली मान पा ठेयब सेल्नीम। ख्रेप्ब मुर चहिं आइक्च दुम्ब। गो इन कली ख्रेप्ब मुर खोदेशो दुम्शा गेय पाता। यूहन्ना १३:४-१४

28 आं कली थुं थाम्मेनु, वारच पाइब गे ननी। यूहन्ना ६:६७-६८

29 आं आफोमी आ राज्यमी हुकुम पाइब सेल्ती। मिनु गो इन कली काथा वोइशशा, हुकुम पाइब सेल्नन्नी।

30 आं राज्यमी गो नु काथा बाक्शा, जचा तूचा ताइनीनी। मिनु इं इस्माएल डा १२ थर आन कली निसाफ पाइनीनी” दे माइक्मी बाक्त। मत्ती १९:२८

### पत्रुस कली लोत्र पशो

31 मिनु प्रभुमी सिमोन पत्रुस कली “ए सिमोन, नेनो। सैतानमी गे इ कली चेरब खोदेशो पा क्राप्चा गेयीनी, दे पुंडशो बाक्ब। २कोरिन्थी २:११

32 गो चहिं इ पबर्म परमप्रभु यावे कली ‘पत्रुस कली थमा सुइक्चा प्रोइपाइक्चा मगेने’ दे पुंडता। गे नोले थमा पा इ थुं परमप्रभु यावे गे लेशशा थमा सुइक्नेवे। मिनु थमा सुइक्ब आन कली ‘थमा सुइक्चा मप्रोनीन’ दे आन थुं बारपतो” दे अर्ती गेवा बाक्त। यूहन्ना १७:११, १५

33 मिनु पत्रुसमी “प्रभु, इन कली जेल्खानम चोक्तेक्म हना, गो यो चोक्सीनुड। इन कली साइक्तेक्म हना, इन कली मप्रोंइथु, गो यो साइक्चा पुंडसीनुड” देंमाक्त।

34 मिनु येसुमी “पत्रुस, दीसा सुनी भाले ग्रीचा क्येडा डोंइती खेयप सां ‘गो मेको कली मतुइक्नुड, सु बाक्मे?’ देंनेवे” देंमाक्त।

“होस पांडसीने” देशो

35 मिनु शेंसीब नेल्ल आन कली “गोमी इन कली क्येट, झोला, जुता, मारेइ मकुरथु, परमप्रभु यावे आ राज्य डा लोत्र शेंथ सोइकतन्नीनु, जचा फेक्चा मतनी डा?” देंमेनु “मार माल्का, मेको नेल्ल थित्तक, ताइतक” देंमा बाक्त। लूका ९:३; लूका १०:४

36 मिनु येसुमी “मुल क्येट बाक्त हना, क्येट कुरीन। झोला बाक्त हना, झोला कुरीन। तरवार मबाक्त हना, फेक्शो वा लेयशा यो ग्याप्शा कुरचा माल्ब।

37 आं पर्वम ब्रेक्पाइश्शो लोत्र नेल्ल थमा दुम्चाप्तु। मार ब्रेक्शो बाक्ब देंशा हना ‘मरिम्शो पाइब सुइश्शा, दोस गेनीम’ दे ब्रेक्शो बाक्ब। आं पर्वम ब्रेक्शो लोत्र नेल्ल थमा दुम्चा माल्ब” देंमाक्त। यसैया ५३:१२

38 मिनु शेंसीबपुकीमी “प्रभु, गोपुकी नु तरवार निक्शी बाक्त” देंमानु “मोशो बाक्त हना दुम्त, लो गाक्य” देंमाक्त।

### येसुमी प्रार्थना पशो

39 मिनु मेकेर रे गाक्शा, डोंइती डा खोदेशो पा जैतून डांडा जाक्दीम्माक्त। आ शेंसीबपुकीमी आ नोले खोदमे बाक्त।

40 मिनु मेकेर जाक्दीम्मानु, येसुमी आ शेंसीब आन कली “थुं थाम्चा पुंइसीनीनु, पाप मपय, दे प्रार्थना पने” दे माइक्मी बाक्त।

41 मिनु आन बाक्तीक आ ता एरे लशा, पोक्च थेक्शा

42 “आं आफ, इन दाक्शो बाक्त हना, एको कचौरा आं कली मतूपाइक्थु लतीने। तन्न आं पुंइशो मदुम्ल, इन दाक्शो दुम्ल” दे पुना बाक्त। मत्ती ६:१०

43 मिनु परमप्रभु यावे आ स्वर्ग डा गेय पाइब का गूशा, येसु कली बोल गेवा बाक्त।

44 मिनु लेंशा आ थुं खाइश्शा पुना बाक्त। आ थुं खाइश्शा पुनानु, आ पस्ना हुश खोदेशो दुम्शा खपीम दोक्माक्त।

45 मिनु लेशशा शेंसीब आन बाक्तीकेम जाक्मेनु, मेको आन कली यो आन थुं खाइश्शा इप्शा बाक्शो थिम्मी बाक्त।

46 मिनु “मारदे इम्नी? बोक्कीन, थुं थाम्चा पुंडसीनीनु, पाप मपय, दे प्रार्थना पने” दे पोक्मी बाक्त।

### येसु ग्याइक्चा पुंडसीशो

47 मिनु शुश मुर फो फु गूमा बाक्त। मेको आन कली येसु आ शेंसीब यहूदामी लां कोंइशा चाक्शो बाक्माक्त। मिनु जाक्शा, यहूदामी येसु कली पुक्पु पचा कली आ डोंइती जाक्माक्त।

48 तन्न येसुमी “यहूदा, गे रागीम जरमेशो कली वारच दुम्बु पा पुक्पु पा ग्याइक्पाइक्नेवे?” देंमाक्त।

49 मिनु शेंसीबपुकीमी “ग्याइक्थ जाक्मा बाक्त” दे तुइश्शा “प्रभु, एको आन कली तरवारम क्योरशा खेदा पचा?” देंमानु

50 कामी तरवार ग्रि शोइश्शा, ठेयब चढेब आ गेय पाइब आ ग्युरा नोफा खोदा बाक्त।

51 येसुमी मेको खोइश्शो तशा “दुम्त मपने” दे नोफा सेस सेला बाक्त।

52 मिनु येसुमी मेकेर जाक्शो ठेयब चढेब, परमप्रभु यावे आ खिं डा ठेयब मुर नु जोक्ब तुइक्ब खाल्पा आन कली “तरवार कोक्के कुरशा, खुइ पाइब कली ग्याइक्थ जाक्शो खोदेंशो पा आं कली ग्याइक्थ जाक्नी?”

53 नाक्त किंत किंत परमप्रभु यावे आ खिंमी गेपुकी नु काथा बाक्डानु, मग्याइक्तीनी। मुल चहिं छिडछिड डा सक्ति नु इन पालो जाक्त” दे माइक्मी बाक्त। यूहन्ना ७:३०; यूहन्ना ८:२०

### पत्रुसमी “मतुइक्नुड” देशो

54 मिनु येसु कली ग्याइश्शा लाइश्शा, नेल्ल क्येडा ठेयब चढेब आ खिंमी ओइदमे बाक्त। पत्रुस यो डोन रे कोव्रना कोव्रन लमाक्त।

55 मेको खिं डा लाडगाम मुर खुम्सीशा, मी थेरशा बाक्मा बाक्त। पत्रुस जाक्दीश्शा, मेकोपुकी नु मी थेरशा बाक्माक्त।

56 मिनु मेकेर गेय पाइब मीश मुर कामी पत्रुस कली मी थेरशो तशा, मिक्च मयाक्थु कोत्रशा “एको मुर मेरे नु काथा गाक्ब का बाक्त, है” देंमेनु

57 “मार लोत्र पवी? गो येसु कली मतुइक्नुड, सु बाक्मे?” देंमाक्त।

58 मिनु याम का नोले मेकेर बाक्ब कामी “मेरे नु काथा गाक्ब का गे नवे” देंमेनु “हत्तै गो मनड” देंमाक्त।

59 मिनु घन्टा का नोले अर्कोमी यो “मेरे नु काथा गाक्ब का एकोन बाक्ब। मारदे हना एको यो गालील डा बाक्ब” देंमाक्त।

60 मिनु पत्रुसमी “गो इ देंशो मरुबु” देंमाक्त। मो देंमेनुन, भाले ग्रीमाक्त।

61 मिनु प्रभुमी पत्रुस गे हिरशा, मिक्च मयाक्थु कोत्रडा बाक्त। मिनु पत्रुसमी “सुनी कना भाले ग्रीचा डोंइती खेयप सां ‘मेको कली मतुइक्नुड, सु बाक्मे’ देंनेवे” देंशो प्रभु आ लोत्र ति फ्रुक्गा बाक्त।

62 मिनु गूशा शुश डाक्माक्त। भजन संग्रह ५१:१९

येसु शुक्शी पाइक्चा पुंइसीशो

63 चढेब आ खिंमी चहिं मार पामे बाक्त देंशा हना, येसु कली आ मिक्चीम वाम फ्रेंशा तुप्शा

64 “इ कली सुमी तुप्मे? लो देन” दे तुप्स डा तुप्स पामे बाक्त।

65 तुप्स डा तुप्स पा, तोक्शा लोत्र पा शुश श्येत गेमे बाक्त।

येसु कली राप्पाइशो

66 मिनु सुनी जोक्ब तुइक्ब खाल्पापुकीमी ठेयब चढेब नु सास्त्री आन कली खुप्शा कछडी बाक्मा बाक्त। मिनु येसु कली मेकेर चाक्शा राप्पदमे बाक्त।

67 मिनु “गे ख्रीस्त नवे हना, ख्रीस्त नड देनो” देंमा बाक्त। यूहन्ना ३:१२

68 मिनु येसुमी “गो ख्रीस्त नड देंती हना, गे थमा मसुइक्नीनी। इन कली लोत्र का हिल्लो पाता हना, आं लोत्र मलेत्नीनी।

69 तन्न लोव्र का 'मुल रागीम जरमेशो परमप्रभु यावे आ ग्युरा गे बाक्चा ताइब' ” दे माइक्मी बाक्त। भजन संग्रह १००:१

70 मिनु मेकोपुकीमी “मो हना गे परमप्रभु यावे आ तौ नवे?” देंमानु “परमप्रभु यावे आ तौ नवे, दे गेन देंतीनी” देंमाक्त।

71 मिनु मेकोपुकीमी “मार सांकछी माल्दा डा? आ देंशो नेंतय। आंम आ देंशोमी दोस ताइब दुम्त” देंमुमा बाक्त।

## 23

पिलातस आ डोंइती राप्पाइशशो

1 मिनु मेकेर रे येसु कली पिलातस आ डोंइती चाक्दीत्मे बाक्त।

2 मिनु पिलातस आ डोंइती राप्पाइशशा “हजुर, एको मुरुमी मुर आन थुं क्याल्ब। 'सिजर कली ममानेचा। तिरो थाप्चा ममाल्ब। गो ख्रीस्त नड। मिनु गोन पिप नड' दे शेंना शेंन गाक्त” दे दोस गेमे बाक्त। प्रेरित २४:५; लूका २०:२५

3 मिनु पिलातसमी येसु कली “यहूदी आन पिप नवे?” दे हिल्लो पवानु “गे आंमा देंतीनी” दे लोव्र लेत्ता बाक्त।

4 मिनु पिलातसमी ठेयब चढेब नु येसु कली चाक्ब आन कली “एको दोस तचा डा मुर मतड, रिम्शो मुर ताता” देंमाक्त।

5 मिनु मेकोपुकीमी “एकोमी गालील रागी नु यहूदीया रागी नेल्ल हिरशा, एक यो जाक्शा, मुर आन कली 'पिप कली ममानेन। आं कली मानेन' दे आन थुं क्याल्तीमी। मिनु गाउं सहरमी पिप आ पबर्म दूली लोव्र पचा गोम्तेक्मे” दे दोस गेशा लोव्र थोक्शा देंमा बाक्त।

6 मिनु पिलातसमी येसु गालील डा बाक्माक्त, दे तुइक्ता बाक्त।

7 गालील डा हुकुम पाइब हेरोद बाक्माक्त। मेना हेरोद नाक्त का निक्शी कली यरूसलेम जाक्शो बाक्माक्त। मोपतीके मेकेर सोइक्ता बाक्त। लूका ३:१

8 मिनु हेरोदमी येसु कली तशा, ग्येरसे बाक्त। मारदे हना शुश नाक्त रे गुम गुम दाक्शो बाक्माक्त। मुर आन कली सापाइशशो,

चिन्ड कोइशो शुश लोत्र नेंशा “मारेइ छक लाकचा डा गेय कोइबा को” दे मिम्शो बाक्माक्त। लूका ९:९

9 मिनु हेरोदमी शुश लोत्र हिल्लो पवा बाक्त। तन्न येसुमी लोत्र का यो मलेत्ता बाक्त।

10 ठेयब चढेब नु सास्त्रीपुकीमी शुश दोस गेमे बाक्त।

11 मिनु हेरोद नु आ सिपाइपुकीमी येसु कली शुक्शी पा पिपी आ वा फेक्पा “लो, मुल पिप दुम्ते” दे पिलातस आ बाक्तीकेमी लेशशा सोइक्तमे बाक्त।

12 डोंइती हेरोद नु पिलातस जोरी सत्रु खोदेशो दुम्शो बाक्सा बाक्त। मेको नाक्त रे वारचबु दुम्सा बाक्त।

13 मिनु पिलातसमी येसु कली पिप आ वा फेक्पा लेशशा चाक्शो तशा, ठेयब चढेब, ठेयब मुर नु शुश मुर आन कली खुप्शा

14 “एको मुरुमी ‘पिप ममानेचा’ दे शेंना शेंन गाक्ब दे दोस गेतीनी। गो चहिं दोस गुंडने मचबु।

15 हेरोदमी यो आ दोस थिन्ने मचाप्थु, लेशशा सोइक्ताक्व। साइक्चा पुंडसीब मारेइ दोस मथिदु।

16 मोपतीके इक्का सजाइ गेशा, सोइक्चा दुम्ती” देंमाक्त।

17 पास्सा नाक्ती जेल्खानमी चोक्सीशो मुर का प्रोंइचा माल्बाक्माक्त।

18 मिनु पिलातसमी येसु कली प्रोंइशा सोइक्चा देंमेनु, मेकेर बाक्बपुकीमी “प्रोंइचा मदुम्ब। मुर का प्रोंइचा देंतीनी हना, बारब्बा कली प्रोंइशा सोइक्तीने। एको कली चहिं साइक्चान माल्ब” दे गुइ मुठी पा पोक्शा, रेयके पामे बाक्त।

19 बारब्बा चहिं डोंइती मरिम्शो गेय पा, सहरम हुल पोक्शा, मुर का कली साइश्शा, जेल्खानमी चोक्सीशो बाक्माक्त।

20 पिलातसमी खुम्सीशो मुर आन कली लेंशा लोत्र पशा, येसु कली प्रोंइचा बोल पवा बाक्त।

21 तन्न मेकोपुकीमी शुश रेयके पा “शीम केप्शा कांटी थोक्शा क्याइश्शा सतीने” दे वाइ ब्रेश्शा, रेयके पामे बाक्त।



22 मिनु पिलातसमी लेंशा “मार मरिम्शो पवा? मार दोस गेचा? साइक्चा डा दोस मारेइ मतड। तुप्पाइश्शा, प्रोंइशा सोइक्नुड” देंमाक्त।

23 मिनु मेकोपुकीमी “ब्रोंइचा मगेचा, सरकार, ब्रोंइचा मगेचा। शीम केप्शा कांटी थोक्शा क्याइश्शा साइक्चा माल्ब” दे वाइ ब्रेस्स डा ब्रेस्स बाक्मा बाक्त।

24 मिनु पिलातसमी मेको आन कली सिकसी पपाइक्ने मचाप्तीके “मो हना, लो, सतीन” दे आन पुंइशो पचा गेमी बाक्त।

25 डोंइती मरिम्शो गेय पा, मुर साइश्शा चोक्सीशो बारब्बा कली प्रोंइपाइश्शा सोइक्ता बाक्त। येसु कली आन पुंइशो खोदेशो पा शीम केप्शा कांटी थोक्शा क्याइश्शा साइक्चा कली गेवा बाक्त।

### येसु साइक्चा पुंइसीशो

26 मिनु सिपाइपुकीमी येसु कली लदमे बाक्त। सहर रे गुंइदमेनु, आ रू रे पिशो साइरेनी डा सिमोन कली ग्याइश्शा, येसु कली क्याइक्तीक शी कुरपा, येसु आ नोनोले खोइक्पाइश्शा लदमे बाक्त।

27 शुश मुरुमी मेको आन नोले खोदमे बाक्त। मीश मुरपुकी डाक्शा रोंका पना पन गाक्मा बाक्त।

28 मोपा डाक्शा खोदमेनु, येसुमी आ नोले लेशशा कोव्रशा, डाक्ब मीश मुर आन कली “ए यरूसलेम डा तमीपुकी, आं कली तशा, मडाक्कीन। तन्न इन तमी तौ नु आंमा इन कली मिम्शा डाक्कीन।

29 मारदे हना काबु एको सहर डा मुर शुश श्येत जाइनीम। मोपा श्येत जाक्मेनु, आल मथीब नु दूध मतुंडब मीश मुर ग्येरसीनीम। मारदे हना शुश श्येत दुम्ब। लूका २१:२३

30 मिनु मेकोमी रोंगु कली ‘ब्रेश्शा चिप्शा, आंइ कली सुम्शा खुइक्तीकी’ दे पुंइनीम। होसे १०:८; प्रकाश ६:१६; प्रकाश ९:६

31 क्येख शी लाइ यो चोव्रमेनु, सोव्रशो शी मार लीबा डा?” दे माइक्मी बाक्त। भजन संग्रह २२:१९; १पत्रुस ४:१७

32 येसु कली लदमेनु, खुइ निक्शी आस कली यो साइक्थ लदमे बाक्त।

33 मिनु खप्परे माइक्तीकेमी चाक्दीशशा, मेको सांफा आन कली शी का का तारी इप्पा गुइ खोइलीम कांटी थोक्शा, शी पोक्शा, येसु आ ग्युरा गे का, आ पेरा गे का क्याइशशा वोदमे बाक्त।

34 मिनु क्यदमेनु, येसुमी “आं आफ, एको आन कली माफ गेने। मारदे हना एकोपुकीम मारेइ मतुइशशो बाक्नीम” दे पुना बाक्त। सिपाइपुकीमी फेन्टे ग्यारशा, आ वा योक्समा बाक्त। यसैया ५३:१२; प्रेरित ७:१६; प्रेरित ३:१७; भजन संग्रह २२:१९

35 मुर शुश मेकेर कोव्रना कोव्रन बाक्शो बाक्मा बाक्त। ठेयब मुरपुकीमी “एकोमी शुश मुर आन कली श्येत रे प्रॉइना प्रॉइन गाक्बाक्माक्त। परमप्रभु यावे आ योव्रशो ख्रीस्त बाक्त हना, मुल आंमा प्रॉइसेक्ल” दे शुक्शी पामे बाक्त।

36 सिपाइपुकीमी ग्युरशो थोव्रक तुंडशा

37 “गे यहूदी आन पिप नवे हना, मेकेर ब्रॉइशा लावो” दे शुक्शी पामे बाक्त।

38 येसु कली क्याइशशो शीमी “यहूदी आन पिप बाक्ब” दे ब्रेक्शा वोदमे बाक्त।

39 येसु नु काथा क्याइशशो खुइ कामी यो शुक्शी पा “ख्रीस्त मनवे डा? लो, मुल ब्रोनो। मिनु आंस कली यो प्रॉइस्की” देंमाक्त।

40 मो देंमेनु, अर्कोमी “गे यो परमप्रभु यावे कली तशा महिंनेवे? गो सांफा कांइचीक सजाइ ताइतय।

41 गो सजाइ जचा माल्शो नस। मारदे हना खुइ पाइतस। एको मुरुमी चहिं मारेइ मरिम्शो मपावो” दे हुइक्ता बाक्त।

42 मिनु मेकोमी “येसु, गे परमप्रभु यावे आ राज्यमी हुकुम पचा गोनीनु, आं कली यो मिम्तीन” देंमेनु, मत्ती २०:२१

43 येसुमी “नोफा दाइशशा नेनो, मुलाक्ती गे गो नु काथा दुम्शा, परमप्रभु यावे नु बाक्चा ताइनेवे” दे मदा बाक्त। २कोरिन्थी १२:४

44 मिनु नाक्ती १२ बजेसे बाक्त। मिनु घन्टा सां सम्म रागी नेल्ल

छिडछिड दुम्माक्त।

45 मारदे हना नां आ छेडछेड जाम्माक्त। मिनु परमप्रभु यावे आ खिं आगा डा कोठामी फारशो वा उइक्थ पा जेरर गाक्माक्त। प्रस्थान २६:३१-३३; २इतिहास ३:१४

46 मिनु येसुमी “आं आफ, आं सोक्त इन गुइमी गेतन्नी” दे वाइ ब्रेशशा, आ सोक्त प्रोना बाक्त। भजन संग्रह ३१:६; प्रेरित ७:५८

47 मेकेर बाक्ब कप्तानमी मो दुम्शो तशा “थमा पा, एको मुरुमी मरिम्शो गेय मपशो बाक्माक्त” देंशा, परमप्रभु यावे कली ठेयब सेला बाक्त।

48 मेकेर कोव्रथ जाक्बपुकीमी मो दुम्शो तशा “ओहो, गो मरिम्शो गेय पया बाक्त” दे रुप्शा, आन कुचु तुप्शा, डाक्शा आन खिं खिं लेम्मा बाक्त।

49 गालील रागी रे यरूसलेम सम्म येसु नु काथा गाक्शो मीश मुर नु आ वारचपुकीमी डोन रे कोव्रशा, मोदेशो दुम्शो नेल्ल तामे बाक्त। लूका ८:२-३

येसु आ बेक्शो रां पुक्खीम वोइश्शो

50 यहूदीया रागी अरीमाथीया सहर डा योसेफ नें पाइश्शो ठेयब मुर का बाक्माक्त। मेको मुर यरूसलेम “येसु कली साइक्चा” दे लोव्रसी पामेनु, मबिश्शो बाक्माक्त।

51 मेको रिम्शो थुं पाइश्शो बाक्माक्त। मेकोमी “परमप्रभु यावे आ राज्य पशो तांइसेक्ल” दे थमा सुइश्शा, आस पा बाक्शो बाक्माक्त। लूका २:२५, ३८

52 मिनु मेको लशा, पिलातस कली “येसु आ रां लाइक्चा गेयीनी” दे पुंइदा बाक्त।

53 मिनु पिलातसमी “लो, लतो” देंमेनु, शी रे शोल्शा, बुश वाम गिल्शा लाइश्शा, पुक्खी कामी ओइशा वोदा बाक्त। डोंइती मेको पुक्खीमी सुइ मवोइश्शो बाक्माक्त।

54 सुक्रबार नाकनाकदो ६ बजे क्येडा डोंइती मेकेर चाकदीशशा वोदा बाक्त। मारदे हना ६ बजे रे नाइक्तीक नाक्त गोइबाकमाक्त।

55 गालील रे येसु नु काथा गाकब मीश मुरपुकीमी योसेफमी येसु आ रां लाइशशो तशा “ते वोइक्बा?” दे कोव्रशो बाक्मा बाक्त।

56 मिनु वोइक्तीके तुइशशा, सहर लेशशा लशा, रां मराकब ओख्ती ग्याप्शा चाकशा, साशा खिंम वोदमे बाक्त। मिनु आ दीसा नाइक्तीक नाक्त दुम्तीक गेय मपथु, नाइशशा बाक्मा बाक्त। प्रस्थान २०:१०

## 24

पुक्खी श्येतथ तशा, छक लाकशो

मत्ती २८:१-१०; मर्कूस १६:१-८; यूहन्ना २०:१-१०

1 मिनु आ दीसा सुनी कना बोक्शा, मराकब ओख्ती लाइशशा, पुक्खीमी जाकदीम्मा बाक्त।

2 मिनु पुक्खी सुशो फुल्लु रोक्शो तशा,

3 ओव्रशा कोव्रडमेनु, येसु आ रां मबाकमाक्त।

4 मिनु मबाक्शो तशा “ओदेशो मार दुम्मे?” दे छक लाकमानु, झिल झिल पाइशशो वा फेक्शो मुर निक्शी फो फु गूशो तामे बाक्त।

5 मेको आस कली तशा, हिंशा कोव्रने मचाप्यु, खुम्की पा बाम्मा बाक्त।

6 मिनु मेको निक्शीमी “मारदे सेस मुर कली बेक्शो मुर वोइक्तीकेमी माल्नीनी? एकेर मबा, सेंसीचा पुंइसाक्व। गालील रागीम काथा बाक्नीनु, इन कली मार शेंदा, मेको ममिम्तीनी?

7 ‘रागीम जरमेशो पापी आन गुइमी जिम्मा गेने पुंइसीशा, शीम कयाइशशा कांटी थोक्शा साइक्चा पुंइसीब। मिनु बेक्शो आ नित्थ नाक्ती बेक्शो रे सेंसीब’ दे शेशो प्रेंदीनी डा?” देंसा बाक्त। लूका ९:२२

8 मिनु येसु आ लोव्र ति फ्रुक्गमे बाक्त।

9 मिनु मेकेर रे लशा, येसु आ शेंसीब ११ जना नु आ वारच नेल्ल आन कली तुइक्पदमे बाक्त।

10 मेको मो दुम्शो ताइब मीश मुर सु सु बाकमा बाक्त देशा हना, माग्दाला डा मरीयम, योअन्ना नु याकूब आ ममा मरीयम बाकमा बाक्त। मेको आन वारच का निक्शी यो बाकमा बाक्त। लूका ८:२-३

11 येसु आ शेंसीबपुकीमी मीश मुर आन लोव्र नेंशा “एको मीश मुर आन लोव्र बाकब” दे थमा मसुदमे बाक्त।

12 पत्रुस चहिं दोरशा, कोव्रथ जाकदीम्माक्त। जाकदीशशा बाप्शा कोव्रडानु, बुश वा डा लाकशा मारेइ मतवा बाक्त। मिनु छक लाकशा आ खिं लेम्माक्त। यूहन्ना २०:६-१०

येसु कली एम्माउस डा लांम तशो

मर्कूस १६:१२-१३

13 मेको नाक्ती येसु आ वारच निक्शी यरूसलेम रे गाकशा, एम्माउस माइशो गाउं डा लां खोदसे बाक्त। एम्माउस गाउं यरूसलेम रे ६० स्तादीयोन डोन बाकमाक्त। स्तादीयोन का १८५ मिटर खोदेशो बाकब।

14 मिनु गाकना गाकन बाकसानु, ओदेशो मार दुम्मे, दे लोव्रसी पमुसा बाक्त।

15 मिनु गाकस डा गाकस लोव्र पाम्सेनु, येसु पिशा, गुम्शा, काथा गाकमा बाक्त।

16 काथा गाकशा यो, येसु, दे मतुइक्तसे बाक्त। मारदे हना येसुमी आस कली मतुइक्पांडसे बाक्त।

17 मिनु येसुमी “नाप्खे मार लोव्र पसी?” दे हिल्लो पवा बाक्त।

18 मिनु ख्रा दिक्शा आस थुं खाइक्सा बाक्त। मिनु क्लेओपास माइशोमी “यरूसलेममी मार दुम्मे, दे गेमी ला मतुइक्तीनी?” देंमेनु,

19 येसुमी “मार दुम” देंमाक्त। मिनु मेको निक्शीमी “मार दुम्त देशा हना, नासरथ डा येसुमी परमप्रभु यावे आ लोव्र पवानु, शुश चिन्ड कोइताक्व। परमप्रभु यावे नु मुर नेल्ल आन डोंइती मोदेशो पाप्तु। मत्ती २१:११

20 तन्न इं ठेयब चढेब नु ठेयब मुरपुकीमी दोस गेशा 'साइक्चा पुंडसीब' दे शीम क्येप्शा कांटी थोकशा क्याइशशा साइक्पाइक्तेकम।

21 मेको 'परमप्रभु यावे आ सोइशशो इं इस्राएली कली प्रॉइब बाक्ब' दे थमा सुइशशा, आस पा बाक्तस्कु। आ बेक्शो नाक्त सां दुम्त। प्रेरित १:१६

22 मुल सुनी गोपुकी नु बाक्शो मीश मुरपुकीमी आंस वारच नु गो नेल्ल आंइ थुं क्याल्तीकी।

23 मारदे हना सुनी कना येसु आ रां वोइक्तीक पुक्खीम लमानु, येसु आ रां मथिक्क। तन्न परमप्रभु यावे आ स्वर्ग डा गेय पाइब निक्शी गूशा 'येसु ब्रॉइत, देंताक्स' दे लेशशा पिशा लोत्र पाम्तेकम।

24 मिनु आंस वारच का निक्शी यो लशा, कोत्रशा लेशशा जाक्शा 'मीश मुर आन लोत्र थमा बाक्त' देंतेकमे। तन्न मुल सम्म सुइमी येसु कली मतामे" देंसा बाक्त।

25 मिनु येसुमी "गे मरुप्ब नसी। साइ नेसी परमप्रभु यावे आ लोत्र पाइब आन देंशो लोत्र रुप्शा थमा सुइक्ने मचाप्नीसी? लूका ९:२२

26 ख्रीस्त श्येत जशा, सक्ति पाइशशो दुम्शा, राज्य पचा ताइब देंशो लोत्र मुल यो मरुप्नीसी?" देंमाक्त।

27 साइ नेसी मोसा नु परमप्रभु यावे आ लोत्र पाइबपुकीमी ख्रीस्त आ पर्बम मार मार ब्रेक्शो बाक्मा, मेको नेल्ल शेंदीम्सी बाक्त। ब्यवस्था १८:१५; भजन संग्रह २२:-; यसैया ५२:१३-५३

28 मिनु आस गाउं जाक्दीशशा, येसुमी "लो, बाक्कीसे, गो लाइनुड" देंमाक्त। उत्पत्ती १९:१५, २४, २५

29 मेको निक्शीमी "मुल नां रिक्शा ते लाइनीनी? मुलाक्दो काथा बाक्क्य" देंसा बाक्त। मिनु येसुमी "मो हना दुम्ब, नां यो रिक्त" देंमाक्त। न्यायाधीस १९:९

30 मिनु खमे क्येशा, शोब्ले चोने थुम्शा जचामेनु, येसुमी शोब्ले शेशा, परमप्रभु यावे कली "गे रिम्शो पाइब बाक्नीनी" देंशा, जिक्शा योक्गा बाक्त। लूका ९:१६; लूका २२:१९

31 मिनु मो पा तुइक्पांडसेनु “येसु कका बाक्माक्त” दे तुइक्तसे बाक्त। तुइक्तसे चोटी येसु यो जाम्माक्त।

32 मिनु मेको निक्शीमी “मेकोमी लांम गो निक्शी नु लोत्र पवानु, परमप्रभु यावे आ लोत्र शेंदानु, इस थुं रांमी नांम तशो खोदेशो मदुम्सा डा?” देंमुसा बाक्त। उत्पत्ती १९:२६

33 मिनु मेको रीब पा लेशशा, यरूसलेम लसा बाक्त। यरूसलेमम जाक्दीशशा, येसु आ शेंसीब ११ जना नु मेको नु काथा बाक्बपुकी खुम्सीशा बाक्शो गुम्से बाक्त। लूका ९:२४

34 मेकोपुकीमी यो “प्रभु, थमा पा बेक्शो रे सेंसाक्व। मिनु सिमोन पत्रुस कली तपांडसाक्व” देंमा बाक्त। १कोरिन्थी १५:४-५

35 मिनु मेको निक्शीमी लां गाक्सानु, मार मार दुम्मे, आस खिं जाक्दीशशा मार दुम्मे, मेको नेल्ल तुइक्पदसे बाक्त। मिनु “शोब्ले योक्शा जचशोनु कका येसु बाक्माक्त, दे तुइक्तस्कु” देंसा बाक्त।

### येसुमी तपांडसीशो

36 मिनु मोपा लोत्रसी पामेनु, येसुमी आंम कली तपांडसे बाक्त। मर्कूस १६:१४-१९; यूहन्ना २०:१९-२३; प्रेरित १:१-१४; १कोरिन्थी १५:५

37 मिनु “वोल कोर में” दे थाम्पा हिंमा बाक्त। मत्ती १४:२६

38 मिनु येसुमी “मारदे आं कली तशा ‘वोल कोर में?’ दे हिंनी? वोल मनडा। वोल के श्ये रुश मबाक्ब।

39 आं कली थिशा कोत्रयीनी।

40 आं गुइ खोइलीमी कांटी थोक्शो गार कोत्रडीने” देंमेनु, कोत्रडमे बाक्त। यूहन्ना २०:२०

41 मिनु छक लाक्शा “येसु बाक्म कों, मबाक्म” दे दल्गीर पामे बाक्त। हिंमा यो बाक्त। ग्येरसमा यो बाक्त। मिनु येसुमी मेको आन कली दल्गीर पशो तशा “एक मारेइ जचा थोत्रकी बाक्म कों” दे पुना बाक्त।

42 मिनु वाल्शो डांइ का गेमे बाक्त। यूहन्ना २१:५,१०; प्रेरित १०:४१

43 मिनु मेको डांइ ताक्शा, नेल्ल आन तचा डा पा ब्ववा बाक्त।

“साइ ब्रेक्शो लोव्र थमा दुम्ब” दे शेंशो

44 मिनु येसुमी आ शेंसीब आन कली “गो गे नु बाक्ची ना आ देंशो मोसा आ अरेशो लोव्र, परमप्रभु यावे आ लोव्र पाइब आन ब्रेक्शो नु भजन संग्रह आं पर्बम ब्रेक्शो लोव्र नेल्ल गाप्चा माल्ब, दे इन कली लोव्र पाता” देंमाक्त। लूका १८:३१-३३; लूका २४:२६-२७; लूका १८:३१

45 मिनु नोले येसुमी परमप्रभु यावे आ ब्रेक्पाइशो लोव्र रुप्या कली रुप्तीक थुं गेमी बाक्त। लूका ९:४५; यूहन्ना १२:१६

46 मिनु मार ब्रेक्पाइक्मी बाक्त देंशा हना “ख्रीस्त श्येत जशा, साइक्चा पुंइसीशा आ नित्थ नाक्ती बेक्शो रे सेंसीचा माल्ब। होसे ६:२

47 मिनु यरूसलेम रे पा रागी नेल्ल डा मुर आन कली ‘गे इन थुं परमप्रभु यावे गे लेत्चा माल्नीनी। मिनु येसु ख्रीस्त आ नेमी पाप क्याम्चा तांइसीब’ दे नेपाइक्चा माल्ब” देंमाक्त। प्रेरित २:३८ प्रेरित १७:३०

48 मिनु मेकोमी “गे मेको नेल्ल तशा, सांकछी दुम्तीनी।

49 नेनीने, गो आं आफोम ‘सक्ति गेनुड’ देंशो सक्ति इन कली सोइक्नुड। तन्न इर डा सक्ति मतनी सम्म यरूसलेममी रिम्शा बाक्कीन” दे माइक्मी बाक्त। यूहन्ना १५:२६; यूहन्ना १६:७; प्रेरित २:१-४

येसु परमप्रभु आ बाक्तीके लशो

50 मिनु नोले मेको आन कली यरूसलेम रे लाइशशा, बेथानी गाउं चाक्दीशशा, आ गुइ पोक्शा मेको आन कली आसीक गेमी बाक्त।

51 आसीक गेना गेन बाक्मेनु, सरीड गे लाइक्चा पुंइसे बाक्त।

52 मिनु शेंसीबपुकीमी आन पोक्च थेक्शा, येसु कली ठेयब सेल्शा, थाम्पा ग्येरसीशा यरूसलेम लेम्मा बाक्त।



53 मिनु परमप्रभु यावे आ खिंम बाक्ना बाक्न परमप्रभु यावे कली  
मान पा ठेयब सेल्मे बाक्त ।

## परमप्रभु यावे आ लोत्र

### **Bible in Sunwar (NP:suz:Sunwar)**

copyright © 2011 Wycliffe Bible Translators, Inc.

Language: Sunwar

Translation by: Wycliffe Bible Translators, Inc.

### **Copyright Information**

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

Printed book ISBN 9789937101646

**The Bible without Deuterocanon**

in Sunwar

**© 2011, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

---

PDF generated using Haiola and XeLaTeX on 18 Apr 2025 from source files  
dated 29 Jan 2022

27cd6a1c-0244-5add-a4e8-b4f0e5104473